

LA
PARFAICTE
ET
ENTIERE COGNOISSANCE
DE TOVTES LES MALADIES
du corps humain, causées
par obstruction.

Par FAB. VIOLET, Sieur de Coqueray Medecin.

Is est Medicus qui arte scit sanare.



A PARIS,
Chez PIERRE BILLAINE, rue S. Jacques
à la bonne Foy, deuant S. Yves
MDC. XXXV.

Avec Privilege du Roy.







A MESSIRE
NICOLAS

DE BELLIEVRE,
Conseiller du Roy en son
Conseil d'Estat, & second
President en sa Cour de Par-
lement de Paris.



ONSEIGNEVR,

C'est vne coustume tres-
ancienne & tres-loüable
entre les personnes qui font profession
des sciēces, de dedier premierement leurs
labeurs & œuures, aux personnes emi-
nentes & vertueuses, auparauant que le
public en iouysse. C'est pourquoy (estant
à ij

EPISTRE.

persuadé par plusieurs de mes amis de faire voir en public vne curieuse & vtile recherche que i'ay faite des causes & origines des maladies) i'ay estimé qu'il estoit de mon deuoir de le vous dedier premierement, cōme vn hōmage qui vous est deu, à cause de vos grands merites, & de vos tres-rares & tres-vertueuses qualitez. Si ce traitté (que ie mets dans vostre balance) vous aggree, ie ne craindray point la calomnie des enuieux & mesdisans, car vous portez pareillement l'espee pour le deffendre. Ie sçay tres-bien que vous ne faites pas profession de la Medecine, ains que Dieu vous a destiné pour œuures biē plus sublimes. Toutefois cela n'empesche pas que vostre grand esprit & iugement vniuersel (qui ne recoiuet point de comparaison) ne puissent biē iuger de routes sciences, voire au dessus d'une infinité de personnes qui en font profession ordinaire, &

EPISTRE.

discerner ceux lesquels parlent réellement d'avec les Sophistes.

Je vous supplie tres-humblement de vouloir que vostre nom escrit sur son frontispice soit sa sauuegarde : car il es-moussera la langue des Zoiles, & clorra la bouche des enuieux: lesquels au contraire iugeront tres-bien à propos que vous ne fauorisez point le mensonge ny l'hypocrisie. C'est pourquoy à vostre imitation, posans à part toutes vaines passions, ils gousteronnt avec delices la verité de la Medecine, que ie descouure & fais voir sans fard. Avec ces tres-humbles supplications, i'adiouste encor celle-cy, à sçauoir qu'il vous plaise permettre que ie me vante, estre de vous & de vostre tres-illustre famille,
MONSIEUR,

Lettres-humble, & tres-
obeyssant seruiteur,
FAB. VIOLET,
Sieur de Coqueray, Medecin.



AV LECTEUR,

SALVT.



My & fidel Lecteur, Il est vray que i'auois dressé ce petit traitté, seulement pour la consideration de mon enfant, afin de le conduire dans la verité de la Medecine, le destournant par ce moyen des voyes obliques, dans lesquelles se glissent insensiblement les escoliers, par la doctrine qu'ils reçoient, tant par la lecture des liures Sophistes, que par les leçons qu'ils reçoient en plusieurs Academies, dont la plus-part des Professeurs, n'enseignent que des opinions sans fondement, lesquelles toutesfois ils impriment tellement dans l'esprit de leurs audi-

AV LECTEUR.

teurs, que puis apres ils font conscience d'en douter: & par ce moyen demeurent dans vne ignorance, qu'ils croient science. Le proverbe n'est que trop veritable, qui dit, que *Imbuta testa recens, diu, seruabit odorem.* C'est pourquoy craignant que mon enfant ne soit de ce nombre, n'estant pas assure si de viue voix ie le pourois enseigner (à cause de l'incertitude de nos iours) à sa seule consideration i'ay laissé par escrit ce traitté, lequel maintenant est fait public, quoy qu' auparauant cela fust bien esloigné de mon intention. Mais par la persuation de plusieurs de mes amis, que ie n'ay peu esconduire, ie t'en ay aussi fait participant. Je te prie de ne iuger temerairement de mes intentions; si dès la premiere lecture tu ne m'en-

A V LECTEUR.

tends, repasse derechef ton iugement par dessus & rumine curieusement ce discours, alors j'espere que tu modereras ta cholere ou mauuaise pensee, si tu en auois conceu contre son auteur. Et puis considere que ie suis homme, & partant ie ne suis pas infailible. Ne crois pas aussi, que reprenant aigrement, & descouurant l'ignorance & paresse des superbes, enflés d'une opinion & philautie, sans pere, qu'ils conçoient d'eux memes, que dis-je, ie sois animé contre eux par vne haine particuliere, c'est seulement la verité qui me force de parler de la façon: affin d'auertir mon enfant à se prendre garde de leur sophisterie. Car ie loüe Dieu, que ie n'ay pas subiect (quand à mon particulier) de me plaindre d'eux: Mais ie souhaite

A V LECTEUR.

le bien de mon enfant & le tien. Je n'ay point recours à vn style ampoullé & bouffi de mots recherchez, fardé & plein d'artifice: ordinairement tels discours sont accompagnez de mensonge, ce ne sont point les habits de la verité, la pureté & naïueté, sont les marques qui mettent la difference entre elle & l'hypocrisie: & puis le plus souuent les belles paroles sont suspectes. C'est pourquoy ie me suis seruy d'un style, que i'ay appris d'as la lumiere de la Nature, les belles paroles affectees sont pour les oreilles exterieures qui se contentent de syllabes: mais à toy, il faut le suc & l'extraict. Si tu accepte ma bonne volonté, tu m'obligeras à te donner les fruits de ces preceptes. A Dieu.

À Paris ce 27. Septembre 1635.



PROLOGVE.



Que Dieu est admirable en ses œuvres ! qui est le Philosophe tant excellent & expert soit-il , lequel puisse comprendre toute la science de la nature ! Hermes Trismegiste , Aristote, Platon, Socrate, &c. ont eu quelque rayon de cette lumiere , mais cela est peu au regard de toute la science.

Les Lettres Saintes nous enseignent , que Dieu apres auoir créé tout l'Vniuers se reposa au 7. iour : Toutesfois nonobstant ce repos , les Cieux se meuuent & roullent tousiours avec vn ordre admirable & ne manquent iamais à leur route , leurs vicissitudes sont si bien compassees que c'est tousiours vne mesme chose. Le Soleil continuë tousiours sa course ordinaire , esclairant & eschauffant toute la terre vne region apres l'autre, avec vn mesme ordre. Les vegetaux

PROLOGVE.

croissent continuellement, meurent au temps de leur fin predestinee, les vns plustost, les autres moins, selon l'ordre de leur composition & vnion des elements, les animaux sont procreez & engendrez, & par leurs semences l'indiuidu de leur espee est conserué, voire de leurs cadauers, autres & differentes especes sont engendrees. Bref nonobstant le repos de Dieu, il n'y a rien d'oyisif en l'Vniuers. Par consequent le Createur a donné la direction de cét Vniuers] à vn Lieutenant, parfait en toutes sciences, authorisé de la Majesté Diuine, exempt de Sophisterie mechanique, & Architecte admirable en toutes ses operations. C'est Nature, qui a receu ce commandement, & cét ordre; C'est ceste lumiere interne creée auant toutes choses:

C'est cét esprit viuisant *qui ferebatur super aquas, ante ordinem mundi*, qui se mouoit sur les eaux auparauant que le mode fust en ordre, c'est à dire, sur ceste matiere informe ou chaos, duquel toutes choses ont esté separees & extraites, c'est ceste lumiere qui donne force

PROLOGVE.

à la lumire du Soleil, c'est celle là qui fut créée la premiere. Enfin Nature est l'agent vniuersel. C'est dans cette congnissance ou science naturelle qu'il est requis que le Medecin puise sa Philosophie, & non s'abreuuer ou s'enyrer de ceste vaine & pernicieuse Sophisterie, laquelle professent plusieurs chicaneurs Academistes, laquelle n'est qu'une opinion couuee par plusieurs esprits broüillons, & esclose malheureusement pour la ruyne de plusieurs. Le prouerbe est assez commun, qui dit, *Vbi desinit Physicus, ibi incipit Medicus*, c'est à dire qu'il faut estre bon escollier de la Nature auant qu'on puisse estre Medecin. Et en effect le Medecin n'est que le seruiteur de nature: Comment pourroit le Medecin exterieur (c'est à dire l'homme) cognoistre & iuger quelle substance du pain est faite chair, & quelle est faite os, & comment cela se fait, quelle temperature & mixtion des elements il y a en ces compositions naturelles: & ainsi de toutes autres choses, tant des animaux que des vegetaux: N'est-il pas cõ-

PROLOGVE.

traint d'auoir que cette seule cognoissance n'appartient qu'à la Nature. C'est pourquoy ie dy qu'il faut que le Medecin imite la Nature, qu'il tâche de tout son possible de cognoistre ses voyes & son intention, afin de l'imiter, car elle n'erre point: qu'il considere combien peu de chose elle extrait des aliments, pour la composition de l'homme, & pour entretenir son baumeradical, & comme elle cognoist & reiette ce qui luy est contraire. Il faut que le Medecin remarque comme nature se plaist à la simplicité & à la pureté, c'est pourquoy, suiuant ses enseignemens de nature, il faut qu'il s'estudie à purifier les corps, chassant tous heterogenes, à preparer & disposer les voyes, rendre les remedes purs & simples, tant qu'il est possible sans destruction de leurs qualités & vertus necessaires, afin de ne donner rien au Medecin interne (ou puissance naturelle) qui ne luy soit familier & conuenable, principalement à celuy d'un corps desia debile. I'ay fait cet auant-discours afin de faire entendre, que

PROLOGVE.

c'est que i'appelle Medecin interne,
lumiere de nature, architecte ou me-
chanique interne, qui font vne mesme
chose, à sçauoir la nature, ou agent
vniuersel.





TABLE DES CHAPITRES
CONTENUES EN CE VOLUME.

LIVRE PREMIER.

- Chap. 1. **Q**V'est ce que Medecine & Medecin 1
Chap. 2. **Q**uels fondemens soustiennent les
Medecins, & de la Philosophie 1. Colône. 17
Chap. 3. L'Astrologie, seconde Colonne, qui appuie
le Medecin. 23
Chap. 4. Del'Alchimie, 3. Colône de la Medecine. 33
Chap. 5. Le deuoir du Medecin, 4. Colonne. 44
Chap. 6. Que le sel, soulfre & mercure, sont les prin-
cipes constituans toutes choses. 54
Chap. 7. Quel'homme deperit continuellement, s'il
n'est soustenu, que la matiere dont il
prend aliment, contient beaucoup d'ex-
cremens. 65
Chap. 8. Que le tartre est la matiere qui fait l'ob-
struction. 72
Chap. 9. Que les tartres se resoluent par le contraire
de ce qui les a coagulés. 76
Chap. 10. Que les habitudes & coustumes de viure
des malades doiuent estre considerees, &
l'vsage ordinaire de leurs aliments. 81
Chap. 11. Qu'il faut cōsiderer la nature des tartres. 92
Chap. 12. Qu'il se faut estudier en la cognoissance des
tartres. 106
Chap. 13. Qu'il y a deux sortes de tartres, à sçauoir, tar-
tarum peregrinum & tararum cruoris. 122
Chap. 14. Qu'il y a deux sortes de coagulations. 127

T A B L E.
LIVRE SECONDE.
Des maladies D'Obstruction.

Chap. 1.	D E l'anatomie des tartres.	131
Chap. 2.	Du tartre qui adhère aux dents.	136
Chap. 3.	Des maladies du ventricule causees par le tartre.	140
Chap. 4.	Du <i>Cholera morbus</i> .	145
Chap. 5.	Des fièvres de l'estomach.	150
Chap. 6.	Des maldies des intestins causees par l'obstruction du tartre.	159
Chap. 7.	De la colique iliaque & contracture des intestins.	162
Chap. 8.	Des diarrhees & dyssenterie.	177
Chap. 9.	Des maladies du mesentere, causee par obstruction.	186
Chap. 10.	Des maladies du foye.	193
Chap. 11.	Des fièvres du foye.	200
Chap. 12.	De l'hydropisie du foye.	206
Chap. 13.	De la pierre, sable, ou grauelle des reins & de la vessie.	212
Chap. 14.	De Diabetica passioné.	220
Chap. 15.	De l'urine blanche & de la sanie.	223
Chap. 16.	De la fièvre des reins.	226

LIVRE TROISIEME.
Des maladies d'Obstruction.

Chap. 1.	D E la goutte.	239
Chap. 2.	De la peste.	257
Chap. 3.	De la fièvre en general.	280
Chap. 4.	De l'épilepsie.	295
Chap. 5.	De la generation des vers & des autres animaux, dans le corps de l'homme.	314
Chap. 6.	De l'istérie ou jaunisse.	339



LA PARFAICTE
& entiere cognoissance
de toutes les maladies
d'Obstruction.

LIVRE PREMIER.

Qu'est ce que Medecine & Medecin.

CHAPITRE PREMIER.



A medecine n'est autre
chose qu'un effect de la
misericorde de Dieu, à
sçauoir vn moyen de resister au
destructeur de la santé que l'hô-
me s'est volontairement acquis
par sa desobeissance dont Dieu

a eu compassion. C'est pourquoy il a creé la medecine, qui est la cognoissâce qu'il a donné à l'hóme de cueillir & s'approprier les vertus & proprietés des choses creées propres pour résister à cet ennemy, qui surprenant cōtinuellement nostre santé tasche de nous precipiter dans la letargie de la mort auant le temps limité, ou à tout le moins de nous faire aualler souuent, voire continuellement l'amertume de ses fruits qui sont les maladies.

Pareillement le medecin est vn officier establi de Dieu pour Ambassade ou porteur de cette misericorde, à sçauoir la guarison aux malades: celuy qui Est & qui a establi cet estat veut & commande aussi que les hómes honorent le medecin: Les Sophistes

& faux medecins sont exclus de cet honneur, car au contraire eux mesmes sont les destructeurs de la santé. Il ne faut pas estimer que celuy là soit medecin qui seulement a appris à discourir élégamment à mignarder son discours par des phrases empoullees & de mots recherchez: cela touche bié les oreilles des esprits delicats, mais s'il ne touche le deuoir du medecin & ne conclue rien pour la fin de la medecine, il n'est point medecin: quand bien il seroit authorisé par les plus celebres Academies, si celuy qui se qualifie de ce tres-excellent titre de medecin, ne suit & n'imité la Nature, s'il n'a puisé sa science dans son liure, s'il n'est esclaire par sa lumiere, quand bien il parleroit toutes sortes de lagues, qu'il allegueroit

toute la Philosophie d'Aristote, que sa memoire luy fourniroit à reciter tout Hippocrate, Gal. & tout autant d'autheurs que l'antiquité en a produit, pour tout cela il n'est pas medecin s'il ne sçait guarir.

Medicina est demonstratio non opinio, medicina est opus, quia ergo opus est, opus de suo artifice testabitur, ars est opus, ars doctrinam operis tradit, itaque ex operibus medicinam & medicos discernendum est, la medecine est vne demonstration & non vne opinion, la medecine est vn œuvre, la science donne la cognoissance de cet œuvre, & partant il faut cognoistre & la medecine & le medecin par les œuvres, par consequent le but & la fin de la medecine c'est la guarison & conservation du corps humain: c'est

des maladies d'Obstruction. 5
aussi le subiect pour lequel le
Souuerain l'a creée.

Ceste prerogatiue d'estre me-
decin n'est point attachee parti-
culierement à ceux qui seront
Grecs, Latins ou &c. mais à tous
ceux qui s'en rendront capables.
I'auouë bien qu'il y a des degrez
de perfection, & que l'un peut
estre plus capable quel'autre, car
vn qui donne raison de ses actiōs
differe bien loing de l'empyrique
qui ne medicamente pas avec
science, & qui ne peut donner
raison de ce qu'il fait, mais seu-
lement par tradition, ou par quel-
que experience, souuent incertaine,
voire le plus souuent hazar-
deuse. Ce n'est pas pourtant qu'il
faille croire qu'un autre qui fera
trophee de Grec & Latin, d'été-
dre Aristote, Plin, Dioscoride,

d'auoir leu Hippocrates & Gal.
d'auoir receu ses degrés en vne
fameuse Vniuersité & celebre A-
cademie, s'il ne sçait guarir pour
toutes ces choses qu'il soit Medec-
cin? Quoy qu'il porte le bonnet
& le tiltre ou chaperon de Do-
cteur, car l'arbre est cogneu par
sô fruit, ie sçay bié que plusieurs
tranchans par la subtilité de
leur esprit & belle eloquence font
breche dans le iugement de plu-
sieurs, s'insinuent & s'impatroni-
sent, par ce moyen dans leurs
bonnes graces: dont puis apres
ils acquierent vn grand credit
parmy ceux qui se reglent par
exemples, lesquels puis apres en
payent la folle enchere, achetant
par ce moyen vn repentir qui les
atflige long-temps.

Vn Architecte ne fera pas ap-

pellé excellent en son art , pour
sçauoir seulement tirer la pierre
de sa mine ou carriere, pour bien
mixtionner du ciment, pour bien
faire de la brique, qui sont toutes
choses necessaires pour la fin de
l'architecture qui est le bastiment
ou l'œuure, mais sera appellé ha-
bile en sô art, s'il sçait de ces cho-
ses en faire vn bastiment parfait
& bien ordonné.

De mesme vn homme qui en-
tend fort bien le Grec & le La-
tin, l'Arabe, &c. excellent Philo-
sophe selon Aristote, subtil en la
dispute ; qui sçaura toute l'hi-
stoire des plantes selon Diosco-
ride, aura leu & retenu en sa me-
moire les dits des anciens Mede-
cins , ne sera pas pour tout cela
Medecin, quoy que ces choses
soient des moyens & instrumens

pour y paruenir, s'il ne sçait guarir les malades.

Tout ainsi que Dieu a créé, par sa miséricorde, & la médecine, & le Medecin pour la nécessité de l'homme, afin de le garantir de la misere, & des incommoditez que les maladies apportent: De mesme Sathan ennemy du genre humain, comme vn singe tousiours meschât contrefait le misericordieux: instruiet pour cet effect des Medecins qu'il fait executeurs de ses meschants desseins. Tels sont ces Leuites & Pharisiens qui passent deuant le nauyé, & ne le guarissent point, qui se vâtent estre la secte la plus honorable, *paucos æquales*, *nullos superiores præseferētes*, disēt-ils, c'est le Samaritain qui guarit le nauyé, c'est à dire le vray Medecin: ce Sa-

maritain ne se vantant ny de sa doctoralité, ny de sa preeminence, ny de sa secte, ny de son sçauoir, mais luy se taisant ses œuvres parlent pour luy, voire bié plus haut; car elles se fôt ouïr d'une prouince en l'autre, tous y adioustent foy, car l'arbre est cognu par son fruit. Mais il faut laisser ces Pharisiens ou faux medecins, pour parler des medecins Samaritains, que Dieu a creés pour estre porteurs de sa misericorde, c'est adire la guarison aux pauvres malades, qui crient d'un bon cœur, *pater da nobis panem nostrum quotidianum.*

Mon enfant considere que Dieu a creé deux sortes de vrais medecins, à sçauoir l'un interne, & l'autre externe; le premier est cet arche ou puissance naturelle, laquelle est dans nous. Ce medecin

2. sortes de medecin.

guarit souuent les maladies interieures & exterieures sans ayde du medecin exterieur. Comme il paroist manifestement & iournellement que l'enfant estant encore dans la matrice, s'il est malade, n'est soulagé ny medicamété que par le medecin interne: pareillement on voit plusieurs autres personnes estre guaries sans ayde d'aucun autre medecin que del'interne. Ce medecin n'est instruiet que de la Nature, vieil & sçauant Pedagogue: l'autre, asçauoir le medecin externe, est l'homme, lequel cognoissant le medecin interne, son intention & sa science, s'accordent ensemble, luy prepare & luy administre les medicaments qu'il ne pouuoit pas trouuer interieurement, que puis apres cet interne applique cela où il voit &

iuge qu'il est requis: le medecin externe, qui est l'homme, n'est que seruiteur de l'interne, toutefois il faut que ce medecin externe aye vne grande cognoissance de la science & intention de l'interne affin qu'il ne face pas côme ceux qui bastissoient la tour de Babel, qu'il ne dône pas du cimét pour de la pierre, c'est à dire, qu'il ne se confonde pas au iugement de la maladie, en donnant vn *qui proquo* contre l'intention de l'interne: ce qu'a fort bien remarqué Hippocrate en ses Aphorismes disans *quò vergit natura, cò perge*, c'est à dire, imite le medecin interne qu'il appelle nature: ces deux sortes de medecins operét par raisons & operatiós visibles & demóstratiues, en cela on cognoist leur difference d'auéc les medecins

Pharisiens, car ceux cy ne sont fondés que sur opinions phantastiques & resueries, que leur imagination blessée leur suggere, dont puis apres ils establisent des loix, qu'il ne faut enfreindre sur peine d'estre reputé medecin heretique, & partant reietté hors leurs Synagogues.

Les termes
de la mede-
cine doiuent
estre signi-
ficatifs &
intelligi-
bles.

Les termes ou les manieres de discourir & d'escrire en la medecine doiuent estre significatifs & intelligibles. Il faut que le medecin donne à toutes les maladies des noms, exposans & declarans & la maladie & le remede. Car que sert de parler vn langage estranger & barbare sinon pour vne vaine ostentation? Hippocrate, Galien, Aristote, Ciceron, grands & doctes medecins, Philosophes & Orateurs, n'ont pas

moins esté estimés tels, inçoit qu'ils n'ayent escrit & parlé que la langue vulgaire de leur pays: par exemple vn malade est il bien'edifié, (quand estant enflé & plein de la resolution de son sel alumineux) on luy dit qu'il est hydropique, ce malade sçait aussi bien que le plus sçauant medecin qu'il est enflé & qu'il a des eaux, mais il ne sçait pas comment cela se faiët: & qui plus est c'est plustost vn sel relout que de l'eau: ou à vn autre, vous aués le iaunisse, ce malade sçait aussi bien que celuy qui luy diët cela qu'il est iau-ne, mais ce terme n'exprime pas, quelle maladie c'est, ou mesme si c'est maladie que ce iaunisse. En outre le langage estranger estal-lé deuant les malades leur est sou-uent pernicieux, principalement

à ceux lesquels admirent ce qu'ils n'entendent point : car oyans discourir vn medecin soit en Grec ou Latin, disent, voila vn sçauant homme, il parle bon Grec & Latin, sans doute c'est vn habile medecin, delà arriué qu'ils prennent l'ombre pour le corps, l'apparence pour la realité, côme Paris pour Corbeil.

Sur tout il faut que le medecin soit Physicié reel, c'est à dire qu'il cognoisse les operations internes & externes de la nature, affin qu'il ne soit deceu en la lecture des liures: car comment cognoistra il qu'ils sont veritables, sinon par le raisonnement & la science qu'il a puisé *in libro luminis nature*? d'as le liure de la nature quels liures ont enseigné & instruiet les premiers qui no⁹ ont laissé des es cris?

aucuns certes que le liure de la lumiere de Nature, Hippocrate, Aristote, Hermes Trismegiste n'ont eu autres precepteurs que la lumiere de Nature, c'est aussi pourquoy ils ont parlé avec certitude & sans sophisterie, mais au contraire la pluspart des hommes d'àpresent ne se veulent pas tant donner de peine, se contentans d'aualer la viande maschee, delà vient qu'ils sont facilement trompés, s'aveuglâs eux mesmes, puis qu'ils se contétent de la simple lecture des liures, dont la pluspart sont faux, ce qu'ils ne peuvent discerner, n'estans point vrais Philosophes. Pour conclusion de ce chapitre ie t'exhorte mon enfant, que tu ne sois point paresseux en te contentant de la simple lecture des liures, ap-

prends vne science plus parfaicte, affin que tu les puisses discerner, sur tout ne fais pas peu d'estime de la medecine, ains considere combien elle est honorable, puis que c'est vn estat & office eitable de Dieu par sa grande misericorde, pour resister au destructeur de la santé, le precursor de la mort, pour aussi restaurer & reparer le degast qu'il faiet continuellement, en nostre corps le priuant de ce pretieux ioyau, de la santé, car le medecin & la medecine ne sont autre chose que la misericorde de Dieu qui l'offre & donne à ceux qui en ont besoin, *Nec enim vel medicus vel medicina quid quam aliud est quàm indigentibus à Deo data & oblata misericordia.*

*Quels fondements soustiennent le
medecin, & de la Philosophie
premiere colomne.*

CHAP. II.

MOn Enfant considere
que l'expert Architecte
auant que commencer son edifi-
ce tasche sur toutes choses de luy
faire vn bon fondement: de me-
me il faut diligemment recher-
cher quels bons & assurez fon-
dements appuyent le medecin,
afin de ne traiailler point en
vain. Pour moy ie treuve qu'il y a
quatre colomnes principales des-
quelles il faut que le medecin aye
la cognoissance, car ce sont elles
qui l'appuyent & le font subsi-
ster. La premiere est la vraye Phi-
losophie & de laquelle ie parleray

en ce Chapitre: la seconde est l'Astrologie, la troisieme est l'Alchimie, & la quatrieme les proprietiez & deuoirs du medecin: par la Philosophie faut entendre ceste science, laquelle apprend & enseigne à cognoistre absolument & genuinement les choses lesquelles nous estoient auparauant cachees, la vraye Philosophie que ie pose pour fondement en la medecine, est celle laquelle donne la cognoissance de la matiere, condition & nature de toutes les maladies, toute autre est vaine pour cet effect, c'est plustost vne curiosité scolastique, qu'un fondement pour le medecin. La vraye Philosophie doit estre pure & sans Sophisterie, il faut qu'elle soit mesme visible aux yeux corporels, c'est à dire qu'elle se puisse

La vraye
Philosofie
se doit
prouer
par demon-
stration.

prouer par demonstration ,
enfin il faut que nos sens naturels
la puissent discerner. Ceste Phi-
losophie donne à cognoistre de
quelle matiere l'homme est faiçt,
comment & de quelle façon,
côme l'Astrologie enseigne qui
le gouuerne & l'Alchymie à le
diuiser.

La vraye Philosophie consi-
deré non seulement l'homme en
son estre, mais aussi cōtemple la
matiere dont il est faiçt, commēt
& par quelle maniere ces quatre
extremes contraires, les elements
vnis par la nature s'accordent en-
semble & font vne bonne œco-
nomie, si ainsi vnis & rendus pa-
cifiques comment donc se
font les maladies? puis que la na-
ture accouple ensemble sans de-
sordre l'eau & le feu, le sec & l'hu-

mide si le medecin ne sçait comment ces contraires extremes sôt vnis, puis apres comment se desvnissent & se combattent, comment aura-il vne assëuree cognoissance des maladies? pour exemple faut prendre le fer lequel est fait des 4. elements, qui sont (comme i'ay dict) 4. contraires, toutefois il subsiste, & incontinent de luy-mesme se tire vne matiere qui le rouille & le consume, le bois aussi, & toutes autres choses qui perissent, composés des 4. contraires nonobstant subsistent, puis apres d'eux-mesmes se separe vne matiere, laquelle les consume & destruiët, si le Medecin ne sçait comme ces choses se font, comment cognoistra-il comme se faiët la lepre, les vlcères &c. veu qu'auparauant

c'estoit chair & sang composés de parties vnies concordantes & subsistantes ensemble amiablement & sans desordre. Si aussi le Medecin ne sçait comment l'eau se conuertit en air, comment se font les mouuements & tremblements de terre, comment iugera-il, comme se font les frissons & tremblements aux fievres?

Il faut que le Philosophe sçache pourquoy le cerf, le corbeau &c. vivent plusieurs siecles, pourquoy la vipere &c. peut - estre vn an sans manger, pourquoy il est necessité aux hommes de manger plus souuent qu'à ces viperes &c. pourquoy ceux qu'on appelle bilieux portent difficilement le ieusne. Le vray Philosophe doit cognoistre les choses de deffus la terre,

Quelles choses le philosophe doit sçavoir.

desquelles l'homme retient les proprietez, puis qu'il est fait *ex limo terra*, il voit que l'homme a en sa composition de l'arsenic par l'Antrax, cancer &c. du Vitriol, pour les vlceres profonds, par l'acide qu'il est contrainct de vomir quelquefois, voire si acré qu'il vlcere ou excorie par où il passe, qu'il a du tartre, par la goutte, grauelle &c. du soulfhre par les mauuaises odeurs qui procedent de luy.

Puis que la Philosophie est si necessaire au medecin sois soigneux de l'apprendre, afin que tu puisses raisonner selon l'intétion de nature: c'est pourquoy parle côme elle enseigne, appelle chaque chose par son nom, ne sois point barbare à toy mesme ni aux autres, si l'homme est appellé

Microcosme, considère pourquoy
Examinant bien s'il a les proprie-
tez du grand monde, tu seras seur
& certain qu'il est bien à propos
appellé Microcosme, c'est en telle
Philosophie qu'il te faut exercer,
c'est elle qui est la premiere colôn-
ne & base qui appuye & soustient
le medecin.

*L' Astrologie seconde colonne qui
appuye le medecin.*

CHAP. III.

A Pres la Philosophie pre-
miere colonne de la me-
decine, suit l'Astrologie seconde
colonne, Tout ainsi que la pre-
miere enseigne à cognoistre les
choses de dessus la terre desquel-
les l'homme retient les propriétés
des choses superieures, elle remar-

que en l'homme les proprieté
du tonnerre , par l'Apoplexie
les proprieté des estoilles &
astres qui rendent l'air humide
& pluuieux, par les Hydropisies
& par les autres maladies qui se
font par la resolution du corps
humain, il voit en l'homme les
effects de la Lune, au croist &
descroist du cerneau & de la
moëlle, il y voit des eclypses, il
confidere & remarque qu'en vne
saison & en mesme lieu, il arriuera
des pestes, pleuresies & autres ma-
ladies engendrees par l'influence
des astres, lesquelles maladies ne
pourroient estre guaries que par
des Cardiaques & Aperitifs, la
Saignee ou autres remedes leur
estant du tout contraires, au con-
traire, au mesme lieu & en vne
autre saison les Cardiaques &

Aperitifs seront du tout contraires à de telle maladies, & ne se guarissent que par la saignée, & pareillement il remarque qu'au mesme lieu en vne autre saison, ny la saignée, ny les Cardiaques ne conuiendront pour guarir telles maladies. Ces considerations font remóter son esprit plus haut qu'en la contéplation des choses terrestres remarque que cela viét des causes superieures, ainsi apres vne curieuse & diligente recherche il treuve, que l'esprit de Dieu nous appréd que le Ciel, les astres & les autres creatures ont esté premier quel'homme, puis Philosophant en soy mesme & considerant que la prouidence de Dieu ne faiét rien que sagement, iuge par les effects, que Dieu l'a voulu ainsi, affin que faisant

l'homme *ex limo terræ*, il posast en luy toutes les proprietez tant des creatures terrestres que celestes, afin qu'il fust l'abregé du grád monde, la plus belle, & la plus noble espeece de toutes les creatures, estant l'image de son createur.

L'Astrologue considere donc qui *limus terræ*, est quelque matiere excellente, trouue par consequent que c'est vn extrait de toutes choses créées, il Philosophe ainsi, & dict, puis que ie treuue en l'homme les vertus & proprietez tant des choses terrestres que celestes, il faut qu'elles y soient, or Dieu ne fait rien confusement, ainstout par vn bon ordre, il a faict l'homme *ex limo terræ*, apres que toutes creatures ont esté faites, doncques que ce *limus terræ*,

dont l'homme a esté faict, c'estoit l'extraict de toutes creatures, de lesquelles l'homme retient les propriétés.

Toutes choses auparavant leur formation estoient visibles à Dieu, comme à present elles sont, toutes lesquelles ont esté comprises en vn corps visible appelé *limus*: ce corps a esté faict le grand monde & de là l'homme a esté fait *ex isto limo* *Limus terra est semen omnium rerum corporalium*, la semence de toutes choses corporelles tant celestes que terrestres, *cælestium quàm terrestrium*. Je sçay que tu pourras douter de ces choses que ie te propose, & dire, pourquoy donc ceste matiere est elle appelée *limus terra*, si ce n'est de la bouë ou fange de la terre, s'il auoit les propriétés du Ciel, des astres, du

firmament, enfin de tout le mode pourquoy plustost n'est il appellé *limus firmamenti*, ou *elementorum*, *ignis, aqua &c.* ou bien *limus mundi*, puis que toutes ces choses ont esté restraints en ceste masse dicté *limus*? pourquoy seulement tire-elle la denomination d'un des elements? Le te respondray que la cause de cecy est que la terre contient en elle mesme vne masse & de soy est vne masse, ce que les autres ne sont pas; & partant selon la masse ou matiere plus visible le nom a esté donné. Confidere que la terre est le fond & le centre de toutes creatures or toutes choses créées & corporelles tendent à leur centre, qui est ceste masse appelée terre, c'est pourquoy *limus* a plustost esté dit *terra* que *firmamenti*, prenant

plutoſt le nom d'un cōpoſé que d'un particulier, à *maiori parte ſit denominatio*. Par exemple pluſieurs riuieres perdent leur nom dans la Seine, dans la Loire &c. pluſieurs grandes fleuues dans la mer, en la compoſition des cerats pluſieurs drogues perdent leur nom, quoy que plus excellentes que la Cire, & toutesfois le tout enſemble n'eſt appellé que du nom de Cire, comme la matiere plus viſible & qui comprend les autres, pareillement dans les onguens, emplaftrés, ſyrops, electuaires, poudres, opiates &c. De meſme ceſte maſſe a eſté plutoſt appellée *limus terra*, que *firmamenti ignis*, *aqua* &c. à raiſon que c'eſt vne maſſe viſible laquelle contient les autres choſes.

Si donc *limus*, qui eſt la matiere

dont Dieu a formé l'homme est
un extrait & abregé des eleméts
retenant les proprietez de toutes
choses par consequent l'homme
estant fait de ceste matiere retien-
dra les mesmes proprietez, c'est
ainsi que l'Astrologue philoso-
phe.

Que l'hô-
me contiēt
en sa com-
position les
proprietez
du grand
monde.

Par ce que dessus tu peux iuger
que l'homme a en soy vn firma-
ment & cieux contenant, Soleil,
Lune, Estœilles, Astres &c. aussi
bien que des metaux, mineraux,
vegetaux & animaux, ne t'eston-
ne point si tu vois en l'homme se
former des meteores, cômé ton-
nerres, en l'apoplexie forte, des
gresles, neges, pluyes &c. comme
aux cathares froids où l'on sent
comme des neiges, ou gresles de-
couler, des pluyes comme aux
hydropiques, & resolutions du

corps, non plus que de voir des animaux, cômme vers, grenouilles, serpents, taupes; des minéraux comme vitriol, alun, tartre, pierres &c. choses qui arriuent assez souuent & naturellement au grand estonnement des medecins putatifs, & qui ne sont fondés que sur vne philosophie, scolastique, indignes du nom de medecin, mais plutoft doiuent estre chassez comme pestes, ainsi qu'ordonna vn Empereur de Rome, ils sont neantmoins les plus insolens, semblables à des passeuolans, lesquels en la monstre pour estre creus soldats sont les plus insolens, ces docteurs n'ont qu'vn meisme recipe pour toutes regions, pour toutes saisons, pour tous climats, sexes, temperaments & pour toutes

conionctions celestes, c'est leur
rêchape s'il peut. Font trophée
du Grec & du Latin, & puis sont
à labry contre toutes reproches,
quand ils disent, cestuy Galien
& Arist. &c. l'a dict, tels s'ha-
billent de la despoüille des au-
tres, taschent de se l'approprier
& de viure du labeur d'autrui,
puiss'estimans sçauoir beaucoup
demeurent Docteurs ignorans,
parce comme dict Seneque,
multi peruenissent nisi iam peruenis-
sé putassent. Pour conclusion
de ce Chapitre ie dis qu'il faut
estre astrologue pour estre bon
medecin, puis que l'homme
retient les proprietéz des astres
& leur est subiect.

De l'Alchy-

*De l'Alchymie, troisieme colonne de
la medecine.*

CHAP. IV.

L'Alchimie est la troisieme
colonne de la medecine &
la plus vtile & necessaire, qui ne
s'arreste à resuer sur l'etymologie,
car le nó est trop simple pour ex-
primer sa signification. Ceste sci-
ence est appellee Alchymie par
antonomalie, à raison que les
anciens reduisoient tous leurs re-
medes en sels & en liqueurs purs
& incorruptibles & ainsi preparés
les appelloiét tantost elixirs, quel-
ques fois medecines, tãtost quin-
tesséces, à la similitude des cieux,
aussi faiéts d'un cinquieme ele-
ment, ou plutost de l'essence des
quatre elemens appelez quint es-

sence. En peu de paroles Alchymie est vne science physique, laquelle enseigne à separer le pur de l'impur, à meurir ce qui est crud & indigeste, enfin à bien preparer les remedes, sans quoy aucun ne peut estre medecin.

Louange
del' Alchy-
mie.

Par ceste sciéce tu apprédras à anatomiser toutes choses de quoy elles sont composees, quel ordre nature tient en la procreation, vegetation, maturation, mutation, & entretien de toutes choses par ceque, *Alchymia re texit omnia creata ab vltima materia finita seu predestina, vsque ad primam materiam.* Ceste science donne à cognoistre de quelle facon & comment nature cõduit la matiere premiere en matiere finale, comment le pain, vin & autres aliments sont conuertis en chair & faits animal,

de vegetaux qu'ils estoient; elle enseigne quelles separations de ces aliments se font au corps de l'animal avant qu'estre trāsmués, quels excremens il y a en chaque coction & separation. Elle apréd à l'homme à cognoistre de quoy il est faiçt, comment il est composé, & de quelle façon nature agist en luy.

Ceste science est la plus sublime de toutes les autres, c'est l'abregé de toute Philosophie, ce sont autant d'arguments demōstratifs que les operations de l'Alchymie. Elle fait voir qu'Aristote ignoroit encore quelque chose quand il dit *speciem rerum non posse mutari*, puis que le fer, acier, plób, estain &c. sont transmuez (par l'Alchimiste) en corps plus parfaicts, chose facile à fair v oire

à vn enfant: Enfin les tares secrets de la nature sont par elle descouverts, bref c'est le principal fondement qui soustient le medecin, puis que ceste science apprend à purifier le corps de l'homme, à préparer les remedes purs pour cet effect, à faire des Balsamiques & conseruatifs pour resister aux maladies. Tout bien cōsideré on treuuera que Dieu conduit toutes choses par ordre de Chymie ou par art spagyrique, qui est vne mesme chose. Considerela poire ou la prune, lors qu'elle est encore verte: elle est pōtique & astringēte, & desagreable, mais quand l'Alchymiste interne l'a cuiēte en perfection, elle est agreable, & demonstre la bonté, cela se faiēt par les degrez du feu. L'astringētiō laquelle estoit en la prune verte

par la coction naturelle est rendue laxative, le seul Alchimiste cognoist que devient ceste astriction, laquelle elle contenoit auparavant sa maturation, la demostre & faict voir à l'œil & toucher au doigt. Qui est l'homme brutal, qui ne cognoistra assés que la viande laquelle tourne en nostre nourriture, doit estre pareillemēt digeree & cuicte en perfection auant qu'estre faicte animal, que cette viande n'est pastoute conuertie, en l'animal viuāt, mais que la plus grāde partie est reiettee cōme vn excrement heterogene & nuisible à l'ouurage? Si on iuge bien cela des aliments, pourquoy non aussi des medicaments? cela ne paroist il pas manifestement en l'alun, vitriol, rhabarbe?

L'Achymiste sçait separer de

Les quali-
tez cōtra-
res de l'a-
lun.

l'alun quatre qualités extreme-
ment contraires. l'une est froide
& resiste aux inflammations, l'autre
chaude au quatriesme degré
pour le moins, laquelle dissout
les metaux, cōsomme & corrode
les chairs, yne troisieme laquelle
est laxatiue & aperitiue, & la qua-
triesme laquelle est fort astrin-
gente: dans le Vitriol pareille-
ment est contenuë vne vertu
grandement laxatiue & purgatiue,
laquelle penetre par tout le
corps, au contraire y a pareille-
ment vne vertu astringente, l'une
des plus puissantes de la nature,
vne autre chaude extremement,
laquelle consomme & corrode
les corps les plus solides, la der-
niere tout au contraire, laquelle
esteint & reprime les ardeurs &
chaleurs.

De Vitriol.

Pareillement il se treuve dans la rhabarbe, sené &c. autant de ^{Qualitez} contraires manifestes, ce que ^{contraires} l'Alchimiste demonstre à l'œil & ^{de la rhabarbe &c.} faiet toucher au doigt assés facilement. Si donc on donne à vn estomach l'vne de ces choses ou autres semblables, pour agir seulement selon l'vne des quatre qualités, ne fera on pas deceu? par ce que l'Alchymiste interne, l'archee ou nostre mechanique, faisant la separation de se medecament treuvera quatre qualitez manifestement contraires se combattans l'vne & l'autre, au lieu qu'il n'en auoit besoin que d'vne, par exemple, si l'intention est de purger, & on donne de la rhabarbe avec son tout, on donnera la peine à l'Alchymiste ou medecin interne de separer les qualitez

contraires afin de choisir celle dont il a besoin, cependant les autres qualitez ne seront oyſiues, ains feront chacun vn effect contraire, & rendront le malade en pire eſtat qu'il n'eſtoit auparauāt auoir prins ce remede non preparé, attendu auſſi que l'eſtomach deſia debile par maladie eſt obligé de faire la ſeparation & preparation que le medecin externe deuoit faire. En cela le ruſtique ſurpaſſe en cognoiſſance les medecins Phariſiens, car le boulen-ger ſçait bien ſeparer le ſon d'auec la farine, pour faire vn pain plus excellent, le Cuſinier ſçait ſeparer l'arreſte veneneuſe de la viue, diēt dragon marin, d'auec la chair de ce poiſſō, & ainſi tant d'autres dont la liſte ſeroit prolix.

Je ſçay qu'il y a des hommes

portés de furie, comme chiens enragés contre ceste diuine science, ie ne les appelle pas medecins (encore qu'ils se vantent en faire profession) car ils sont indignes d'un nom si excellent, que le Sauueur du monde est souuent qualifié de ce tiltre, voire en a faict la fonctiõ, cõme il paroist en la plus part de ses miracles lors qu'il estoit parmy le monde: mais malgre ces meschans qui l'abboyent comme les chiens font la Lune, ceste lumiere subsistera, voire eclairera par tout le mode, & obscurcira de tenebres leur iour, au grand contentemēt des malades & pour la gloire de Dieu. Vous medecins putatifs, qui mesprises les vrais medecins, lesquels mesprisant l'ornement exterieur,

*Pronostic.
de l'Alchy-
mie.*

Reprehen
sion contre
les mede-
cins pares-
seux & auar-
ricieux.

s'adónent tout à fait à la recherche des moyés pour s'acquitter fidelemét de leur charge, vo⁹ disie ne considerés pas, que la medecine n'est pas seulement contemplatrice mais bien d'auátage operatrice, elle n'est fondée d'opinions seulement, mais de demonstrations, & comment se feront telles demonstrations sinon par la science d'alchymie? Il vous facherait trop de fallir vos mains delicates, dans le charbó, cendres, luts &c. faire la despense requise, trauailler cötinuellement & estre attentifs a l'œuure, la vie que vo⁹ passés à poteler vos mains & orner de bagues & carquans, vous friser & musquer, est bien plus douce, c'est pourquoy vous vous mocqués des Alchymistes de ce qu'ils prennent tant de peine &

consóment leur vie à vn trauail rude, mais pauures ignorans vous ne considerés pas qu'ils vous surpassent en cognoissance, tout ainsi que la chienne, laquelle quite vn morceau de chair aisee à macher pour rógervn os, afin d'auoir vn peu de mouëlle enfermee dedans, laquelle il treuue bien plus delicate que la chair & dont il reçoit vn contentement surpassant de beaucoup la peine qu'il a prise à la tirer hors de l'os: de mesme les Alchymistes treuuent apres leur trauail vn contentement surpassant de beaucoup le vostre, encore qu'ils ont la cognoissance de la vraye medecine, qu'ils sçauët bien estre créée de Dieu pour porteur de sa misericorde, c'est à dire guarison aux malades auxquels il luy plaist l'enuoyer. Ce

44 *Liure premier,*
consideré mon enfant, apprens
soigneusement ceste science.

*Le deuoir du medecin, quatriesme
colonne.*

CHAP. V.

CEn'est assés d'auoir posé 3.
colonnes pour fondemét
de la medecine, il en est requis
encore vne, asçauoir la vertu &
deuoir du medecin, car en vain
sera il Philosophe, Astronome, &
Alchymiste, s'il ne met en effect
ces choses, ce qu'il ne peut s'il n'
a le pouuoir: or toute bonne &
legitime puissance vient de Dieu.
Il faut donc en premier lieu que
le medecin considere qu'il n'est
pas creé tel pour luy mesme, mais
pour asister ceux sur lesquels Dieu
voudra estendre sa misericorde:

c'est pourquoy mon enfant si tu
veux estre dispensateur de si grã-
de charité, crains de l'offencer,
ayme le de tout ton cœur & in-
uoque continuellement sa bene-
diction sur ton labeur, faiets
gayement & franchement ton
devoir, veille soigneusement les
malades, ne leur donne aucun
remede que premierement tu ne
cognoisses'il leur est propre, ne
sois temeraire à iuger, sois discret,
& non babillant, sur tout ayes en
horreur ce vice insatiable d'aua-
rice, car il t'empescheroit de faire
la despense requise en la prepa-
ration des bons remedes: ne sois
semblable à ceux desquels parle
vn grand & tres-excellent Do-
cteur. *Et licet hoc medici quidam
sciunt, scire tamen ideo nolunt, vt fa-
stum, pompam, & auctoritatē sibi*

Il faut que
le medecin
soit discret
& secret.

acquirere possint, suasque vxores aureis torquibus onustas emittere queant, quæ cum antea rustica, coquæ, famula, serua, nonnumquam & meretrices fuissent, iam se comitissas vestitu ac ornatu nullo pudore faciunt, hi medici lupi rapaces sunt.

Ce qui est de desplorables au iourd'huy, est que tout aussi tost qu'un escolier sçait parler grec ou latin, s'il se presente pour receuoir le titre de Docteur y est receu, puis incontinent a licence d'ordonner des medicamets dont il n'a pas la cognoissance des vertus & proprietes du moindre des simples qui y entrent, s'assurent simplement sur ce que Dioscoride, Plin, ou autre menteur en a escrit, sans auoir cognoissance, si les auteurs qui ont laisse ces proprietes & vertus par escrit, les

Grande
faute que
cōmettent
les ieunes
medecins

auoyent experimentees, ou s'ils en auoyent preuue manifeste. Il ne suffit pas pour estre medecin de lire des liures (dont la plus part sont réplis de fourbes & mente-ries ou contenans peu de verité) Il faut esprouuer par les troisiemes colonnes cy deuant si tels sont veritables. Il faut que le medecin voyage, qu'il cognoisse la difference des climats, s'ils changent point aux remedes leurs qualitez, si vn mesme en diuerses regions ne produit point effects differens, si les Astres ne changét point les maladies, ce qui arriue fort souuét, & partât faut chāger de remedes, sur tout le medecin ne doit prendre pour fondement de la medecine, ni les quatre qualitez, ni les quatre humeurs, car c'est vn labirinthe où s'esgarent

Que les 4. humeurs ne sont le vray fondement de la medecine.

ceux lesquels croyent en auoir
bonne cognoissance: c'est errer
grandement de croire que les 4.
humeurs soyent la cause des ma-
ladies, ces 4. font & composent
l'homme, mais ils ne le destruisent
pas, ce sont les heterogenes de ces
quatre lesquels corrópent les hu-
meurs, puis ainsi vitiés souffrét eux
mesmes la maladie & patissent
par le malefice des heterogenes,
& ainsi faut iuger des qualitez,
car quelle qualité donnera on
à la dent de vipere, laquelle tue &
chassé si promptement l'esprit de
vie? quelle qualité donnera on à
vne pierre laquelle se formant
entre l'os & le perioste pour cau-
ser des douleurs intolerables, veu
que tout autre corps estrange, s'il
estoit en la mesme place, causeroit
les mesmes accidents: c'est donc
à cause

Plusieurs
choses à
noter.

à cause de sa forme & non à cause de ces quatre qualitez. Par quelle qualité est-ce que la torpille endort la main de celuy qui tient la gaule où est l'hameçon; par quelle qualité le Basilic tue il celuy qu'il regarde.

Par quelle qualité est ce que le pensil rompt le verre lors qu'il en est touché, que l'aymant attire le fer, l'ambre la paille &c. Bref estimer les humeurs & les quatre qualitez causer les maladies, est vne opinion & non vne demonstration; car vne mesme humeur peut causer toutes sortes de maladies, si ces humeurs en estoient la cause, la melancholie contient en soy aussi bien les quatre Elements que le phlegme ou bile, & ainsi des autres. Ne voit on pas bien que dans l'eau croissent des

herbes chaudes au quatriesme degre, comme ranuncules &c. quoy
quel'eau soit froide, comme pareillemét on voit des herbes froides au 4. degre s'engendrer sur
des lieux secs, chauds & arides, &c. par consequent ie dis, que ce
qu'on appelle bile l'vne des quatre humeurs, peut aussi bien cau-
ser vne fièvre quotidienne, qu'v-
ne tierce, si ces quatre humeurs
qui sont & composent l'homme,
estoyent la cause de leur destru-
ction. Il ne vient point à pro-
pos de dire, que l'vne de ces qua-
tre surpassant les autres rompt
l'œconomie: car nature est vn sa-
ge Architecte, elle sçait son poids
& ne s'y trompe point, autrement
elle ne pourroit paruenir à la fin
de son intétion. Ce sont les cho-
ses heterogenes qui font vn de-

l'ordre en la bonne température, ils corrópent le baume ou humide radical, irritent l'esprit de vie, côme par exéple lorsqu'un gouteux ou catharreux s'et par les douleurs l'auenuë des geles blanches ou des temps fascheux, ou côme dit Hypocrate, le vent boreal estre nuisible aux debiles de poictine, est-ce par ce que tout à coup il y a quelque humeur qui s'engendre de superabondât, & puis que tout à coup elle s'en retourne, & en mesme temps reuiet, lors que la douleur recommence? non nó: ce n'est pas ainsi qu'il le faut entendre: c'est ce que ie demóstreray en só lieu.

Sur tout, mon enfant, prens toy bien garde de t'enfatiner de la doctrine de ceux, lesquels n'ont autre cognoissance des maladies & des remedes que celle

Qu'il ne se
faut tout
afaiect assen-
rer sur la
simple le-
cture des
liures, mais
les exami-
s'ils cōtien-
nent verité

qu'ils treuvent dans les liures des
grecs, Arabes, ou autres esloignés
peut estre de leur climat de deux
ou trois cens lieuës: fois medecin
toy mesme & aye cognoissance
de ce que tu fais, ne fois point
medecin par habitude ou par
exemple, comme on voit en plu-
sieurs Academies où tous suyuent
vne mesme routine, quoy que
pernicieuse. Mais (disent ils) nos
precepteurs & nos deuanciers la
pratiquoient ainsi, ie serois here-
tique & reiette de la compagnie
des autres, si ie demonstrois estre
plus habile & entendu qu'eux,
ou si ie pratiquois autrement: sca-
che que quiconque faiect ainsi
n'est point creé de Dieu pour
medecin, mais de Sathan pour
empoisonneur. Tels sont sem-
blables aux brebis, dont la pre-

miere conduit tout le troupeau, par où elle passe, les autres la suivent, quand bien elle se ietteroit dans vn precipice. Que l'audace, l'orgueil, la vanité & presomptiō de plusieurs Academistes ne te face pas les imiter sur la croyance qu'ils sōt vrais medecins, car tels se seruēt de ruses, finesse & de miseres pour publier leurs louanges. Ceste fameuse & la plus celebre Vniuersité de l'Europe Mōt peller, fait ordinairement de bōs medecins, comme aussi a faict iadis l'Alemagne, & fera encor Dieu aydant, lors qu'il y aura redonné la paix. Bref mon enfant, que ton iugement soit tousiours appuyé sur raisons stables & manifestes, non sur opiniōs, lesquelles changent & n'ont souuent aucune stabilité.

*Que le sel, soulfre & mercure, sont
les principes constituans toutes choses.*

CHAP. VI.

Quels prin-
cipes con-
stituent &
composent
l'homme.

D'Autant que sans la co-
gnoissance des principes
& preceptes, rien ne peut estre
entendu avec solidité & asseu-
rance: c'est pourquoy i'ay iugé à
propos de te declarer & donner
à cognoistee quels principes &
substances composent l'homme,
& tout corps physical. Premiere-
mēt, sçache quel hōme est cōpo-
sé de trois substances, *licet à princi-
pio ex nihilo factus sit, est tamē factus
in aliquid*; ceste chose en quoy
l'homme est faict de rien est vn
composé de ces trois substances,
sel, soulfre & mercure: non seu-
lemēt l'homme est cōposé de ces

trois, mais aussi tout corps naturel. Pour sçauoir que c'est que tel, La cognoissance des principes, sçilz, soulfre, & mercure, est tresnecessaire au medecin. soulfre & mercure, il faut diuiser vn corps, & remarquer, que le sel est la matiere, le soulfre l'ame & le mercure est l'esprit, qui fait l'union & conionction. Ceste cognoissance est la plus necessaire qu'aucune autre, pour estre bon medecin. De ces trois substances prouiennent toutes les causes, origines & cognoissances des maladies, & en fin tout ce qu'il est besoin & requis que le medecin sache, depend de la parfaite cognoissance de ces trois substances, ces trois rendent l'homme sain, le maintiennent & conseruent. Pareillement elles le rendent malade, le destruisent & en fin le conduisent à la mort.

C'est vne mesme science, de sçauoir comment l'homme de sain deuiant malade, & de malade deuiant sain. Il ne suffit pas de sçauoir & cognoistre les origines des maladies, il faut aussi sçauoir les moyens de restauration, c'est la parfaicte cognoissance de ces trois substances, laquelle enseigne & endoctrine le medecin.

Cen'est point seulement par la lecture des liures ny pour l'auoir ouy dire, que l'on apprend ceste science, c'est le feu lequel descouure & demonstre visiblement & separément ces choses, par le feu, l'artiste faict la diuision & separation des principes qui composent le corps d'ot il ne treuve que ces trois subst. & rien n'y est adiousté que la vie: Et partant si tu manies quelque corps, tu manies

aussi inuisiblement ces trois subst. tellement que si tu tiens en ta main vne rose, au iugement de tes yeux tu sçais bien tenir vn corps; mais ceste science ne te profite de rien, car le rustique & l'ignorant sçauét la mesme chose: que si tu es Philosophe & Alchymiste, tu sçauras bien pour le certain qu'en tenant vne rose ou autre corps, tu tiens du sel, du soufre & du mercure, il faut que les yeux internes du medecin (c'est à dire son iugement) voyent & apperçoient ces choses interieurement, comme les yeux de l'ignorant voyent exterieurement vn corps. Cela estant tu cognoistras que c'est que sel, & de quoy il sert en la cõposition des corps, pareillement le mercure & le soufre, & estant separés quels ef-

Exemple
Oracles.

fets ils produisent. Je te veux donner vn exemple qui te fera comprendre facilement ces choses: si du bois demeure en son entier, tu ne peux estre incommodé de l'acrimonie de son sel, ny de l'inflammabilité de son soufre, ny de la vapeur de son mercure: ou si du soulfre demeure en son entier tu peux respirer sans incommodité l'air qui l'environne, mais si le bois est mis au feu, il se fait separation de ces trois substances, ceste fumée ou vapeur t'incómodera & les yeux & le poumon, son sel causera vne grande douleur s'il est mis sur vne playe ou vlcere, dans les yeux ou auallé par la bouche: si le soulfre est mis au feu il se fera separation de ces trois substances, lesquelles in-

commoderont chacune selon sa puissance, car si on respire l'air meſlé avec la vapeur acide qui s'en eſſeue, on reſſentira vne grande incommodité en la poictrine; & ainſi de toutes choſes.

De meſme ſi le corps de l'homme demeure en ſon entier, & que ces trois ſubſtances ne ſe ſéparent point, il ne ſera point malade, mais ſ'il eſt diſſout, ces trois ſubſtances ſe ſépareront & ſe combattront l'une l'autre, & produiront ſeparément chacune ſon effect: tellement que ce ſont ces trois ſubſtances ſéparées lesquelles produiſent les maladies & non pas les 4. humeurs des humoralistes. L'Architecte vniuerſel a par ſon induſtrie & ſageſſe admirable

Reduction.

La cause de
la defunion
des princi-
pes.

vnis ces trois contraires, tellemēt
qu'elles subsistent en paix & con-
corde, mais s'il y arriue desordre
elles se desunissent & se combat-
tent l'vne l'autre; si le soulfhre est
fortifié par quelque heterogene,
il disperse & consume le mercu-
re, si le mercure est le plus fort, il
les vainc tous deux & les coa-
gule, autrement si le mercure est
le plus puissant, il dissout le sel.
Par ceste demonstration, il est fa-
cile de voir que ce ne sont pas
les humeurs, (lesquelles sont de la
composition du corps de l'hóme)
qui causent la maladie, mais bien
quelque ἀνίση, laquelle desunit
ces 3. substances, *tunc frangitur pax*,
de là se combattent & font & cau-
sent les maladies. Prés pour exé-
ple vn rubis fin, vne perle ou autre
chose agreable & de prix, lesquel-

les sôt cōposees de sel, de soulfhre & de mercure, tāt quelles demeurent en leur entier, ces choses sôt agreables & sont tousiours en estime, mais si elles sont separees en ces trois substances, alors elles perdront leur lustre & leur prix, quoy qu'il ne se perderien de leur poids; or ils ne se desunissent pas d'eux mesmes, ains c'est quelque heterogene qui les desunit.

Exemple
fort clair.

De mesme tandis que le corps de l'homme demeure en son entier, & qu'il ne se faiet aucune separatiō des principes qui le constituent, autant de temps demeure avec luy son lustre, c'est à dire sa sante*.

Reduction.

Ceste theorie est bié esloignee de la doctrine des quatre humeurs qu'on accuse estre la cause de toutes maladies. C'est le pain

* Nota que ce desordre ou desuniō est causā par quelque heterogene.

quotidien des Pharisiens, les attaquer par là, c'est les vouloir prendre par le plus fort, & par leur gaigne-pain: c'est pourquoy il ne faut s'estonner s'ils deffendent & empeschét tant qu'il leur est possible qu'on n'y face breche. Il est bien vray qu'il y a en tout corps trois humeurs qui le constituent, mais ne le destruisent pas, c'est le desordre qui arrive en ces trois, par quelque chose extranee, par exemple la poudre à canon de soy ne produit aucun embrasement, voire fust elle en vn lieu plusieurs siecles, mais si on en approche du feu (qui est vne chose extranee & hors de la composition) alors ceste poudre à canó causera des embraseméts, autre: si de la glace ou eau gelee est posée sur du papier, elle ne le

des maladies d'Obstruction. 63
moüillera pas tât qu'elle sera cõ-
gelee: mais si on en approche du
feu elle se refoudra & moüillera
le papier. Si la cire demeure en sa
congelation elle ne penetrera pas
le drap, mais si elle est resoute elle
l'humectera & le penetrera: si du
sel demeure en sa congelation &
en son entier, il semblera insipi-
de, mais, s'il se resout en eau, il
fera paroistre qu'il est salé &
amer. Que s'il est separé par le feu
la liqueur qui en sortira, sera ai-
gre par dessus le plus fort vinaï-
gre de mesme, il en ariue au corps
de l'homme, car tant qu'il n'est
point violenté, il demeure en son
entier, & ne reçoit aucune altera-
tion: mais bien par vn corps
estranger, lors que par aide, les
substances qui le composent sõt
resoutes.

Si son sel se refout & se perd, ce corps sera subiect à corruption, comme lepre, vlceres, apostemes, galles, herpes, &c. cōme on voit manifestement au bois flotté ou autre qui a grādemēt esté moüillé, lequel se pourrit fort facilement, à raison que l'eau a extraict son baume contenu dans le sel, lequel conseruoit ce bois; la preuue se voit de ce que ie dis en ce qu'il ne rend que tres-peu de sel. Quand le soulfhre est allumé outre mesure en l'homme, il consume l'humide radical, dissipe le mercure quel'archee veut extraire de l'aliment pour entretenir & nourrir le corps de l'homme, de là vient qu'il maigrit grandement, & est ce quel'ō appelle fiēre: hectique mais le soulfhre ne s'allume pas de soy mesme, c'est vn corps heterogene

Exemples
qui demon-
strēt clai-
rement cōme
se font les
maladies.

gene qui le fortifie, comme j'ay dit que le feu fortifie la poudre à canon pour causer l'embrasement.

Que l'homme deperit continuellement s'il n'est soustenu que la matiere dont il prend aliment contient beaucoup d'excremens.

CHAP. VII.

PAr le chapitre precedent tu as veu comme toutes choses sont composees de sel, soulfre & mercure, maintenant il te convient sçauoir que le corps de l'homme composé de ces trois deperit continuellement, & partant a besoin de substitués, afin de reparer les breches que le destructeur* fait en ce corps: c'est pourquoy le Sauueur du monde

* C'est le sel armoniac qui destruit le baume radical & ne dans le sel fixe.

grand medecin *viriusque medici-*
na, cognoissant ceste necessité,
nous apprend qu'il faut deman-
der to⁹ les iours nostre pain quo-
tidien ou pitāce continuelle, qui
est comme si nous disions, Crea-
teur tu sçais que nostre corps de-
perit continuellemēt, c'est pour-
quoy nous te supplions nous dō-
ner dequoy le refaire affin de te
glorifier . Or il nous donne
les aliments que nous sçauons
choisir pour substituts, lesquels
contiennent la matiere pour refai-
re ce corps, mais tous ces alimēts
tels que no⁹ les prenōs par la bou-
che, ne sont pas des corps parfaits
séblables au nostre, ils cōtiennent
bien les corps lesquels doiuent, par
l'artiste interne, estre adioustes au
nostre, dont nous ne voyons que
l'escorce , mais ceste escorce que

les yeux corporels voyent & aperçoient, font autāt d'excrements, lesquels ne peuuent estre faits homme ou animal, que l'archee ou mechainique sçait reicter comme inutiles à son ouurage, la structure de nostre corps. Tu pourrois estre en peine pourquoy ce corps deperit, veu que j'ay dit que nature ioignāt ces trois substances ensemble font vn corps, & de contraires qu'elles estoient, ainsi puis apres vnies par la nature subsistent en paix. Il est vray, qu'estant vrayement vnies ne font aucun trouble, comme en l'or &c. mais elles ne sont pas en tout corps de pareille vnion, car en la plus-part des corps, il y a toujours quelque autre estranger qui n'est point de la mesme nature meslé avec. Ce

Nous, cho-
ses dignes
d'estre con-
sidérées,

Exemple
fort cler.

corps estranger est celui lequel fortifiant l'une de ses substances la rend rebelle & combat les autres, d'où vient le desordre, par exemple, vn homme de temperature sulphuree, qu'on appelle bilieuse, iacoit que ceste substance soit plus forte que les autres, ne les destruiroit point pourtāt si elle elle n'est fortifiée, mais si vn tel homme s'eschauffe outre mesure par excès de choses inflammables, comme d'exercices violents, boire ou manger choses qui peuvent allumer le soulfre avec ceste substance, de la composition d'un tel homme sera fortifié, s'enflammera & destruiroit les autres, & partant causera maladies, comme j'ay enseigné cy deuant, par exemples demonstratiues.

Ce corps estranger entre en nous

soit estant meslé avec l'aliment
ou avec l'air, que nous humons &
attirons. C'est pourquoy nature
taschant tousiours de se conser-
uer a vn artiste interne, que i'ay
appelé medecin Chymiste, lequel
separe d'as nous le pur de l'impur,
l'aliment d'avec l'excrement, que
si ce medecin n'a assez de puissan-
ce pour cet effet, ains que cet ex-
crement demeure, cause quanti-
té de maladies, & telles s'appel-
lent maladies par obstruction,
car il bousche les passages del'es-
prit vital: cet excrement dere-
chef se putrefie, puis infecte cet
air ou esprit viuifiant, & les parties
qu'il touche. Ceste obstructio est
differente, selon la difference des
excrements, selon le lieu qu'ils
occupent, selon leur putrefa-
ction, mixtion, quantité, selon

Par quel
moyen le
corps estrá-
ger se mes-
le au nostre.

l'imbecilité de la partie occupee, selon la longueur du seiour. Cela est trescertain, qu'il n'y a aliment si pur qu'il puisse estre, lequel ne contienne encor del'excrement, la preuue en est facile, puis que le pain tât qu'il demeure tel, n'est pas chair humaine visible aux yeux corporels, toutefois il est adiousté à l'homme, & est faict animal, despoüillé de ceste forme, qui luy donnoit l'estre de pain, (tâut entendre par le pain tout aliment) donques l'accident, dont l'aliment est despoüillé, est excrement. Faut entendre que l'alimēt n'est pas purifié & leparé tout à la fois, ains vne partie dans le ventricule, vne autre dans les intestins, dans le *via lactea*, dans le foye, dans les veines, arteres, &c. en



fin par tout où il se faiët co-
ction & digestion, & transmu-
tation de l'aliment, là se faiët au-
tant de despoüilles de sa forme:
car autre est la forme de l'aliment
quand il entre dans le ventricu-
le, autre quand il est chyle, au-
tre quand il est sang, autre quād
il est chair, os, nerfs &c. ceste
despoüille que le medecin ou
archyteëte interne separe, est
l'excrement lequel ne peut estre
faiët animal, lequel doit estre
reietté, non seulement comme
chose inutile: mais aussi com-
me pernicieuse car il cause des-
union & solution de conti-
nuité, infecte par sa venenosité
le corps. C'est pourquoy
Dieu a formé en l'homme des
emonctoires, affin que les excre-
mets de l'alimēt soiët iettez hors

Autant de
fois que l'a-
liment se
purifie au-
tāt d'excre-
ments se
separent de
luy.

comme schories, que s'ils demeurent en chemin font obstructiō, & de là, les maladies.

Que le tartre est la matiere qui faict l'obstruction.

CHAP. VIII.

POur plus facilement cognoistre quelles maladies se font par obstruction, il faut prendre vn nom lequel exprime sensiblement la matiere de l'obstruction. le me contenteray de celui dont s'est serui ce grand & inimitable scrutateur des secrets de la nature, Paracelse, à sçauoir, du tartre, à la verité il ne pouuoit pas mieux appeller ceste matiere, puis que le rapport & analogie est si grande de l'vn à l'autre, voire est vnemeisme, chose, ce que ie

veux faire voir clairement par les exemples des fermentations du vin; & de toutes autres liqueurs.

Lors que le vin se purifie dans le tonneau, il se fait vn sequestre de son excrement, lequel n'est point & ne peut estre vin, le tartre ou lie ne se separent pas seulement du vin, maisaussi de toutes autres liqueurs lors qu'il y est, cõmeaux liqueurs des fruiçts', poires, pommes, grenades & des semences, legumes, &c. ce qui se voit en la confection du cidre, poyré, biere, hydromel &c. De mesme dans l'estomach ces choses, ou autres semblables, se fermentent, digerent & cuisent, le vray suc en est extraict par l'artiste ou archee interne, le reste est lié ou tartre, dõt la difference est

exemple de
l'analogie
des tartres.

prise selon la matiere d'où ils
sont sortis ou extraits.

Cōparaiſō
& analogie
du tartre,
des fruiets,
avec le tar-
tre de l'hō-
me.

Reste à voir si en la separation
des principes, c'est aussi vne me-
me chose, si on prend de la lie
ou tartre de vin, ou d'autre li-
queur (comme j'ay dit cy dessus)
qu'ō le pose dās vn vaisseau pro-
pre au feu de separation, il en for-
tira premierement le mercure
qui sera acide, secondement sor-
rira le souffre ou huile combu-
stible, finalement restera la cen-
dre, dont on tire le sel pareille-
ment: prenez de ce tartre qui s'at-
tache aux pots de chambre, ou de
l'vrine, ou de la sueur, ou de la
grauelle du corps humain mettez
les en pareil vaisseau, que le tartre
de vin, & au mesme feu de separa-
tion, vous en tirerez premieremēt
le mercure avec vn acidité piquā-

te & mordicante, vn soulfre ou huile combustible fort puante, en sorte qu'il n'y a point de soulfre plus puant, restera la cendre dont on tire vn sel fort salé, cecy n'est point vne fable c'est ce que i'ay fait voir à plusieurs doctes medecins, lesquels en ont bien sçeu faire leur profit pour parfaicte cognoissance des maladies. La differéce des tartres desaliments, internes d'auec les tartres exterieurs en la purificació des liqueurs est du plus au moins, & cela despéd des digestions, car tant plus vne chose foible est digeree auec vn'e chose puissante, elle acquerra de la force & puissance, les alimens, sont digerez dans nostre corps plus puissamment que dans vn tonneau ou autre vaisseau c'est aussi pourquoy

ils sont plus puissans, suiuant ceste demonstration, la matiere faisant l'obstruction, est donc bien à propos appelée tartre.

Que les tartres se resoluent par le contraire de ce qui les a coagulés.

CHAP. I X.

Que l'eau
est le prin-
cipe mate-
riel de tou-
tes choses

LEs lettres saintes nous apprennent qu'auant aucune chose formee, il estoit de l'eau, & ceste eau estoit toutes les choses qu'à present sont contenues dans le monde, mais confusément sans ordre ni forme & *Spiritus Domini ferebatur super ista aquas.* Quand il a pleu au Createur il a separé les vertus & substances de ceste eau, qu'il a diuisées en quatre, qu'on appelle elements ou principes, de la quintessence de ceste eau, il

a premierement formé les cieux
& les astres. puis apres toutes cho-
ses selon l'ordre qu'il luy a plu,
par consequent toutes choses
sont faictes de ceste eau. le le
prouue encor par les maximes
d'Aristote, lequel au quatriesme
des meteores, & seconde de sa
Metaphisique, dit que toutes
choses sont faictes de ce en quoy
en derniere fin elles se peuuent
reduire, or par la science d'al-
chymie, toutes choses en dernie-
re fin se peuuent reduire en eau,
par consequent toutes choses
sont faictes d'eau. De ces choses
faictes d'eau les vnes sont coagu-
lees par le froid, comme les me-
taux, la cire, resines &c. les autres
sont coagulees par le chaud & sec
comme le sel &c. les autres par
l'esprit de sel, comme il se voit en

la composition de l'animal, des plantes &c. celles qui sont coagulées, par le froid se resoluent par le chaud, comme les métaux, cire &c. & au contraire celles qui s'ont coagulées par le chaud ou sec se resoluent par le froid ou humide. C'est pourquoy quand on mange quelque chose coagulé, si par le froid, lors qu'il trouue dans le corps de l'homme vne chaleur plus forte que sa froideur, il se resout & demeure tel tât qu'il a ceste chaleur egale, & ainsi par tout le corps iusques à ce qu'il treuve du froid pour le coaguler, & là où est ce froid, là ceste chose se coagule & s'y adhere & y faict obstruction, ceste matiere coagulee de la façon & separee de l'aliment, est ce tartre dont i'ay parlé;

Comme se
fait la coa-
gulation du
tartre dans
l'homme.

semblablemēt des autres coagulés par le chaud ou sec, ou des autres coagulés par l'esprit du sel.

Si ce tartre demeure en vn lieu si long tēps, que vulcan y puisse allumer le feu, alors ce tartre souffrira coction, digestion, putrefactiō & separation, puis causera les maladies, selon la nature de ce tartre, selō la mixtion de ses principes, selon la forte ou debile putrefaction, tellement qu'un mēme tartre causera plusieurs maladies differentes, les vnes qu'on appellera chaudes, comme fieures, phlegmons, erysipeles &c. les autres froides, cōme catharres &c. ceste contemplation & demonstration casse, ou à tout le moins accourcit le nez aux humoralistes. Car par ceste science on voit que ce qui est auourd'huy

Vn mēme tartre peut causer différentes maladies.

phlegme, demain cera ce qu'ils appellent bile, ou à tout le moins en contiendra dauantage, au-iourd'hui est eau, demain pierre, tout ainsi qu'on void plusieurs femmes & hommes ignorans le latin, chanter vn *de profundis* ou *requiem* enquis, de ce qu'ils disent respondront qu'ils prient pour les trespassez, sans toutesfois sçauoir s'il est vray.

De mesme quantité de medecins putatifs parlent de bile & pituite, melancholic &c. & si ne sçauent que c'est, sinon quatre humeurs, ainsi qu'ils ont entendu dire, que toutes les maladies chaudes & rostissantes viennent de la bile, les froides du phlegme: s'ils entendoient les œuures & operations de nature, & comme les maladies se forment ils chan-

des maladies d'Obstruction. 81
changeroient bien de discours,
à tout le moins s'ils consideroient
que la chaleur, par putrefaction,
arriuera aussi bien en vn mon-
ceau de pauot ou de mandrago-
re qu'en vn monceau de tim ou
rosmarin: ils auroient quelque
philosophie qui les conduiroit
iusques à la source de la cognois-
sance des maladies, mais leur co-
gnoissance est vn but qu'il ne
faut outrepasser, sur peine d'estre
heretique. Dieu te vueille bien
garder de leur iargon, car tu ne
serois pas créé de Dieu pour me-
decin, mais tout au contraire
de

*Que les habitudes & costumes de
viure des malades doiuent estre
considerees, & l'vsage ordinaire
de leurs aliments.*

CHAP. X.

Objection.

IL est certain que tu me peus faire ceste obiection, s'il est ainsi que quelque excellent que puisse estre vn aliment, toutefois il contienne quelque venin ou excrement, lequel ne pouuant pas estre assimilé en l'homme causera des maladies selon sa nature, à plus forte raison il s'ensuiura, que ceux lesquels viuent d'alimés plus grossiers & impurs, comme de chairs de pourceau, beuf, poissons vieux, soles &c. (ainsi que viuent la pluspart des matelots, laboureurs & autres rustiques) tels seront plus subiets aux incommoditez & maladies qu'apportent tels excrements ; or donc on voit d'ordinaire telles

gens se porter beaucoup mieux,
que ceux qui vivent d'aliments
delicats & bien assaisonnez, par
consequent ma proposition n'est
pas soutenable. Le respõs à cela
que *consuetudo est altera natura*,
l'habitude est comme vne secon-
de nature, parce que le rustique
a accoustumé dès la naissance de
viure de ceste sorte d'aliments,
quoy que pernicious aux delicats
& non à ce vsitez, comme le roi-
telet ou merle viuant d'araignees,
la cigongne de serpents, le ca-
hart de crapaux, lezards &c. cho-
ses lesquelles seroient poison à
d'autres: toutefois à ceux, qui dès
leur naissance se sont habituez
& accoustumez d'en viure, il
leur sert d'aliment & en tirent
vne conformité de substance ho-
mogenee. Ce n'est pas que

ceste sorte d'aliments ne contiennent beaucoup plus d'excremens mauuais que ne feroient d'autres plus delicats. Mais d'autant que leur alchymiste interne s'est accoustumé à ietter hors de tels excrements au mesme temps qu'ils ont prins habitude de viure de telles choses, tout de mesme qu'à homme fluet, mince & delicat nō habitué à la fatigue, mais seulement à muguer les Dames, il seroit difficile, voire impossible de supporter le hale du iour, à labourer la terre, faire la vigne, ou autre exercice violēt, si premiere-mēt il nes'y accoustumoit peu à peu: mais au contraire le rustique, digere ce trauail facilement, & seroit malade si on luy donnoit à faire la besongne des fluets & delicats. De mesme il en arriue au-

mechaniques alchymistes internes tât des personnes delicates & accoustumées de viure de viandes delicates & euechymiques, qu'aux mechaniques des laboureurs & gens penibles & de grand travail, accoustumez de viure de viandes rudes: & tout ainsi que tous les hommes ne se ressemblent pas en tout point, aussi leurs puissances internes sont dissemblables, comme on voit qu'elle est dissemblable selonc les especes des animaux: l'autruche digere le fer & en vit, le pigeon le grauier, & le chien les os, ce que d'autres ne pourroient pas faire. C'est pourquoy il ne faut pas trouuer estrange, si vn mesme aliment est facile à digerer à vn homme, & à vn autre difficile, de mesme l'excrement se separe & est ietté hors en

l'un, & en l'autre demeure dans le corps & y fait obstruction.

Il faut que tu consideres que les tartres ou excremens penetrét plus ou moins dans le corps de l'homme, selon la forte & debile digestion. Iamais vne digestion lente ou debile n'engédre ni calcul, ni grauiier, & raremēt la goutte, cela est aussi pourquoy les vns sont plus subiets à la goutte que les autres, à la pierre aux reins, les autres en la vessie & ainsi des autres maladies.

L'adiouste encor que tout ainsi que dès le cōmencemēt du mode vne terre produira des pierres, ou sable, ou metaux, les vnes des charbons . En fin *nec fert omnia eadem tellus* , l'une sera tousiours maigre, quelque artifice qu'on puisse prendre à la cultiuer :

l'autre naturellement grasse, l'vne seche l'autre marescageuse, quoy qu'en haut lieu, l'vne couvertira só nître en vne sorte de fruits ou herbes, & ne le pourra couvrir en d'autres choses. De mesme les hommes apportent ausi avec la naissance la maniere & semée des maladies, l'vne produira des pierres, l'autre du sable, l'autre sera aqueux & marescageux, l'vn sera subiet à prédre pour la composition plus de sel que des autres substances, comme les melancoliques & qui vivent beaucoup, l'autre plus de mercure comme les sanguins, & ainsi des excremens separez des aliments.

Pareillement les astres auront plus de puissance sur les vns que sur les autres, comme il se voit assez iournellement que plusieurs

se condolent aux changements des saisons, ce qu'a fort bien remarqué Hipocrate quand il dit, *Mutationes temporum pariunt morbos*, les autres dominant les astres comme dit le Sage, *vir sapiens dominabitur astris*, par consequent ceux qui ne sont pas philosophes ny astrologues sont dominez par les astres.

Plusieurs choses sont requises à vn medecin pour s'acquitter bien de sa charge: Ce ne luy est pas assez de cognoistre le naturel de son village, car l'estranger luy est aussi bien recommandé que le voisin de sa porte. C'est pourquoy il faut qu'il soit Cosmographe, & qu'il ayt voyagé, affin de cognoistre le naturel & habitude de plusieurs pays, Royaumes, Prouinces & terres, de quels

viures les habitans des pays ont accoustumé de viure, exemple : si vn Alemand ou Breton, lesquels sont tousiours accoustumez de boire du vin, voire copieusement sans nuisance prompte, si dis-ie vn tel est espris d'vne maladie (laquelle obligerait vn François de s'abstenir de l'vsage du vin) que l'on le priue tout soudain de l'vsage du vin, infailliblement on luy nuira dauantage que si on luy permettoit d'en vsfer mediocrement. Ce que i'ay esté contraint de faire estant dans les armées du Roy de Boheme & ailleurs, où pareille occasion le requeroit, dónans du vin aux pleuretiques & fieures continuës, & les malades s'en portoiët mieux. Voyla quant' aux habitudes. Quant à la vertu des viures, c'est

Le medecin doit voyager ou à tout le moins estre Cosmographe.

ce qu'il faut obseruer, le vin de Poictou rend vn tartre lequel cause des contractures & coliques plus perilleuses que ne feroit vn vin François: les eaux de Sauoye & d'Espagne causeront plus de goistres & d'escrouëlles que ne feront pas celles de France. L'usage de la biere donne vn sang plus lepreux & immonde que ne fait le vin, ou cidre. L'air d'un pais marecageux est ordinairement plus subiect à la peste, qu'un pais haut esleué: car dans les marais se faict continuellement vne corruption, tant des animaux qui habitent les eaux; que des herbes lesquelles ne se peuuent pas cōseruer long téps, d'où s'esleuent quantité de vapeurs sulphurees, impures & pourries, lesquelles vitiēt l'air de nostre corps. l'a-

iouste encor qu'on vit en vn país plus sobremét qu'en l'autre, celui qui máge beaucoup, reçoit aussi plus d'excremens que celui qui mangemoins, toutes ces choses sont la cause pourquoy on voit plus frequément quelques maladies en vn pays, en vn autre ne seront pas semblables. Les climats aussi & les nations sont differétes seló le dominateur celeste qu'ils aurót ou seló qu'ils seront plus ou moins proches du soleil. Toutes ces choses sont la cause pourquoy les cótrees sont suietes à vne maladie, les autres à d'autres &c..

Celuy qui mange beaucoup reçoit d'auantage d'excremens que celuy qui mange moins.

C'est pourquoy, mon enfant, il faut bien prendre garde à telles choses, quand ce vient à la cure des maladies, c'est à dire, quand tu entreprendras de traiter les malades. Car il ne faut

pas croire qu'un mesme Recipé soit propre à tous les maladies de semblables maladies, ainsi qu'ont laissé par escrit quantité d'escriuains, dont les sectateurs font des selles pour tous che-
uaux, c'est leur rechappe s'il peut.

Observa-
tion neces-
saire.

Il faut donc s'enquerir premiere-
ment de quel pays, de quelle fa-
çon il a accoustumé de viure,
quelles choses il a obserué luy
estre contraires, afin que selon
la cognoissance de telles choses
tu puisses luy ordonner avec as-
seurance, & les remedes & la
diette.

*Qu'il faut considerer la nature
des tartres.*

CHAP. XI.

Cela est veritable qu'une chose ne peut donner que ce qu'elle a, c'est pourquoy ie dis les tartres ou excrements causans l'obstruction, differer selon les matieres ou alimēts dont ils sont separez. Le vin selon son espee donne vn tarte, les eaux aussi selon les lieux par où ils passent, ou selon les mineraux qui se resoluent en elles, ont leur tarte different: car autre est le tarte de l'eau lumineuse, autre de la vitriolee, autre de la sulphuree, bitumineuse, marcescense &c. Les aliments contiennent aussi des tartres differents selon leur espee, car l'un contiendra plus de nitre qu'un autre, d'autre plus de sel armoniac, & d'autres plus de sel fixe, les medicaments qui ne sont pas exactement preparez ont

La difference des tartres est à considerer.

aussi leurs tartres differens les uns des autres, pareillement aussi ont les venins.

La chair de pigeon, ramiers, tourterelles, biletts, &c. contient plus de nitre que ne fait la chair de mouton, veau, ou autre de pareille nature, la chair de pourceau, sanglier, lieure, bœuf, & aussi de plusieurs oyseaux aquatiques contiennent plus de tartres mauvais que les autres, les aux, oignons, poreaux &c. plus de sel volatil que les laitues, pourpié, chicoree &c. les raues, naueaux, fèves, &c. plus de sel fixe que les poires, pômes, cerises &c. Entre les herbes medicamenteuses, l'armoise, l'absynthe le saphena l'ipericum, le chardon b énit, &c. contiennent plus de sel fixe, que le solanum, l'attriplex, les en-

diues, &c. le ros solis, la cheli-
doine, le safran &c. contiennent
plus de sel armoniac & sont plus
esgaux en leur composition que
les precedés. Je pourrois appor-
ter vne infinité d'exemples, qui
seroient superflus, car par l'alchy-
mie tu cognoistras assez ces cho-
ses. C'est pourquoy, suyuant ces
speculations, tu iugeras de la dif-
ference des autres selon les pays,
selon les aliments dont vse le ma-
lade & les eaux dont il boit, seló
mesme aussi le naturel & habitu-
de de son Archee ou mechanique
interne, & en general les tartres
ou matieres d'obstruction sont
tirées des choses qui entrent dás
l'homme.

Ce n'est pas que quand il faut
venir à la cure, il faille s'arrester,

à ſçauoir ſ'il a mangé depuis peu de oecy ou de cela, ce ſeroit pun- tiller de trop pres & en vain : car vn remede bien faiët & excel- lent, ne chafferapas ſeulement le tartre de vin ou de pain, mais auſſi tous autres d'vne meſme eſpe- ce ou nature, c'eſt à dire vn re- mede lequel ſera donné pour de- ſopiler vne obſtruction faite de nitre, purgera toute autre ob- ſtruëtiõ de nitre de quelque ma- tiere que ſoit extraïët ce nitre, comme auſſi le remede pour le ſel armoniac vaincra ou chaffera le ſel armoniac faiſãt obſtruëtiõ de quelque matiere qu'il ſoit ti- ré, ſelon la force & puiſſance du remede, & ainſi faut iuger des autres.

La diſpoſi- tion ou ha- bitude na- turelle doit eſtre con- ſideré,

Il te faut noter & remarquer vne choſe digne de conſideratiõ, c'eſt

qu'il arriue aux operations interieures dans le corps de l'homme, comme nous voyons arriuer aux operations exterieures, soit qu'elles soyent naturelles ou artificielles Car si l'archee ou artiste interne d'un animal a accoustumé de faire plus de sel armoniac que de fixe, quoy que cet animal mange ou prenne de l'aliment, lequel contienne dauantage de sel fixe que de volatil, ce sel fixe neantmoins sera rendu volatil, par la plus grande quantité de sel armoniac avec lequel il sera ioint & meslé dans le corps de l'animal, comme nous voyons ordinairement aux operations exterieures, lors que nous voulons qu'un sel fixe de soy, soit rendu volatil, nous le ioignons avec vne plus grande quantité de sel

Vn plus
grand poids
de sel fixe
fixera pareillement
vn moindre poids
de sel volatil.

armoniac, & puis on paracheue l'opération par le feu. Exemple: Si on veut faire sublimer ou rendre volatil le fer, on en prend vn certain poids, que l'on ioint & mesle avec vn plus grand poids de sel armoniac, puis on met cet amalgame ou mixtion dans l'aludel à sublimer, & ainsi on rend volatil non seulement le fer & acier, mais aussi l'or, l'argent, & quelque autre corps fixe, que ce soit.

Exemples
demonstra-
tifs de la fi-
xation des
corps vola-
tiles & con-
tre.

Tout au 'contraire pour rendre fixe vn corps de soy volatil, il le faut premierement mesler avec vne plus grande quantité de corps fixe, & agir par le feu. Exemple: Si on veut rendre fixe du sel d'vrine, ou du sel armoniac, il le faut mesler avec plus grande dose de sel de chaux ou

autre conuenable, puis agir par le feu selon l'Alchymie, ainsi on voit que le plus foible cede au plus fort.

Pour preuue encore plus sensible, faut prendre l'exemple du vin. Prenez douze pintes (plus ou moins, il n'importe) d'excellent vin, mettez-le dans l'alembic sur le feu, vous en tirerez l'esprit, qui est son sel armoniac ou volatil, lequel emporte avec soy par violence la plus grande partie du sel fixe, qui est rendu volatil, à raison que le sel armoniac est plus puissant que le fixe. Puis faites la preuue selon l'art de ce qui reste dans l'alembic, c'est à dire tirez le sel fixe qui reste dans la lie des douze pintes de vin, dont vous auez separé l'esprit: alors vous treuuierez qu'il y

L'eau de vie est le sel armoniac du vin.

a fort peu de sel fixe qu'il faut peser. Et pour autre preuue, que ce sel armoniac, qui rend l'eau de vie si puissante, est le mesme qui rend & faict le vinaigre si fort & acré, lors que ce mesme sel armoniac est fixé & changé de nature; c'est lors que par le moyen d'une lente chaleur, soit du soleil ou autrement, le vin estant dans vn vaisseau ouuert, il s'eua-pore vne partie de ce sel armoniac, lequel surmontoit en force le sel fixe: alors ceituy-cy qui auparauant l'eua-poration estoit le plus foible, maintenant est le plus fort & puissant: c'est pourquoy à son tour il surmonte le sel armoniac le fixe, & le rend pareil à luy. En la distillation de l'eau de vie, l'esprit ou sel armoniac du vin monte le premier: &

Cōment le
vin deuient
vinaigre.

Belle ob-
seruation.

tout au contraire en la distillati^on du vinaigre l'esprit se separe le dernier, c'est à dire apres le phlegme, qui est l'ordinaire & le propre des sels fixes de rendre leurs esprits avec peine. Pour preuve que le sel du vin de soy fixe, auoit esté emporté par la violence du sel armoniac, & fait semblable à luy: l'ay dit cy-deuant qu'il faut peser le sel fixe qui reste, en la distillation des douze pintes de vin: Pareillement il faut tirer le sel qui se treuue dans douze pintes de vinaigre fait de pareil vin, alors on treuuera que le poids excède de beaucoup celui qu'on a tiré apres l'eau de vie distillée. Il faut donc conclure que les sels volatils volatilisent les sels fixes, & que les sels fixes, fixent les volatils: De

mesme l'animal lequel par habitude ou autrement pread plus de sel armoniac pour sa nourriture & composition que de sel fixe : par telle habitude volatiliser aussi le sel fixe, ainsi que j'ay monsté par l'exemple du vin. C'est aussi la raison pourquoy les vns viuent plus long temps que les autres, lors qu'ils prennent moins de destructeur que du conseruateur : car l'esprit de vie est conserué par le baume radical qui se repose dans le sel fixe de nostre composition, ainsi que le vinaigre se conserue dauantage à cause de son sel fixe & de plus en plus se fortifie à mesure que son sel armoniac se fixe.

Pourquoy
les vns vi-
uent plus
long temps
que les au-
tres.

Telle com-
position.

Car ob-
seruer que
le cho-

Considere & remarque exa-
ctement que par vn ordre natu-

rel, chaque chose apporte & nourrit avec elle son destructeur. C'est cette vraye Philosophie qui fait le Medecin, & non pas des singeries & questions friuoles dont on amuse vn long-temps les Escoliers à la plupart des Academies, dont aussi ils ne rapportent de cela aucun fruiet qu'une Pedanterie pour interroger sur les etymologies & la Grammaire, & puis s'espanouir la ratte à gorge déployée; si on ne leur respond en Grammairien ou en Pedant.

les portent avec elles, & nourrissent & entretiennent leur destructeur.

Fuge, fuge, inquam, fuge Philosophiam Sophisticam, & eos qui eam docent, quia non sunt à Deo creati ad medicinam, sed à Sathana ipsorum magistro ad destructionem sanitatis corporis humani. Pour reuenir à nostre propos, ie dis de mesme,

que ces operations se font exterieurement, pareillement ils se font interieurement au corps de l'homme: C'est pourquoy d'un mesme aliment il se tire differents tartres, selon les puissances naturelles ou Archees-mechaniques, de là il faut conclure que les aliments ne sont pas tousiours cause des maladies par obstruction, iacoit qu'ils contiennent les tartres, car cela despend aussi & est de l'office de l'Alchimiste interne de separer interieurement le pur de l'impur. Et de plus, comme i'ay dit cy-dessus, l'habitude naturel (que i'appelle tantost Archée, Alchymiste, ou Mechanique) d'un sel volatil en fait un fixe, & d'un fixe un volatil: tantost retient un excrement, & reiette l'autre, en vne personne

& d'un meſme aliment en d'autres perſonnes il agit au cõtraire, car il retiendra de l'excrement de quoy faire la goutte, en vne autre perſonne de l'excrement de ce meſme aliment il machinera la grauelle ou vne autre choſe. En vne perſonne il fera la ſeparation des trois ſubſtances des tartres, en l'autre non ; en vne perſonne il retiendra vne ou deux de ces ſubſtances pour delà faire des maladies en vne partie, & l'autre en vne autre partie. Pour exemple manifeſte, le tartre que cet habitude naturel aura retenu dans le foye, ſi là il en fait la ſeparation de ce tartre, il s'eſleuera des vapeurs malignes qui infecteront l'illeidẽ du ſang, & cauſeront vne fiẽvre plus ou moins maligne, ſelon la nature de ces vapeurs, ſi

ce meſme tartre ſe ſepare dans le ventricule cauſera le cholera morbus, ou orexin ſelon ſon naturel, ſi ce meſme tartre ſe ſepare dans les chairs cauſera fronces, abſcés ou telles autres choſes, & ainſi il faut iuger du reſte.

Qu'il ſe faut eſtudier en la connoiſſance des tartres.

CHAP. XII.

QViconque entreprend de traicter ou enſeigner quelque choſe, il eſt du deuoir de celly-là, qu'en premier lieu il propoſe la matiere, ſecondement qu'il explique ſon nom, finalement qu'il deduiſe tout ſon ſuiet, *commoda ſerie & per conſonum ordinem* : C'eſt pourquoy

ie continuë à t'enseigner la matiere laquelle fait les obstructions , à te declarer comment il la faut entendre , & ce le mieux en ordre qu'il me sera possible.

Quant à la matiere, i'ay desia dit que c'est l'excremēt, separé de l'aliment , que nous appellons bien à propos tartre , pour le grand rapport qu'il y a du tartre vulgaire & venal avec le tartre qui sort del'homme. Je ne m'arrestera y à nommer par le detail ces tartres : car il n'y a Cosmographie ny Inquisiteur des secrets de la nature , tant expert soit-il, lequel puisse denombrier toutes les especes & genres'de tartres qui sont en la nature : car il y en a autant , qu'il y a de sortes de corps , lesquels se

Le Medec-
cin doit
estre Cos-
mographe.

peuvent resoudre & separer (ia-
çoit que generalement il n'y en
aye que de deux fortes, ainsi que
ie te monstreray en suite.)

C'est pourquoy il est requis au
Medecin de voyager, ou à tout
le moins d'estre Cosmographe,
afin de connoistre les terres, les
vins, les eaux, les fruiçts, les airs,
& autres aliments dont chaque
nation prend sa nourriture ordi-
naire, afin qu'ayant à traiter les
malades, tu sois seur à quelles ma-
ladies ils sont plus enclins, &
quels tartres leur cause obstru-
ction.

Observa-
tions ne-
cessaires.

L'eau des marets contient vn
tartre sulphuré, suiet à s'enflam-
mer grandement, cela se voit ma-
nifestement, car au soir & au ma-
tin on voit s'esleuer lentement,
& comme nager sur la terre ces

vapeurs crasses & onctueuses, comme aux distillations des huiles. C'est aussi pourquoy ceux lesques habitent tels lieux sont ordinairement sujets aux pestes, fièvres malignes, inflammations de poumon, & voire plus souvent que ceux lesquels iouissent d'un meilleur air.

L'eau de puits & de riuieres, dans lesquels s'écoulent les immondices des villes, ou qui de soy sont nitreuses, causent ordinairement à ceux lesquels en vivent, des escrouelles, vlceres fistuleux, &c.

Ceux qui vivent ordinairement de biere sont plus suiets à la lepre, & autres immondices du sang; à raison que la biere contient peu de sel balsamic & conseruatif, & partant son tartre se

corrompt facilement, & de là corrompt le baume.

Ceux lesquels vivent ordinairement de chairs d'oiseaux maritimes, & d'animaux sauvages & de proye, sont suiets le plus souvent aux maladies Saturniennes, à raison que telles nourritures contiennent beaucoup de soufre & tartre narcotic.

Les personnes qui boient ordinairement des eaux qui passent par les mines de plomb, sont pour la pluspart steriles, & ainsi des autres. C'est en la connoissance de ces choses que le Medecin doit s'exercer, afin de n'estre point trompé en la cure des maladies.

Il y a aussi plusieurs choses causant obstruction, denommées par Metaphore, comme pierre, gravier, sable, bile vitriolée ou æru-

gineuse, lesquelles en effect ne sont pas pierres à bastir, ny sable à faire du ciment, ny bile faite du cuiure mineral vulgaire. Il faut entendre que le tartre du corps de l'homme appellé pierre, est en effect pierre, le sable, sable, le tartre est tartre, quoy que cette pierre & sable ne soient pas semblables à ceux dont on maçonne, ny le tartre tout à fait semblable à celui des tonneaux à vin, toutefois ces choses sont ce qu'elles sont nommées, mais telles qu'elles se forment en l'homme, comme le lapis calaminaris est dissemblable du diamant, iacq̃oit que l'un & l'autre soit pierre, ainsi en est-il de la dissemblance des pierres, sable & tartres de l'homme.

Pour moi ie ne me peux assés estō-
ner comme tant de personnes les-

Disputes
frivoles de
la plupart

des Acade-
mistes.

quels passent plusieurs années aux disputes & questions scholastiques, comment dis-je telles gens ne se desabusent du fondement de leurs quatre humeurs, & de leurs qualitez premieres, qu'ils appellent, pour causes generales des maladies.

Car de quelle humeur & de quelle qualité pourront-ils prouver que la pierre ou grauelle de l'homme abonde le plus? Il est impossible que 'par l'Alchymie, laquelle en sçait faire l'anatomie, & puis c'est par sa forme qu'elle offence, & non à cause de sa qualité.

Termes &
denomina-
tions ridi-
cules.

Dire que la bile brusle, que l'atrabile rostisse, ces façons de parler sont assez frequentes en leur bouche, il a le sang tout bruslé, la ratte rostie, telles choses

les sont imaginations & opinions, mais non fondemens, cela est faux (sauf la reuerence de leur bonnet) que la bile brusle, que l'atrabile grille, car s'il estoit ainsi que la bile bruslast, la bourse du fiel seroit plus en danger qu'aucune autre partie, la ratte ne seroit non plus exempte de la grillade.

Il est bien vray qu'il sort de l'homme des liqueurs ou sels resouts, lesquels corrodent & consomment le corps, & qui par irritation emportent avec soy, & de la bile & del'atrabile ou suc melancolic, & se meslent ensemble, mais ie nie que ce soient, ou la bile, ou la melancholie qui causent ces corrosions, vlcérations & inflammations: car si ces sels resouts sont meslez avec du phleg-

Nota.

me ou pituite , ils causeront des
brulures & grillades, en rien dif-
ferentes à celles qu'on attribué à
la bile & à l'atrabile : comme il se
voit fort souuent en ceux les-
quels sont suiets aux vomissemés
de pituite (ainsi par eux appelée)
attestans qu'ils sentent telle li-
queur chaude comme eau boüil-
lante, & aussi acre que de l'eau for-
te, voire mesme elle vlcere sou-
uent par où elle passe, ce que mes
yeux peuuent attester, & de plu-
sieurs autres Medecins qui voyét
souuent la mesme chose.

Aux vlceres fontaniers & ma-
lins, par lesquels fluent des eaux
claires (qui sont fels resouts)
il ne s'y voit ny bile ny melan-
cholie, & si toutesfois ces par-
ties là ne sont pas seulement bru-
lées par ces eaux, mais bien plus,

car elles sont consommées, voire les os cariés. Ce n'est non plus le sang lequel brusle & rostisse la chair au phlegmon. Car s'il estoit ainsi, le sang qui est tousiours sang, ne brusleroit pas vne seule partie, mais aussi par tout où il seroit, & continuellement, & principalement aux Echimosés, où le sang est hors les vaisseaux & sans frein. La pituite (qu'on accópare à l'eau, & qu'on dit causer la goutte, contient vne chaleur, laquelle elle fait sentir aux gouteux, pour le moins aussi piquante & aspre que la bile. Donc c'est vn tartre ou sel resfou (dont il y en a de plusieurs especes) lequel se mesle tantost avec la bile, tantost avec l'atrabile, tantost demeure dans le sang, & tantost avec le phlegme, lequel

Que le sel des tartres qui donne les ardeurs & corrode se mesle aussi bien avec le phlegme qu'avec la bile, &c.

sel cause les maladies qu'on attribué insciemment & mal à propos à la bile, au phlegme, au sang & à l'atrabile.

Cette Philosophie des quatre humeurs apporte de grandes absurditez, & implique contradiction, car les quatre humeurs comme telles, causeroient toujours vne mesme maladie, ce qui n'arriue suiuant cette mesme theorie, veu qu'elle enseigne ou dit, l'Erysipele, l'icterie, colique bilieuse, &c. estre fait d'une mesme humeur, & toutefois ces maladies ne sont pas semblables, la dissemblance est manifeste, en ce que l'Erysipele corrode & consume la partie (lequel on dit estre de bile) & en l'icterie causée de pareille humeur, il ne s'y fait point d'ouverture, au cholera-morbus que

cette mesme theorie dit estre causé par la bile (à raison qu'ils en vomissent quantité) on ne voit ny le ventricule ny les intestins (par où il en passe aussi beaucoup) estre en aucune façon grillez ny bruslez comme l'Erysipele. Ces exemples seruent à fortifier mon argument, à sçauoir que telles maladies sont causees par les tartres ou sels resouts, lesquels se meslent avec ces couleurs, iaunes, vertes, brunes, &c. & non pas par ces quatre humeurs imaginées. Telles opinions sans fondement sont cause du grand schisme qui est en la Medecine, & dont les pauvres malades payent la folle enchere, se tournant le plus souuent du costé des mieux couuerts, & de ceux qui hablent & crient le plus haut, mais non pas mieux.

Ainsi le Samaritain n'est appelé que quand le Pharisien a passé sans toucher & guerir la maladie, lequel puis apres pour excuse accuse les humeurs.

Pour conclusion mon enfant, sur tout bande ton estude, & ton iugement à connoistre les tartres & leurs differences, lesquels causent obstruction, & de là les maladies. Ainsi faisant tu treuueras vne medecine bien plus certaine & plus manifeste, que non pas par la doctrine des quatre humeurs, mesmes ceux qui l'enseignent ne sçauent eux-mesmes ce qu'ils disent, & ne sont asseurez de leur doctrine; & partant telle qu'est leur theorie en la connoissance des maladies, pareille est leur pratique en la cure, ainsi qu'un

chacun voit, & que d'autres experimentent à leur dommage.

Selon ces paradoxes ie ne nie pas que chaque chose n'aye ses humeurs, ses qualitez & temperatures, lesquelles ils ne quittent pas en agissant, mais ie nie que ce soit par ces quatre qualitez premieres qu'elles causent les maladies. Pour exemple : Avec vne espée de fer ou d'acier on peut tuer vn homme, sans que le froid, chaud, sec ou humide de cette espée en soit la cause, car vne espée d'argent, d'or ou de cuiure, différentes de qualitez, peut faire la mesme chose. Vn squille d'os peut tenir vne playe ouuerte, aussi bien que feroit vn morceau de pauot ou de laurier,

Que chaque chose agit, l'vne par sa vertu ou puissance particuliere, specifique & propre, les autres par leurs formes.

s'ils estoient en la mesme place,
quoy que differens de qualités.
De mesme au corps de l'homme
routes sortes de tartres ou corps
estranges peuuent faire solution
de continuité, de quelque qua-
lité qu'ils soient. Il en est de mes-
me des temperatures que des qua-
litez. Car si la scammonée purge
parce qu'elle est chaude au troi-
siesme degré, il s'ensuiura que
tous ceux qui sont chauds en pa-
reil degre purgeront: de la mesme
façon (ce qui est faux) l'antimoine,
lequel purge avec violence
sans diminution de son poids ou
imperceptible, duquel on ne peut
iuger de la temperature par les
sens extérieurs. Je demande par
quelle qualité & temperature
agist-il de la façon? car tantost il
purge, tantost non, selon qu'il est

plus ou moins ouuert, par quelle qualité l'aymant attire-il le fer ? l'ambrela paille ? &c. car ces choses ne sont point sans qualitez & temperatures.

Je demande encor par quelle qualité est-ce que le Mercure dissout l'or congelé par le froid ? puis qu'on dit le Mercure estre froid, car le froid ne dissout & ne fond pas la glace. Je demande aussi pourquoy tout homme est-il risible, & par quelle qualité ?

Apprends mon enfant que les choses agissent intrinsequement, par les puissances qui leur ont esté données telles & spécifiques dès leur premiere predestination. Comme le propre de la lumiere est d'esclairer, sans auoir esgard de quelle matiere elle est maintenüe, ou comme la ceruse la-

quelle est froide, blanchit la paroy aussi bien que la chaux, laquelle est chaude, aussi l'homme rit, parce que c'est de son propre. I'ay esté vn peu prolix en ce chapitre, mais i'ay estimé que ie ne te pouuois faire entendre suffisamment le sens d'icelui sans cela.

*Qu'il y a deux sortes de tartres, à
sçauoir tartarum peregrinum,
& tartarum cruoris.*

CHAP. XIII.

I'Ay dit cy-deuant qu'il y a deux sortes de tartre en general, c'estee que ie te veux monstrier & faire connoistre en ce chapitre, premierement il y a *tartarum elementorum*, ou *peregrinum*, secondement *tartarum cruoris*; le premier

procède , & est l'excrement des choses exterieures, lesquelles entrent dans l'homme ; l'autre est vny avec l'homme , & aide à sa conseruation , cestuy-cy ne nuist iamais s'il ne se separe & sequestre de l'animal, car alors il est fait excrement ; l'homme ne peut viure long temps sans luy , qu'avec plus grande peine , & pour subsister il est requis que l'Archée compose de nouveau.

Ce *tartarum cruoris* n'est point appellé de ce nom que lors qu'il est separé de l'animal. Je te le feray entendre par les exemples suivans. La terre contient dans soy vn sel , lequel la tient en humide chaud , ce sel est la cause de toute vegetation , sans luy aucune chose ne prendroit augmentation, & la terre ne

Comparai-
son fort de-
monstrati-
ue.

produiroit rien, tandis que ce sel est vny avec la terre elle est bonne & fertile , propre à donner nourriture à tous vegetaux : mais si ce sel est separé de la terre, soit par l'exif ou autrement, cette terre demeure sterile & infertile, & n'a plus la vertu qu'elle auoit auparauant. Pareillement ce sel ainsi separé ne peut produire les choses qu'il faisoit estant ioint avec la terre, ains est plustost nuisible, la terre toutesfois ne demeure pas moins terre, & le sel, sel. De mesme tant que le sel balsamique demeure avec l'homme il ne differe point de l'homme, ainsest de sa composition; mais s'il se separe, l'homme se resout en tabes, hydropisies, diarrhées, &c. l'homme perd sa vertu & son sel radical, son nom & sa

puissance de cōseruatif de l'homme qu'il estoit, est fait *tartarum cruoris*, excrement, destructeur de ce qu'auparauant il cōseruoit. De mesme tandis que le sang est vn dans les veines, foye ou arteres, il est le vray mercure ou humide radical de l'homme, & ne cause point de mal (si par sa grande abondance il ne rompt les vaisseaux) mais s'il se separe, par le moyen de quelque vice estranger, ce sang qui estoit mercure & vray aliment de l'homme, deuiendra excrement & *tartarum cruoris*, ainsi qu'il paroist au laiët, lequel estant separe par le moyen de quelque acide, perd son nom de laiët, ains est appellé beurre, fromage & serosité. Pareillement si la chair de l'homme viuant se corrompt, & qu'elle soit faite pus,

Reduction.

bouë, sanie, elle ne fera plus ce qu'elle estoit, ains excrement nuisible à l'homme, & sera appelée *tartarum cruoris, natura*, ou *microcosmicum*. C'est ainsi qu'il faut anatomiser les tartres, & les matieres faisans obstruction, il ne suffit d'opiner, il faut aussi demonstrier.

Celuy qui opine selon son sens sans demonstrier, est semblable à quelqu'un, lequel voyant ou regardant au trauers d'une vitre iaune assseureroit que ce qu'il voit est iaune, parce qu'il luy paroist tel; de mesme est celuy lequel opine sans fondement & sans demonstration, s'assseurant seulement sur son imagination.

Qu'il y a deux sortes de coagulations.

CHAP. XIV.

EN ce dernier chapitre ie veux enseigner comme les tartres se coagulent. Premièrement il faut entendre qu'il y a deux sortes de coagulations, l'vne est vraye & genuine, & se fait par le moyen du sel, qui est lors qu'il fait vnion des trois principes, pour delà produire vn espeece. Exemple: Lors que de mercure, de soulfre, & de sel est fait vn chefne, la coagulation & vnion de ces trois est faite par le sel, lequel est le corps des trois: car l'eau & l'huile ne se coaguleroient iamais sans le sel, cette coagulation est

generale en tout corps mixte. C'est à dire: Il n'y a aucune vnion des elemens ou principes que par le moyen du sel; l'autre est particuliere & artificielle. Par exemple: La cire est bien coagulée & faite cire par la vraye coagulation & vnion des elemens que fait le sel, soit qu'elle soit fluide, soit qu'elle soit congelée, elle est toujours ciré: mais la coagulation non vraye est lors que par le moyen du froid, de liquide elle est renduë solide & endurcie, côme aussi l'eau est faite glace par le grand froid; & ainsi des autres choses de pareille nature. Au Liure suiuant i'expliqueray ces choses, & pourquoy il est requis d'auoir la connoissance des tartres.



LIVRE SECOND.

DES MALADIES
d'Obstruction.

PROLOGVE.



N ce present Liure
tu iugeras quelle vti-
lité apporte la connois-
sance du premier, au-
quel tu as veu de quelle
matiere l'homme est formé, comment
il est soustenu & augmenté, de quelle

matiere, comment l'aliment est ad-iousté à l'homme, & fait homme, que le plus pur aliment contient encor des excremens appellez tartres, leurs differences. Ce Liure suiuant enseigne que ces tartres sont composez de sel, soulfre & mercure, la pratique ou moyen de les diuiser & separer, leurs coagulations, comment ils font les obstructions, finalement les maladies causées par les obstructions. Que si tu as la parfaite connoissance de ces choses, il te sera facile de voir comment les maladies arriuent au corps humain, quelles differences des vnes aux autres, quoy que procédantes d'une mesme matiere, comment elles sont exaltees en leur augmentation, estat, & fin.

Aux deux Liures suiuians il ne faut pas esperer que ie recite toutes les maladies qui sont causées par ob-

des maladies d'Obstruction. 131
struction, ains seulement quelques
exemples; qui seront arguments as-
sez puissans pour demonstrier, &
enseigner comment se font toutes les
autres maladies par Obstruction.

De l'anatomie des tartres.

CHAP. I.

LE Medecin ne sçauroit as-
sez rechercher les causes des
maladies, voire bien quand il vi-
uroit vn grand aage, & tousiours
employé à la connoissance d'i-
celles. C'est ce qu'a fort bien re-
connu Hipocrate, quand il dit
au commencement de ses sen-
tences succinctes, *Vita breui, ars
verò longa.* Donnant à entendre
que pour bien & exacte-
ment connoistre toutes les
choses requises pour estre bon

Medecin, la vie de l'homme est trop courte. Mais afin de faire son possible, n'estant pas obligé plus outre, il faut tascher de decouurir iusques à la source les cau-

Il ne se faut
amuser ny
arrester à
des opiniõs
ains à la
vraye de-
monstratiõ,

ses & origines des maladies, ne s'amusans pas à des opinions frivoles qui aucuglent l'entendement de ceux lesquels arrestent fixement leur esprit sur ces choses. En ce present chapitre ie demonstreray & anatomiseray le tarte, qui est la cause des maladies d'obstruction. En voicy la pratique. Prenez, soit du tarte qui se forme aux dents, ou soit de la pierre des reins, vessie, foye,

Pratique de
la separatiõ
des trois
substances
des tartres.

ventricule, &c. Faites la separation selon l'art, dont premierement il sortira vne eau acide; secondement vne huile puante & combustible. Finalement re-

stera la cendre dont on tire le sel. Ces trois substances retiennent les proprietétez du tartre dont elles sont extraites, mais elles sont bien plus subtiles & penetrantes, n'estans plus liez ny enscuelis dans leur terre. C'est pourquoy leur effets en la procreation des maladies sont bien plus prompts & plus actifs.

La difference des tartres en leur entier, d'auec leurs substances separées, est semblable à la difference qu'il y a de l'esprit de vin au vin d'ot il est tiré, du phlegme & de la terre qui reste aussi au mesme vin. Ou comme la difference est grande entre le salpêtre, & l'esprit qui en est extrait, ou du vitriol d'auec son esprit acide, ou de l'ambre blanc ou iauue d'auec leur esprit. Car le vin

qui est agreable au goust, contiēt neantmoins vn esprit violent, vn phlegme desagreable, & vne lie aspre & ingrate, le nitre est de goust doux-salé sans aucune acrimonie, au contraire son esprit est violent, acre & caustic, dissoluant les metaux, pareillement le vitriol est pontique, & demonstre peu d'alpreté ny de violence, mais quand il est separé, il a son phlegme insipide, son esprit & son huile grandement caustiques, corrosifs & violens, & la terre grandement astringente : semblablement l'esprit d'ambre est subtil, penetrant, & de forte odeur. De mesme il en est des tartares avec leur tout auāt qu'estre separez, car ils causent bien les maladies, mais non si violentes, comme quand ils sont se-

parez: selon leurs puissances & selon qu'ils serót conduits de puissance en acte par le mechainique interne ils causeront les maladies: tantost fiéures, tantost coliques, *cholera-morbus*, vlceres, fistules, psora, lepre, dissolutiós des chairs, des sels balsamiques, &c. Il faut aussi remarquer que d'autant plus que les substances de ces tartres seront subtilisees, digerees & circulées, d'autant plus ils acquerrot les forces, & seront renduës plus actiues & penetrantes; comme ces choses sont manifestes aux operations exterieures, de mesme elles agissent interieurement; cela se voit aux maladies qui procedent des excremés du sang arteriel, lesquelles sont plus aiguës que celles qui procedent des grosses veines.

Le panarix est causé d'un sel plus

aëtif & plus penetrant, que non pas vn vlcere fontanier, soit en la iambe ou ailleurs, entretenu par vn gros vaisseau, qui sert d'emmonctoire au foye, aussi la douleur & celerité del'vn & del'autre est differente, &c.

Du tartre qui s'adhere aux dents.

CHAP. II.

MAintenat il faut dire & enseigner quelles maladies fait le tartre. Je commenceray par la bouche, là où se fait la premiere separation du tartre d'auec l'aliment, & continueray iusques à sa derniere coagulation ou fin predestinée. Dans la bouche où se prepare l'aliment pour entrer dans le ventricule, se separe vn tartre, lequel s'adhere aux

parties les plus froides, à sçauoir aux dents. De mesme qu'en faisant le sucre candy, ou en cristallisant quelque sel, si dans la liqueur chaude on pose quelques bastons ou autres instrumens, le tartre, ou les sels prests à se cristalliser s'adhereront premier à ces bastons ou autres instrumens qui seront plus froids que les vaisseaux où seront contenuës ces liqueurs. La mesme chose se fera dans les vrinals ou pots de chambre, si dans l'vrine encor chaude on pose quelque chose de plus froid que l'vrine ou que le vaisseau dans lequel elle est contenuë, on verra le tartre qui est resout dans l'vrine s'adherer à ces instrumens, soit petits bastons ou autre chose. Ce tartre est tiré ordinairement des choses pota-

*Observatiō
tres-belle.*

bles , lesquelles estant chaudes contiennent vn tartre resout.

Ceux lesquels lauent souuent leur bouche de vin chaud, & l'y tiennent long-temps, rarement sont exempts de telle maladie, contrel'opinion de plusieurs Medecins qui ne sçauent point les operations de nature, c'est à dire qui ne sont point Alchymistes. Car ils ordonnent de lauer de cette façon la bouche , afin de fortifier les genciues, mais ils ne considerent pas que la violente fictiõ qu'on y fait avec les doigts, eschauffe la partie & la debilité, puis apres le tartre du vin s'adhere facilement en cette partie-là, treuuant la dent plus froide que le reste de la bouche, que s'ils separoient le tartre du vin, & puis alors qu'ils en fissent la-

uer la bouche; ceux lesquels reçoivent leur conseil n'en reçoivent pas tant d'incommoditez.

Lors que ce tartre vient à se putrefier eschauffe la genciue, la curode fait solution de continuité entre la dent & la genciue, la racine des dents qui n'a pas accoustumé de recevoir l'air froid, se carie lors qu'elle est descouverte, & le mal continuë si on n'oste promptement ce tartre, lequel autrement continueroit à se putrefier, & à putrefier la chair & les os qu'il touche.

Il arriue aussi aux dents des douleurs très-grandes qui ne procedent pas de ce tartre crud, mais d'un sel qui se separe, ou du sang ou des chairs, ou qui descend du cerueau, dont ie ne parleray en ce lieu, car ie ne suiurois pas l'ordre

que j'ay promis. Ce sel est appelé par les Pharisiens humeur acre. O le grand secret ! les petits enfans de l'aage de trois ans en sçauent bien autant : mais les bonnes gens disent ce qu'ils sçauent, & ce qu'ils ont appris à l'escole & dans leurs Liures Canoniques.

*Des maladies 'du ventricule causez
par le tartre.*

CHAP. III.

I'Ay dit au precedent chapitre que le tartre qui s'attache aux dents, est separé des choses portables. Icy ie dis que celuy du ventricule n'est pas seulement separé des choses portables, mais aussi des corps plus solides, lesquels contiennent quelque par-

tie dissoluble, & qui se peut resoudre. Le tartre lequel cause les maladies dans le ventricule, n'est pas simplement dans le fond de l'estomac ou meslé *cum cibis*, mais aussi s'attache aux parois & tuniques de l'estomac (comme on voit le tartre vulgaire s'attacher aux tonneaux) par la siccité de l'estomac.

Si ce tartre sejourne en cette partie-là il y cause plusieurs maladies, plus ou moins aiguës, & différentes selon la nature des tartres, ou selon leurs digestions. Que s'il s'attache *granulatim*, on sent souuent des picotements de douleurs dedans l'estomac, principalement quand on mange apres auoir ieusné. Ce tartre cause vn appetit, principalement au matin, parce qu'en se digerant

& putrefiant, il irrite la partie laquelle appelle ou attire de *lactum esurimum*, cet *acetum* est la cause des appetits de l'estomach, car c'est vn esprit dissoluant, qui fait les digestions (& non vne chaleur simplement, ainsi que le suc de limons, qui est froid, digere la perle aussi bien que l'esprit de vin qui est chaud) mais aussi en reuange, l'aliment estant dans l'estomach y cause plus grandes douleurs, principalement quand le tartre se putrefie, & est comme qui ietteroit de l'eau sur la chaux viue. Derechef, la douleur causee par ce tartre *granulatum accumulatum*, est comme si on touchoit la partie affligée de douleur de goutte, ou d'un absces ou fronce, &c. (qui sont toutes putrefactions du tartre) chacun peut connoistre

la douleur que l'on fait en cette partie la touchant tant soit peu, ou seulement mettant subitemēt de l'eau froide dessus. De mesme lors que ce tartre se digere il eschauffe & irrite la partie, de là vient que la douleur s'augmente lorsqu'on mange, soit parce que le boire ou manger est contraire à ce tartre, & de là qu'il cause ebullition, comme au tartre vulgaire & esprit de vitriol joints ensemble, ou à cause de la masse & pesanteur, ou à cause du subit changement, iettant sur cette chaleur le boire ou manger froid, comme on voit que d'un grand chaud à un grand froid il y a deux extremes contraires, ou en fin à cause de toutes ces choses

ensemble, car ils sont rarement separees. Ce tartre s'attache aussi souuent en l'orifice superieur de l'estomach, & y cause diuerfes maladies, comme *ardor gula*, *angustia diaphragmatis*, *accompresiones*, *torturaeque aliae*: c'est ce qu'on appelle orexeti: on connoist ce mal quand celuy quien est affligé se plaint de sentir brusler son estomach, quand il boit, principalement du vin, ou qu'il mange quelque chose trop salé de vieil, le matin ce mal tourmente dauantage, & ordinairement deux ou trois heures: quelques-uns ressentent ce mal apres le disner, & d'autres la nuict, lors qu'il tombe vne acidité ou pituite du cefueau.

Ce tartre prouient ordinairement des vins mixtionnez & sophi-

des maladies d'Obstruction. 145
sophistiquez, des viandes salées
de long-temps, & de manger des
chairs d'animaux sauvages, aqua-
tiques, &c. lesquels contiennent
beaucoup de sel terrestre.

De Cholera-morbus.

CHAP. IV.

QUand le tartre est en
quantité dans l'estomach,
& qu'il se putrefie, & se resout,
il irrite le fiel, & l'attire par acci-
dent dans l'estomach, de mesme
qu'on voit le sang estre attiré
par quelque absces, contusion,
ou autre putrefaction de tartre.

Ce fiel ainsi attiré dans l'esto-
mach, se meslant avec ce tartre
font comme vne ebullition, à
cause de leur contrariété: Ils ont

la mēme antipathie & contrariété que le fel de tartre & l'acide de vitriol. C'est vne pure res-

Que le fel
ou bile n'est
pas la cause
antecedente
de ce mal.

uerie de croire que le fiel ou bile soit la cause antecedente de ce mal, le fiel de foy est vne partie necessaire, comme la rate, il sert comme de fauon pour nettoyer & mondifier les intestins ou autres parties où le Medecin interne sçait l'employer. Le fiel de foy ne cause aucun mal, non plus que le sang : car si le sang pur & bon se contient dans ses limites, c'est à dire dans ses vaisseaux, il ne cause point de mal, mais s'il en sort il est nuisible, occupant autre lieu que celuy qui luy est destiné, à raison qu'il se putrefie, qu'il fait solution de continuité, eschauffant aussi par la putrefaction la par-

des maladies d'Obstruction. 147
tie où il est inondé.

De même le fiel ne produit & n'est la cause antecédente de ce mal, dit *cholera-morbus*, mais c'est le tartre, lequel durant sa putrefaction eschauffe extraordinairement la partie & l'irrite, dont par ce moyen est fait attraction de ce fiel par l'effort que le Medecin interne fait, tâchant de tout son possible de subuenir aux malades ; C'est pourquoy il enuoye dans l'estomach sa medecine ordinaire ou saouon, pour nettoyer, mondifier, & ietter hors ce tartre : mais ce tartre estant attaché & adherant, & ne se resoluant que peu à peu, voilà pourquoy les vomissements & les deiections inferieures

La putrefaction du tartre cause antecédente du *cholera-morbus*.

font si frequents, lesquels sont teints de ce fiel ou bile. De là plusieurs ont iugé que la bile estoit la cause de ce mal se ruant plustost (comme les chiens) sur la pierre qui les a frappez, que surceluy qui la leur a iettée. Le fiel de soy n'est point nuisible à l'homme, mais le tartre est toujours nuisible, il faut donc plustost imputer la cause de ce mal au tartre, qui se putresfant dans l'estomach par la chaleur est fait attraction de la bile, laquelle y est enuoyée pour modifier l'estomach, & chasser hors le tartre qui y est nuisible. Ce mal continuë iusques à ce que le tartre ayt cessé sa putrefaction & digestion, ou iusques à ce qu'il soit chassé ou dompté, comme le sel de tartre vulgaire est dompté

Le tartre
est toujours
nuisible, la bile
ou fiel
non pas
toujours.

des maladies d'Obstruction. 149
par l'esprit de vitriol.

Cette maladie ne peut estre guarie par le medecin externe que par deux voyes, à sçauoir en chassant & purgeant le tartre, ou corrompant sa force.

I'ay fait sortir à plusieurs tra-
uaillez de cernal, des morceaux Observa-
tion.
de tartre, semblable presque à
des roques de hareng ou carpes,
dont puis apres ils receuoient
guerison, quoy qu'auparauant
ils fussent delaissez pour morts
par les Medecins qui les trai-
toient; ce qui estonnoit fort de
tels Iuges.

Ainsi voila l'abus qu'apporte
la simple foy en la Medecine,
s'asseurans seulement à ce que tels
ou tels en ont escrit. Il faut aussi
estre Medecin par les trois co-
lomnes cy-dessus, afin de voir si

L'abus
qu'apporte
la simple
foy en la
Medecine.

Hipocrate, Galien & les autres
disoient vray & de quelle façon
il les faut entendre.

Des fieures de l'estomach.

CHAP. V.

C'Est vne grande erreur
d'accuser les humeurs de
nostre corps d'estre la cause des
fiéures. Car de soy les humeurs
sont bonnes estans de la com-
position del'homme. Mais com-
me il n'y a aucun arbre, tant sain
puisse-il estre, qui à tout le
moins vne fois l'an ne se purge
de quelques excremens: Aussi
les humeurs tant excellents puis-
sent-ils estre, contiennent toute-
fois quelques excremens. Cet ex-
crement contient deux choses, à
sçauoir *tartarum cruoris*, & *feces
tartari*. Si le tartre se coagule, il

cause vne maladie particuliere,
 & les feces vne autre; si elles se-
 iournent, soit dans l'estomach ou
 ailleurs, & qu'elles y souffrent pu-
 trefaction. Le *tartarum peregrin-*
um ou feces & excremens de l'a-
 liment, dit *stercus*, peuuent aussi
 estre la cause des fievres. Si les vns
 ou les autres de ces tartres ou ex-
 cremens se pourrissent, il s'enle-
 ue vne vapeur mauuaise, laquelle
 infecte l'illeide ou l'air de nostre
 corps, lequel ne peut souffrir d'in-
 fection, c'est pourquoy il tasche
 tousiours à se mondifier (car l'air
 est vn element interne du corps
 & parfait, & de soy n'est point
 impur, l'impureté qui se mesle
 avec luy, vient de la putrefaction
 des tartres ou du *stercus*, d'où
 s'esleuent des vapeurs qui l'in-
 fectent) ainsi infecté qu'il est.

D'où vient
le tremble-
ment &
frisson aux
fièvres.

il tâche à se modifier ; que s'il
treuve les pores reserrez, & ob-
struction, *concutit corpus*, il agi-
te le corps, d'où vient le trem-
blement (*sicut terra-motus*) lequel
dure iusques à ce que cette va-
peur soit consumée, ou que tel
air infecté aye treuvé issuë: mais
auant qu'il sorte, qui est au com-
mencement du paroxisme il se
circule, & voltige vers l'esto-
mach. De là vient qu'on y sent
des compressions, tantost gran-
des, quelquefois mediocres, enfin
cet air, comme vn corps penetra-
ble qu'il est, entre & penetre dans
les veines, arteres, & aussi par tout
le corps, emportant avec soy
l'infection sulphurée, ou mixte;
c'est à dire les vapeurs qui s'esle-
uent de la putrefaction des feces
du tartre ou *stercoris*, & ainsi

acheue sa mondification par tout le corps, ce qui ne se fait point sans chaleur, car aucune coction ne se fait sans chaleur; cet air infecté & eschauffé, & la chaleur engendrée par le grand mouuement & tremblement allument l'esprit du sel balsamique del'hóme, le consumét & le destruisent, si on n'y remedie. Plusieurs disent & enseignent aux Academies que la fiéure est vne chaleur contre nature allumée au cœur, ô la belle definition! selon cette façon ils font de pareilles cures, tel est l'arbre de mesme le fruit.

La raison pourquoy en esté le tremblement ne dure pas si long-temps, est que le corps est plus ouuert, & partant l'air a vne plus prompte issue, car le

tremblement ne vient que de la violence que l'air fait à sortir, à cause de l'obstruction, *sicut terra motus*, & partant ne treuvant aucune resistance ne fait point de violence à sortir.

Ce tremblement dure plus ou moins de temps, selon la saison, selon l'obstruction des pores, & selon la quantité & nature de la matiere qui se pourrist. Quant à ce que les anciens ont dit que les paroxismes intermittens viennent de la putrefaction des humeurs du corps de l'homme, c'est erreur, car les humeurs ne se pourrissent qu'en la lepre ou en semblables maladies, qui est lors que le baume radical des humeurs perit, il est bien certain que les fievres viennent de la putrefactio, mais c'est des feces du tartre.

Tu peux demander pourquoy les fievres intermittentes ont leurs periodes differents, comme tierce, quarte & quotidienne. Il faut te resouuenir que i'ay dit & enseigné au 1. Liure, que toutes choses sont composees de sel, soulfre & mercure, lesquelles 3. substâces sôt différentes. Quand donc la fièvre procede de la putrefactiô des feces du mercure, la digestion s'en fait tous les iours, quand c'est du soulfre, le troisieme iour, & du sel le quatriesme iour. Cela est fort facile à iuger, parce que le Mercure est plus volatil que les autres, il est plus facile à se putrefier & à s'esleuer, le soulfre apres, finalement le sel est plus fixe, & aussi la quarte qui en est engendrée est plus fixe, & de plus de durée, & plus difficile à digerer

Comment
se fait l'in-
termision
aux fievres.

& à chasser; les Medecins qui ne sçauent pas au vray de quoy elle est engendrée, & se doutans neantmoins que c'est d'une matiere plus fixe que les autres, ont dit que c'est *ex facula terrestri*, qui n'est pas beaucoup s'esloigner de la verité, non plus que dire que la tierce est de la bile, & la quotidienne de pituite, s'ils prenoient ces choses pour excrements des humeurs, & non pas les estimer, humeurs mesmes: car comme i'ay dit, les humeurs ne se pourrissent qu'en la lepre ou en semblables maladies, elles sont dites erratiques, quand il y a mixtions des feces du mercure, ou du soulfre ou du sel, soit de deux ou des trois ensemble.

Signes pour reconnoistre les

fièvres de l'estomach premiere-
ment, iajoit que les malades
ayent vne grande chaleur, ils
ont neantmoins peu de soif, &
boient peu, ils sont chagrins,
pareilleux, sont vains, lâches
& languissans, ont de la peine à
marcher, sentent des picqueu-
res & compressions en l'esto-
mach, ont des rapports mau-
vais en la bouche, comme œufs
puans, des nausées & desirs de
vomir, & ont peu d'appet-
tit. Voila la plus grande par-
tie des signes des fièvres de l'e-
stomach, procedantes de la
putrefaction des feces du tar-
tre. Signes pour connoistre
quand ces fièvres viennent des
feces du mercure, est quand le
vin est à degoust aux malades
plus que d'ordinaire. Quand

c'est des feces du soulfre ils vomissent, & ne rendent presque autre chose que ce qu'ils ont mangé. Finalement quand c'est des feces du sel, ils ont vne grande ardeur avec aigreur, qui leur vient souuent en la bouche, & aussi qu'ils sentent en l'orifice superieur de l'estomach.

La cure.

Pour la cure, il faut desoppiler, mortifier ou chasser les feces qui se putrefians causent cette fièvre. Hipocrate dit que les vomissemens du commencement, secondemét les purgations par bas guerissent ce mal, la verité de l'experience confirme son dire, quelque opposition que la secte des Pharisiens puisse former contre.

Des maladies des intestins causees par
l'obstruction du tartre.

CHAP. V.

QUand l'estomach a fait la digestion , ou à tout le moins son possible , & le tartre passe avec le *stercus* dans les intestins , duquel se separant , & qu'il s'y coagule , il s'y augmente quelquefois en quantité , & y forme des pierres : tellement qu'il bouche & oppile le passage ; en sorte que le *stercus* ne peut sortir par bas , d'où procedent de grandes douleurs & fascheux symptomes , comme vn regorgement du *stercus* par la bouche , qui est aussi vn signe tres-certain

que c'est vne pierre aux intestins & la mort prochaine; de grandes douleurs accompagnent encor cette maladie, comme grandes trenchées avec grande douleur de reins & du dos. C'est encor vn signe assuré que c'est vne pierre attachée aux intestins, quand les malades ne peuuent aller à la selle, nonobstant les remedes purgatifs, quand les trenchées estant passées la douleur & pesanteur du dos demeure encor, quand apres auoir beu du vin fort ils sentent vne emotion aux intestins, ils ont de grandes douleurs sans contraction, qui passent souuent & ne sont point fixes, ils rendent quelquefois vne eau iaune par la bouche, sentent vne dureté aux intestins, & des vents comme

me

me d'un tympanites commençant, tous ces signes tesmoignent le tartre estre coagulé aux intestins, lequel opile & bousche le passage des excremens.

Toutes ces douleurs sont excitées & esmeuës par la boisson de vin fort & aigre, par l'usage des legumes, par un grand froid externe, soit d'avoir le ventre trop descouvert durant un grand froid, ou quelquefois pour boire de grands traits d'eau froide ou de la glace dans le vin, &c. si les malades se plaignent avec ce mal, à cause des douleurs qu'ils ressentent en l'estomach, il ne faut croire qu'il soit la cause de cela, car la douleur n'y est que symptomatique. Cette maladie est rare, neantmoins il s'en voit quelquefois

A cause que
tel froid
coagule le
tartre re-
sout par le
chaud.

& est fort perilleuse; c'est pourquoy il faut du commencement y donner ordre en dissoluant & purgeant le tartre.

*De la colique iliaque & contracture
des intestins.*

CHAP. VII.

LA colique iliaque, & contracture de boyaux, qu'on appelle *convulsus*, procedent d'un tartre resout, lequel est aigre & astringent, comme l'esprit de vitriol ou prunelles encor vertes. Cette denomination est prise de la partie où l'on sent la douleur. Mais la matiere de ces maladies est un tartre aigre & resout qui irrite les intestins. Ceux qui attribuent

la cause de ce mal à la bile, se trompent, car encor que la bile passe iournellement par les intestins, n'y cause point neantmoins ces maladies-là.

A proprement parler, colique & iliaque, sont contrâctures de boyaux, dont approche fort ce mot de *conuulsus*. Voicy comme cette maladie se fait: Le tartre, matiere de la contrâcture des boyaux est grandement astringét. C'est pourquoy par son astringtion il reserre les boyaux, dont le *stercus* estant là renfermé, par la chaleur interieure se conuertit en air ambient, lequel ne treuve pas libre issuë, à cause de la constipation qu'a fait le tartre resout; c'est pourquoy ainsi infecté, tant par l'acidité du tartre, que de la matiere d'où il est sorty,

irrite les intestins , & les fait se retirer & reserrer, comme feroit l'eau forte ou esprit de vitriol si on le mettoit sur vn nerf , ou comme on voit que le souffre estant conuertty en air, s'il est humé par le poumon , on en souffrira de la contraction en cette partie-là. De mesme l'air ambiant rendu acide & pontique par l'aigreur du tartre & de l'excrement stercoré pareillement conuertty en air, venant à toucher les intestins , les point & irrite, de là ces grandes douleurs sont engendrees.

Les personnes subietes à telles maladies sont tesmoins de la grande acidité & corrosion de ce tartre resour , lequel ils sont contrainsts quelquefois vomir par l'irritation qu'il fait au

ventricule, voire mesme il vlce-
re la partie par où il passe, comme
si c'estoit eau forte.

Que le stercus se conuertit
en air, ceux lesquels sont con-
traincts, par quelque occasion,
de reserrer leur boyau, au temps
que le desir se presente de le vui-
der, aideront à confirmer mon
dire, eux-mesmes esprouuans à
leurs despens que le *stercus* ainsi
retenu se conuertit en air & en
vents, qui leur causent souuent
de grandes trenchees & douleurs
au ventre, & la preuue que cet
air est astringent, est qu'a-
pres vne telle retenue d'excre-
mens ils ont le ventre reserré
auec trenchees, pourueu qu'au-
parauant ils n'eussent pas prins
medecine ou autre chose qui leur
causast ce desir.

Maintenant il faut voir que deuient cet air acide & pontique apres qu'il a fait la contracture des boyaux, que l'on appelle, ou colique, ou iliaque, &c. selon la partie qu'on juge estre affligee. Cet air cherchant issue, n'en treuve point de plus libre que de sortir par l'estomach, où il cause de grandes douleurs, tantost par vomissements, & souvent accompagnez des rots autant aigres que du vinaigre distillé, voire quelquefois plus. Que si cet air ne sort par l'oesophage, & que sur cela on baigne le malade, par le moyen de ce bain, lequel ouure les pores, cet air acide est porté au foye dans les veines & arteres, de là par tous les membres, dont il cause contracture aux parties où il se

Le bain contraire à la contracture causée de colique.

Comment se fait la contracture aux membres, par la colique.

coagule , ou adhere , s'il ne treuve là vne grande douceur (laquelle prouient du phlegme ou mercure) qui adoucisse & corrompe sa violence. C'est aussi pourquoy en telle maladie les remedes lesquels desoppilent, ne conuiennent, si tels n'ont aussi la puissance de rompre la force de ce tartre ou de l'air qui en procede, & aussi l'excrement conuertty en air.

Si cet air s'attache aux nerfs, tendons, ligaments, &c. il y fait la contracture.

Quelquefois cet air est si puissant qu'il dissout les chairs, calcine le baume ou humide radical, d'où viennent les maladies à dissolution, comme diarrhee, phthisis, flux trepatique, &c. ainsi

qu'il se voit en l'anatomic de l'urine.

Les signes ordinaires de telles maladies , sont de grandes trenchées avec le ventre reserré, de grandes douleurs à l'espine du dos & aux reins, oppressions de la poictrine, & naulces contre le manger, les membres comme engourdis & la voix debile, &c.

La doctrine des quatre humeurs ne peut donner à connoistre cette maladie dès son fondement, ses aduocats disent que c'est vne humeur bilieuse , acre, laquelle eschauffe & corrode les intestins. Et à cause de cette chaleur, il faut saigner tant qu'il y a chaleur : c'est à dire iusques à ce que le malade soit mort : car par de tels remedes il ne rafrais-

chit point iusques à ce temps-là. Mais telles gens ne confiderent pas que la bile de foy ne corrode point, autrement toutes les Icteries, qui sont si iaunes par tout le corps (à cause de cette bile) qu'il semble qu'ils ont esté dorés exprés; seroient tous corrodes, rongez & bruslés par tout le corps: & au contraire on voit que le plus souuent ils sont sans fiéure.

Il faut donc conclure que la colique, iliaque, &c. sont contractures des boyaux, causees par l'acidité pontique & astringente qui s'eleue du tartre resout, puis par son astringtion reserre les intestins: d'où vient que le *stercus* se conuertit en air, & acquiert (avec l'acrimonie qu'il a de si mauuaise, accompagnée d'une

vapeur sulphuree & maligne) la ponticité & acidité du tartre, lequel air netrouuant point libre issuë, enfle les boyaux, & les demene tant deçà que delà, pressé & poussé par la chaleur; & quand les pores sont ouuerts, cet air penetre le corps, & cause la contraction des nerfs.

Des diarrhees & dysenteries.

CHAP. VIII.

C E chapitre proprement doit estre inseré aux maladies du ventricule. Mais parce qu'Hipocrate appelle ces maladies, & la lienterie, *leuitatem intestinorum*, voila pourquoy ie n'ay pas fait difficulté de les mettre au rang des maladies des intestins.

Chaque medecin ſçait ou doit ſçauoir les moyens admirables de la nature à l'expulſion des excremens, non ſeulement inutiles, mais auſſi nuifibles à la conſeruation de la ſanté de l'homme. Afin d'entendre plus facilement le diſcours ſuiuant, ie dis, & auſſi eſt vray, que la diarrhée prend ſon origine de l'eſtomach. Le deuoir de l'eſtomach eſt de ſeparer le *ſtercus* d'auec l'aliment, & continuer cet office, s'il n'eſt troublé dans ſa temperature: car ſi on le ſurcharge de viandes & breuuiages par excés, ou que ce ſoient des aliments dont il n'a pas accouſtumé de faire la ſeparation, il ſera troublé, & telles choſes luy ſeront comme venin, dont il taſchera à ſe deſcharger, & pour cet effect appellera

sa colochynte, son ellebore, &c. enfin ses forces purgatiues, afin de se liberer de ce qui luy est nuisible : Telles diarrhees seront de la couleur que telles especes de viure peuuent donner. Voila pour vne sorte de diarrhée. Non seulement les Medecins, mais aussi les femmes sçauent assez que l'estomach a diuers appetits; l'un est par indigence de viures vtiles & necessaires pour nourrir le corps, les autres sont desreglez & sans necessité, comme sont appetits, appelez *pica*, dont les femmes grosses, filles, ayans les passes couleurs; hommes cachectiques sont souvent affligez, appetans manger de la craye, charbon, plastre, especeries, cuirs, &c. Toutes ces choses de soy ont peu d'aliment;

Appetits
desreglez
de l'esto-
mach.

Nota.

mais beaucoup de venin; & toutefois les estomachs qui les appetent, en tirent de l'aliment, en vivent, & s'y delectent; ce qu'ils ne pourroient pas faire en vn autre temps qu'ils ne l'appeteroient pas, mesme on rend plus malades les personnes qu'on priue tout à fait de tels delices (ce qui authorise le dire d'Hipocrate, qui dit que iagoit que les malades souhaitent choses qui ne leur sont si salubres que d'autres, toutefois parce qu'ils l'appetent il ne les en faut pas du tout priuer, il n'a pas donné les raisons de cela, parce qu'il iugeoit bien que tout Philosophe en trouueroit assez la cause. I'ay veu à Angers vne fort honnestre fille, laquelle mangeoit vne quantité presque incroya-

Belle ob-
seruation

ble de poyure, de clou & gingembre, iusques à plus d'un boisseau la semaine, & en viuoit & ne pouuoit viure d'autre choses. I'en connois aussi en cette ville qui ont le mesme appetit, & d'autres lesquelles mangent & viuent de retailles de marroquin & de vache de roussi. Ils viuoient de ces choses lors qu'elles les appetoient. Quand cette sorte d'appetit a esté destruit ils auoient en horreur les choses desquelles auparauant ils prenoient de grâds delices. Ces choses donnent à cognoistre que les estomacs ont des appetits dont nous n'auons autre cognoissance que quand les personnes demonstrent ce qu'ils souhaitent. Mais tout ainsi que nous voyons exterieurement les appetits dereglez de l'estomach, aussi y en a-il interieurement dont

nous n'auons la cognoissance que par les excrements, & par le defaut des parties de nostre corps consumees par ces appetits dereglez. Car si vn estomach a le desir de viure des humeurs de nostre corps, il les attire à soy, & en priue le corps, de cette priuation vient vn autre maladie, car il priue le corps de sa substance, & partant il defaut & perit.

Priuations

Et lors qu'il desire viure de sang, il l'attire, & priue par ce moyen le corps d'un de ses elements, quelquefois il desire & appete de la graisse, de la chair du mesme corps, quelquesfois des excrements du corps, ou pituite, ou bile, &c. Tout ainsi que ces aliments differēt de couleurs, aussi leurs excrements. De là vient la varieté de couleurs aux diarrhees & dysenteries, m^aque de

D'où vient la varieté de couleurs aux diarrhees.

connoistre ces choses on fait des iugemens fort incertains des diarrhees & dyssenteries : car si on voit de la graisse que l'appetit de l'estomach a attirée, on dit que ce sont des raclures de boyau, & qu'un tel a les boyaux corrodés & vlceréz, & ainsi des autres couleurs. Si tels Medecins consideroient bien exactement que les boyaux n'ont pas tant de graisses pour en fournir presque cinq ou six mois que dure une diarrhée, ils rechercheroient autrement la cause de cette varieté d'excremens; leur iugement est fondé seulement sur opinions. Mais moy desirant voir la verité manifeste de ces choses, j'ay fait ouvrir des personnes mortes de telles maladies, & ay fait commencer depuis

l'anus, & continuer iusques dans l'estomach, & toutesfois ie n'y ay treuue ny vlcere ny raclure, mais bien j'ay treuue toutes ces couleurs dans le ventricule, sans qu'il fust, ny escorié ny ulceré aucunement; les vnes digerées, les autres non, ie treuuois le *vas breue* tout plein de sang noir, le pore cholidoque plein de matiere cômme de patenchyme.

Aux vns le foye estoit diminué de plus de la moitié, & restoit plus leger que le poumon, la rate, le *chistis fellis*, les chairs & graisses presque toutes consumées, dont on voyoit encor dans l'estomach vne portion; comme faussies subtilement broyees & subtilisees comme boulie.

Toutes ces choses bien considerées demonstroient assez que

Que les graisses qui paroissent dans les excremens stercorez de ceux qui sont travailliez de diarrhees ne sont point raclures ny excoriations des boyaux

cette maladie prouenoit d'appetits defreglez de l'estomach, & que ces formes de raclures de graisse & de chairs pilees n'estoiēt autre chose que de la graisse, chair, & autre partie du corps dont l'estomach auoit appetit. l'adiouste encor pour confirmer mon dire, que la chair est vne masse & partie laquelle ne se peut conuertir tout en eau ny en air, voire fust-elle secchee au feu. Quand donc vn homme gros & gras est affligé de diarrhee, en sorte que cette chair & graisse est toute consommee, ne luy restant (comme on dit) que la peau & les os, que deuient cette chair & graisse, puis qu'elle ne se peut exhaler ny conuertir en eau? Quand pareillement vn homme gros & gras a manque

de viure, & qu'il maigrit, que la chair & graisse est consumée; cela est aussi parée que son estomach ayant disette d'aliment extérieur, attire celui du corps, à sçauoir des muscles, chairs, graisses, &c. desquelles choses il se peut faire diminution sans totale destruction de l'animal, afin de subuenir aux autres parties, lesquelles ne peuvent résister ny subsister sans vn continuël renouvellement d'aliments; Ainsi on voit la sagesse & prudence de nature; semblable à vn prudent & economie d'vne ville assiégée, lequel depart également les aliments & viures afin que tous puissent résister.

Au reste il faut considérer que *Nous* durant vn tel appetit, iamais l'estomach ne faiet aucune

bonne digestion des aliments
exterieurs qu'on luy presente ,
parce qu'il est tousiours en-
clin à son desir & appetit de-
praué.

L'estomach n'est iamais por-
té à ces desirs & appetits depra-
uez qu'il n'y soit prouoqué par
d'autres maladies, ou par des vi-
ures qui ne luy sont pas familiers,
& dont il n'a accoustumé de cuire
& separer.

Comme si quelqu'un estant
malade de fièvre, d'ictérie, de
cacochymie, &c. Nature ou le
Medecin interne desirant se des-
charger de telles maladies, en en-
uoye vne partie dans l'estomach
afin de les consumer (c'est pour-
quoy les habiles Medecins ob-
seruent par les excrements la co-
ction & purgation des mala-

Prudence
de la nature
ou Medec-
cin interne.

dies.) Que si l'estomach est fort & puissant, il consume la maladie : mais si au contraire il est debile, & vn tel venin demeurant dedans, il esprouue ce qu'il fera de telles viandes inusitées, & dont il n'a accoustumé de viure. En cet apprentissage il tente plusieurs voyes, afin d'esprouuer ce qu'il fera de ce qui luy a esté donné pour consumer. En fin estant dereglié de sa coustume ordinaire, comme vne femme, laquelle ayant commencé à se desbaucher, s'adonne puis apres à toutes sortes de desbauches. De mesme l'estomach ayant esté vne fois desreglé, continuë en augmentant sa desbauche si on ne l'en retient par des moyens necessaires.

Que la nature enuoye dans

Nature em-
ployé dans
l'estomach
les matieres
des mala-
dies pour
les consu-
mer.

l'estomach les maladies pour les
consumer, Hipocratte l'a tres-
bien obserué, ordonnant la diette
exacte plus ou moins aux mala-
dies selon la nature de la mala-
die, afin de ne donner à l'esto-
mach diuerfes viandes à consu-
mer, les vnes, les matieres des ma-
ladies, les autres les aliments ex-
terieurs. Par là il tesmoigne auoir
bien reconnu que nature em-
ploye l'estomach à consumer les
maladies, & qu'il ne le faut
troubler de cette besongne &
travail par yne surcharge de vian-
des. Pleust à Dieu que ceux qui
se disent sectateurs d'Hipocratte
employassent le temps (qu'ils
consument inutilement en des
questions friuoles) à aprofon-
dir & sonder les intentions &
dits de ce grand personnage,
ils ne feroient pas de si lourdes

fautes en la Medecine, & ne seroient la cause qu'à present cette diuine profession soit si fort mesprisée & vilipendee.

Les viures desprauez & non accoustumez voire de surcharge, causent aussi cette maladie : car l'estomach se desbauche aussi bien pour ces choses inusitees, que pour la matiere des maladies qui luy est donnée pour cuire & consumer; l'un & l'autre luy estant venin.

Quelqu'un pourroit obiecter contre ce que j'allegue & demostre, disant que les diarrhees & dysenteries procedent de cruditez. Mais tel mostreroit son ignorace, n'aperceuant pas que les choses cruës & indigestes ne sont point excremés, mais seulement la mesme chose qu'elles estoient auparauāt

qu'entrer dás l'estomach. De plus il paroist bien que la coction & separation a esté faite : car ces excremens ne ressemblent plus aux aliments dont ils sont separez : partant la diarrhee ne commence qu'apres la separation , mesme aussi les choses cruës ne contiennent aucune vertu purgatiue , il faut qu'ils se separent & s'ouurent afin de demonstrier & faire paroistre leur puissance, ce qui ne se peut demeurans en leur crudité. Maistel qu'est l'ouurier, pareillement l'ouurage. Car la pluspart de ceux qui discourent & iargonnent de cette maladie avec des termes Grecs & Latins, ampoullez & bouffis, monstrent bien par la fin qu'ils ne la connoissent pas, puis qu'ils ne la sçauent guerir.

La parfaite cure de cette ma-

● ouurier
est connu
par son ou-
urage. Ainsi
le Medecin
par la gue-
rison.

ladié, est d'oster & arracher de l'estomach, ses appetits desreglez, & luy rendre son appetit naturel (quand on reconnoist que cette diarrhée n'est point vne coction & digestion d'une maladie plus grande,) autrement il faudroit aider à l'estomach, & considerer si les purgatifs interieurs dont il se sert ne sont assez puissans, afin de luy en donner d'exterieurs & d'artificiels. C'est ainsi qu'on guerit ce fascheux mal, & non pas à l'auenture, comme malheureusement plusieurs tentent par leurs imaginations & opinions sans fondement ny raison. La saignée, le laiët d'anesse, le syrop de roses & de coing sont tous leurs remedes pour cet effect.

*Des maladies du mesentere causees
par Obstruction.*

CHAP. I X.

L'Anatomie monstre que le mesentere est la situation des veines mesaraïques, l'office desquelles est d'attirer le chyle & l'aliment descendu de l'estomach dans les intestins pour le porter dans le foye. Si l'aliment contient vn tarte resout, lequel passe mixtement avec luy dans les veines, puis apres qu'il se separe & se coagule dans le mesentere, il y fait obstruction bouschant ces veines. Delà vient que l'auenüe & passage des viures est empesché, par ce moyen le foye est priué de sa nourriture, non seulemēt pour luy, mais aussi pour tout le corps; Delà arriue que n'ayant plus de

substitut pour reparer le baume radical qui continuellement se perd, ny de mercure pour moderer la chaleur du soufre, tout le corps souffre une petite fièvre lente laquelle s'augmente de iour en iour, & desseche le reste de l'humide radical, cela oblige nature (laquelle tasche de conseruer l'espece tant qu'il luy est possible) à donner de l'appetit à l'estomach, d'attirer de l'aliment des autres parties mieux fournies, & afin d'en faire part aux autres, priuées d'aliment, ainsi *manducat seipsum corpus*, le corps se mange soy-mesme, C'est cette maladie que nous appellons *tabes & aridura*.

Comment
se fait la
fièvre lente
aux hecti-
ques.

Il arriue aussi souuent que ce tartre se ferme & se pourrist; ce qui ne peut sans chaleur, laquelle fait attraction de bile & de sang

Comme se
font les ab-
cès & vlce-
res au me-
sentere.

en cette partie-là, dont se fait vn combat par l'antipathie, du tartre aigre & de la bile amere (ainsi qu'en la mixtion du tartre & de l'esprit de vitriol) ce combat augmente la chaleur & la putrefaction dont il se fait absces au mesentere, & en suite vlcere. Quand quelqu'un se plaint d'une dureté & douleur au mesentere, & une chaleur en la partie mesme, alors il faut iuger que le tartre se fermente.

Quelquefois les duretez sont inegales, & fort sensibles & douloureuses; alors il est temps de donner ordre à purger ce tartre, autrement il est en danger qu'il ne se face absces & vlcere en cette partie-là. Ceux-là errent grandement lesquels veulent laisser

faire la fermentation ou coction de ce tartre, car si cela est souvent dangereux exterieurement, à plus forte raison interieurement. Cette obstruction du tartre coagulé peut encor causer d'autres grandes maladies: car si ce tartre est nitreux, la fermentation en sera plus lente, la douleur moins sensible, mais aussi il causera des maladies longues, comme escroüelles, si d'un autre tartre, des douleurs de teste par l'elevation des vapeurs de cette fermentation, des epilepsies symptomatiques, catharres, &c. Cette maladie est de grande consequence, & toutefois aisée à guerir du commencement, quand on y procede comme il est requis. Mais, ô chose pitoyable! à present ceux qui croyent sçavoir tout, se fon-

La saignée
fort peril-
leuse à ce
mal, dont
plusieurs
pechent en
la prati-
quant.

dans sur leurs opinions imaginal-
res, augmentent ce mal au lieu de
le guerir, car en mesme téps qu'ils
iugent & aperçoient qu'il y a vn
peu de fièvre (laquelle n'est que
symptomatique & accompagnât
toufiours ce mal) font saigner le
malade, d'ot par ce moyen la fièvre
redouble, & eux s'obstinent &
redoublent plus fort la saignée,
ne considérâs pas que cette fièvre
ne vient que par le manque d'ali-
ments: que le foye n'a pas sa pi-
tance ordinaire, qu'il manque de
mercure de vie, & partant le
sulfre (lequel n'est pas si volatil
que le mercure) reste seul lequel
consume & brusle peu à peu n'e-
stant point refrené par vn nou-
veau mercure. Quand ils voyent
que la saignée est inutile, & qu'ils
ont presque tout espuisé la meil-

Leur liqueur du corps, le mercure de vie, ils ont recours aux iuleps rafraichissans, lesquels augmentent davantage l'obstruction, car cet artre ne se coagule que par le froid.

Puis quand les malades se plaignent de l'augmentation de leur mal, les Medecins ignorans la cause de ce mal, releguent les malades à leur plus souverain azile, à sçavoir aux medecines femelles, les asneffes; On voit telles medecines tous les matins faire leurs visites, dont elles sont payees de coups de bastón, trois ou 4. s. pour le recteur qui les conduit, & plusieurs testons pour celui qui donne ce chatitable aduis, mais à la fin inutile, parce que *semper latet anguis in herba*, le mal va toujours en augmentant.

Et afin de n'assister à la mort des malades ils les enuoyét finir leurs iours aux eaux minerales, qui du commencement leur auroient bien profité, mais c'est apres la mort le Medecin. La cure de cette maladie & de ses symptomes, comme fièvre lente, &c. est de desoppiler & purger le tartre coagulé dans le mesentere, ce que les iuleps rafraischissans, ny la saignée, ny le lait d'anesse ne feront iamais. *Ergo* recours aux Samaritains, c'est à dire aux vrais Medecins, qui n'ont pas tant de vanité que les autres, mais guerissent les malades.

Les reme-
des rafraif-
chissans ne
valent rien
pour la cu-
re de ce
mal.

Des

Des maladies du foye.

CHAP. X.

16

LE foye est formé en l'homme pour sanguifier l'aliment, c'est à dire le preparer & purifier afin qu'il se puisse assimiler, & estre fait animal. Si l'homme est engendré d'une semence pure & bonne, purgée de l'arsenic du sang menstruel, & qu'il n'y aye point de defect ou vice en la cōformation, le foye d'un tel fera par consequent son office & son deuoir pour lequel il est destiné, & cōtinuera cet ordre s'il n'en est empesché & destourné par quelque ennemy. Il est bien vray que ce foye attire quelquefois son ennemy, lequel puis après il

N

ne peut chasser, car s'il est rapide (comme il est ordinairement aux goutteux & graueleux) il attirera l'aliment impur, lequel se separe dans luy (le tartre ou excremēt separé se coagule dans ses cellules ou chaors:) que si ce foye ne le chasse par ses emonctoirs, il cause plusieurs especes de maladies, selon la quantité de ce tartre, selon sa nature & selon sa digestion & putrefaction, comme absces & fistules au foye, pierres, sable, ou grauiers, &c. choses assez & trop frequentes, sans parler des autres maladies hors la masse du foye, & neantmoins causees par le tartre coagulé & putrefié dans le foye, comme ulceres, fistules, pustules & sable qui s'accumule par petites parcelles au visage, & quelquefois aux

autres membres : il seroit ennuyeux de reciter toutes les maladies qui procedent de ce vice.

Que si le foye est naturellement petit & debile, ou bien foible par accident, & qu'au contraire l'estomach aye beaucoup d'*acetiſeſurinum*, cet estomach appetera beaucoup d'aliment, disproportionné à la force & chaleur de ce foye, tellement qu'il sera suffoqué par vne telle surcharge, il ne fera point de coction parfaite, tout l'aliment mesme sera excrement, il ne fera aucune separatió : de là viendra vne inanition vniuerselle, vne constipation des pores, l'ileide ne se pourra recreer & rafraischir, vn tel defect sera la source & origine de quantité de maladies, comme fièvre lente, cachexie, hydrop. leucophleg. &c.

Je t'aduertis sur ce suiet que tu te prenne bien garde de ne saigner en telle occasion, nonobstant la fieure, car tu augmenterois le mal au lieu de le diminuer; c'est à present vne grande faute en la Medecine que commettent plusieurs inconsiderement saignans, dont puis apres les malades payent la fole-encherre, perdans la vie auec leur sang. Il est bien vray que la saignée est vn excellent remede donné à propos, mais en cecy perilleuse.

Tu peux assez iuger par ce que dessus, que le foye est la cause antecedente de plusieurs maladies, & que le tartre ou excremēt est la matiere des maladies, iacq̃oit que le foye, ou soit grand & fort, ou qu'il soit debile, de soy il ne cause point la maladie, si on

ne luy en fournit & baille la matiere, il est seulement l'architecte: car si à vn grád foye & chaud lequel cuit & attire beaucoup de chyle, on ne luy donne que de bons aliments, & qui contiennent peu de tartre, asseurement il causera peu de maladies. Comme aussi si on donne au foye petit & debile vn aliment proportionné à sa foiblesse & delicateſſe, il s'exercera sans peine à le cuire & separer, & en rapportera vn bon fruit. Par conſequent les maladies qui arriuent au foye, ſoit qu'il ſoit grand & fort, ou ſoit petit & debile, procedent par l'obstruction du tartre & excrements, non ſeulement au foye, mais aussi aux autres parties voisines & annexees à luy, qu'on appelle la region du foye. Toutes

Le foye ne dōne point la matiere des maladies, mais est l'architecte qui les forme de la matiere qui luy est enuoyee.

les obstructions du foye viennent du tartre, soit en la masse du foye, soit aux veines, au sang, aux voyes qui passent par le foye, en la chair & muscles qui sont entre les costes, ou en fin en la region du foye. Il y a deux sortes d'obstructions, l'une est causee par la substance du tartre, l'autre est de l'air, car l'air, est *Illeidos cælum sine chaos hominis*; c'est à dire, *Spiritus qui transit per omnia membra*, Esprit qui penetre par tout le corps. Que si cet air est reserré par l'obstruction du tartre, il s'engroffit d'auantage des qualitez du tartre resout, en sorte qu'il ne peut plus librement transpirer: c'est pourquoy estant diffus & ambient, & se circulant deçà que delà au lieu où il est enfermé, cherchant tousiours à

La cause
des flatu
& douleurs
aux regiõs
du foye.

se purifier, y cause des *flatus* par la rarefaction, pestes, pleuresies, &c. selon l'espece du tartre resout qui se meslera' avec.

Car si le tartre se pourrit, il se conuertit en air (faut entendre vne partie, car la terre ne s'y conuertit pas) comme on voit le soulfre se conuertir en air lors qu'il brusle, ou plutost comme le fient de cheual lors qu'il se putrefie: si l'air qui de soy est element leger, & qui a accoustumé de se recreer & purifier continuellement, est reserré & renfermé par l'obstruction, *Transit in secundam generationem & fit spissus*: Il se corrompt & deuiet impur & s'espaissit, à cause du tartre conuerty en air grossier qui se mesle avec, & par ce moyen cet air est infecté,

acquerant le vice de ce tartre, dont puis apres il cause les maladies, d'autant plus aiguës qu'il est plus subtil & veneneux.

La cure de ces maladies est de desoppiler.

Des fievres du foye.

CHAP. XI.

LA fievre est vne chaleur engendree dans le foye par la putrefaction du tartre, tout ainsi qu'en l'estomach s'engendrent les fievres par la putrefaction du tartre, de mesme ils s'engendrent au foye. Durant cette putrefaction il se fait ebullition, de laquelle s'esleue vne vapeur mauuaise qui infecte l'air, lequel tasche & s'efforce à se mondifier,

ne pouuant souffrir librement
cette infection, mais treuuant de
l'empeschemēt par l'obstruction Comme se
fait le trem-
blement
aux fieures.
des pores, *concurit corpus*, il secouē
& esmeut le corps, & cause ce
tremblement, qui dure iusques à
ce qu'il aye fait sortie & issue
pour se mondifier. Tout ainsi
qu'un vaisseau plein de sang,
lait, vin, ou d'autre telle chose,
estant sur le feu & bousché exa-
ctement bien, se romproit & se
casseroit, ou à tout le moins il
s'y feroit un grand effort, si on ne
luy donne de l'ouuerture. De
mesme dans le corps de l'homme
affligé de la fièvre, vient le trem-
blement, lors que l'air se rarefie
& s'esleue par la chaleur causée
de la putrefaction du tartre, &
dure ce tremblement iusques à
ce que l'air aye fait ouuerture

des pores, & qu'il aye treuueé issuë. Reste puis apres la chaleur causee, tant par la digestion & putrefaction du tartre, que par le grand mouuement & agitation qu'il a fait par tout le corps, se faisant ouuerture & passage, dõt puis apres est allumé l'esprit sulphureux, tant des veines que des arteres, voire mesme cette chaleur rarefie & conuertit le mercure en air, lequel aussi fort en sueur, lors que l'illeide a fait ouuerture & débouché les pores: il ne faut pas croire que toute la sueur soit la matiere qui cause la fièvre, ains c'est le mercure, qui par la chaleur a esté separé de la composition du corps, lequel puis apres est fait *tartarum cruoris* & excrement; ce qui se prouue, parce que telle sueur aux fièvres intermittentes

affoiblit le malade, & n'en reçoit aucun foulagement, & dure cette chaleur iufques à ce que toute la digestion foit paracheuée, ou que l'on aye diminué, purgé ou corrompu la force du tartre.

Ce tartre eft coagulé dans le foye apres qu'il eft féparé de l'aliment; s'il n'eft incontinent (apres la féparation) attiré des reins ou chaffé par les emonctoires à ce destinez, & y demeure iufques à ce qu'il fe refolue par putrefaction. De là il eft aisé de iuger que la matiere de la fièvre eft vn tartre: Il ne faut donc pas s'imaginer que la fièvre foit vne chaleur de foye simplement, ny que la matiere de la fièvre foit de qualité chaude neceffairement, car le tartre fe coagule manque de chaleur, s'il en auoit affez il

Il n'est pas
vray que la
matiere du
tartre, dont
est caufée
la fièvre, soit
toufiours &
neceffaire-
ment chaude

ne se coaguleroit pas; comme on voit que l'eau de vie & eaux fortes, &c. ne se coagulent iamais par le froid, quelque violent qu'il soit. Cette chaleur au tartre est estrangere & acquise, comme pareillement elle arriue dans vn monceau de pauot, mandragore, iusquiamme ou autres choses froides, voire fust-ce au profond de l'hyuer, & si violente qu'à peine on y peut tenir quelque temps la main sans estre par trop incommodée de cette chaleur estrangere. Il faut donc conclure que la chaleur de la fièvre vient par la putrefaction du tartre.

Belle observation,

La cure des
fièvres.

La guérison des fièvres par consequent est la desoppilation en chassant & purgeant les tartres selon leurs especes, car elles sont différentes : les vns de ces

tartres se resoluent par vne sorte de remedes, les autres non ; c'est pourquoy il faut connoistre la difference de ces obstructiós. Generalement aux fievres du foye il faut aduancer la coction des tartres, & la purgation d'iceux , autrement tentans seulement de pallier la chaleur, la cause demeure tousiours & se coagule dauantage, dont puis apres s'ensuiuent plusieurs maladies tres fascheuses & perilleuses, comme absces en la partie, hydropisies, vlceres, &c. voila ce qu'apporte les trop frequentes & inconsiderées saignées, lesquelles vütees à propos sont excellentes.

Quant aux fievres lesquelles sont si obstinées que les remedes qui desoppilent n'y seruent de rien, & qu'au contraire vn simple

caractere imaginaire ou quelque autre amulette les guerit, telles fievres sont engendrées, *ab ascendente & à celo hominis*, & fabriquées par la singerie de l'Archée, comme il sera dit ailleurs.

De l'hydropisie du foye.

CHAP. XII.

L'Hydropisie, qu'Hipocrate appelle *aquam intercutem*, est vne resolution en humide, du sel alumineux & coagulatif du corps de l'homme. Il faut observer que l'homme a son Ciel & ses astres, tout ainsi que dans le Ciel du grand monde *sunt stellæ nivales, pluviales, hyemales, &c.* De même le petit monde de l'homme a ses astres, lesquels operent en luy, tant pour la santé que pour les

des maladies d'Obstruction. 207
maladies & restauration. Quand
dóc le temps humide predomine
en l'homme, viennent les deflu-
xions, catharres, &c. quand les
mois de resolution dominant,
l'homme se refout en liqueur, c'est
à dire le sel alumineux qui cõgele
& coagule l'homme, d'où viēnent
les hydropisies. Ces choses arriuent
naturellement en l'homme selon
le cours & puissance de ses astres,
auquel le Medecin peut resister,
comme il est dit que *vir sapiens do-
minabitur astris*. Je feray encor
mieux entendre la procedure de
nature (en la procreation & ge-
neration des hydropisies) par l'e-
xemple suiuant.

Comme on voit par les opera-
tions exterieures que le sel, apres
qu'il a esté calciné, est bien
plustost resout en liqueur

durant vn temps humide , s'il n'est conserué en lieu chaud & sec.

Reduction.

De mesme apres vne fièvre, laquelle a comme calciné le sel conseruatif de l'homme , ce sel se resoudra plus facilement en liqueur, si le corps est par trop refroidy & humecté; soit par les trop frequentes saignées ou autrement ; & ainsi resout qu'il est s'il n'est chassé & vuidé comme excrement, il cause l'hydropisie, leucophlegmatie ou ascités, &c.

Comme se font les hydropisies.

Les hydropisies arriuent aussi apres que le foye a esté debilité par trop frequentes saignées, par longues fièvres, par grandes hemorrhagies, ou &c. par ce moyen ayant peu de chaleur, il ne peut transmuier l'aliment & le sangifier; c'est pourquoy demeurant
crud

crud & impur, tant dans le foye que dans les veines demeure mixte avec le sang, & est porté avec luy par tout le corps, se séparant quelquefois peu à peu dans les chairs, où il fait la leucophlegmatie qui dure iusques à ce que le foye aye repris sa chaleur pour dissiper cet humide.

Quand à l'hydropisie ascites; elle est causée par la resolution du sel alumineux. Ce qui se fait *Quando natura aberrat in coctione.* Quand nature ne fait pas son deuoir en la coction & separation, soit par la faute des viures, lesquels contiennent vn tartre grossier, lequel se coagule d'as le foye de sia debile, & luy oste & diminue encor ses forces, ou soit qu'apres de grandes euacuations l'estomach appete beaucoup de

viures, pour subuenir au deffaut de l'humide radical; diminuë, & puis ces aliments dans le foye debile, ne peuuent estre digerez & transmuez, ains demeurent cruds & indigestes dans le foye, lequel puis apres les reiette & les enuoye dans les reins pour là estre paracheuée la troisieme coction, lesquels aussi refusent ces aliments rendus excrementeux à raison de leur crudité, & de ce qu'ils ne sont elabourez au point qu'ils doiuent, d'où vient qu'ils regorgent en partie dans le foye, lequel cherchant vne autre voye pour s'en descharger, se purgent d'iceux, par transsudation & par anastomose, tombent entre le *zirkus* & l'*omentum*.

La differen.

La difference entre l'*ascites* &

l'*anasarca*; est qu'en l'*ascité*s le sel ce de l'asci-
tes & de
l'*anasarca*. radical se resout tout iusques à ce que faute de conseruateur la mort ensuiue (si on n'y remédie) En la leucophlegmatie; il ne se resout pas tout à fait, mais au lieu de sang parfait & bien cuit que le foye doit distribuer par tout le corps, ce n'est qu'un sang crud & indigeste; lequel à la fin le cuiët, le foye reprenant ses'forces: & de là les malades guerissent.

La cure del'hydropisie est de desoppiler le foye en le fortifiant, rafermir & retenir le sel radical; & purger les eaux; cause conioincte, comme il sera dit en la cure des maladies.

Il y a plusieurs autres maladies qui peuuent arriuer au

foye , comme absçés fissures ,
vlcères , erisipele , tumeur
mercurielle , &c. lesquelles
sont causees toutes par obstru-
ction, dont mon but n'est d'en
parler, veu qu'elles se rapportent
toutes à la cure des maladies tar-
tareuses, comme il sera dit en son
lieu, ou chacune sera particuli-
sée, & puis ie pose que tu seras
philosophe & alchymiste lors
que tu entreprendras la cure des
maladies, c'est pourquoy ces indi-
ces presents te donneront assés de
connoissance pour les autres.

*De la pierre, sable, ou gravelle des
reins & de la vessie.*

CHAP. XIII.

SI le tartre n'est point sepa-
ré dans le foye, ains lors que

paracheuant sa coction dans les reins, il s'y separe & coagulé, il fait la pierre, sable ou grauiier aux reins, parce que *Spiritus salis arripit hunc tartarum vrinae*. L'esprit de sel coagule le tartre de cette vrine, & le coagule diuersement selon la matiere dont il est separé. Car si quelqu'un boit ordinairement ou souuent d'une eau qui se petrifie: c'est à dire de laquelle se forment des pierres, si le tartre de cette eau se coagule dans les reins, par consequent il sera de la nature de pierre, si de mesme c'est une eau qui contienne du bol, de l'argille le tartre coagulé sera de cette nature, à celuy qui boit du vin elle sera de la nature de ce vin (sans parler des autres choses qui se meslent avec: car rarement ce tartre est simple)

& ainsi de toutes autres choses.

Tu pourras demander, pourquoy tous ceux qui boient de ces eaux, ou prennent des choses qui contiennent des tartres, ne sont tous suiets à la grauelle & à la pierre? Je responds qu'à tous les digestions & separations ne sont pas semblables, les archees des vns ont plus d'effect à ietter hors les tartres auant qu'ils soient coagulez, que non des autres. Si puis apres tu demandes pourquoy cela est, c'est la mesme question, que si on demandoit, pourquoy toute la terre n'apporte-elle semblables choses, pourquoy vn petit canton sera tout sable & terre sterile & maigre, & tout proche la terre est grasse & fertile; pourquoy vn autre can-

Pourquoy
tous ceux
qui vivent
de mesmes
alimens que
les graue-
leux ne sont
pas aussi su-
iets à la
grauelle.

con produit continuellement des chardons, quoy qu'on les dera-
cine, l'an fuiuant & continuelle-
ment cette terre ne cesse d'en
produire; vn autre tout proche
donnera de bon fröment; pour-
quoy dans la terre on treuve vne
veine ou cancre de fin or, &
tout ioignant vn cancre ou vei-
ne d'arsenic, & ainsi de tant d'au-
tres qui seroient vne prolixité à
reciter. La responce seroit que la
terre a esté ainsi disposée dès le
commencement par le Createur,
selon la mixtion des elemens. De
mesme les vns sont suiets à la
pierre, grauelle & sable, les autres
non, par le moyen des coëtions,
separations & coagulations du
tartre, differentes, selon les dis-
positions & archées que le Crea-
teur a donnees à ces corps-là

au commencement de leur formation.

La doctrine des quatre humeurs perd icy sa force, ses aduocats ne scauroient soustenir leurs chefes touchant la pierre & grolle, ny démonstrer comme elle se coagule dans les reins. C'est en vain de commencer par le phlegme, & dire qu'il se desèche dans les reins par la chaleur, veu qu'ils sont tousiours humides; & puis cōment est-ce que ce phlegme, qui tient de la nature del'eau, pourra estre si fort endurcy & coagulé, il seroit bien plus à propos de dire (suiuant la même theorie) que c'est l'humeur melancholique laquelle est seche & froide. Mais sans m'arrester à reciter dauantage de telles opinions non soustenables. Je dis

que c'est le tartre ou excrement des choses qui entrent dans nostre corps, dont la separation & coagulation ne se fait que dans les reins, sans auoir esgard aux humeurs, car le tim & la marjolaine donnent aussi bien vn tartre, qui se peut coaguler dans les reins & qui donnera ou causera la mesme maladie que feroit le tartre de la laictuë ou du pourpié, qui sont d'autre temperature.

D'autres de tels opinateurs disent que c'est vne pituite gypsee, comme qui diroit que le sel resout est vne pierre ou eau plastre: I'ay honte pour eux d'alleguer quantité de telles absurditez, voire dont ils font des volumes fort gros pour prouuer leurs opinions erronees, car si on les presse, & qu'on leur demande

que c'est que pituite , *Stans
stupidi sicut asinus ante Episco-
pum.*

Telle doctrine est acquise par tradition, sans sçauoir son interieur, se reposans simplement sur l'exterieur qu'ils treuuēt dans les Liures. Ce n'est pas que ceux lesquels l'ont premierement ainsi nommée, ne sceussent peut estre bien ce qu'ils disoient, qu'ils n'ont voulu expliquer, afin de ne prophaner les choses precieuses, & de n'engendrer de l'oisiueté aux escoliers : danger toutesfois où se glissent la plupart des Escoliers se contentans d'auoir leu que pituite est vneumeur, sans passer outre, & ainsi parlent en perroquets.

Je dy ces choses afin d'obli-

ger les ieunes Medecins à ne se
contenter de la simple lecture
des liures, mais aussi rechercher
de tout leur possible le vray sens
d'iceux.

Oisiveté &
parelles
pernicieuses
aux Medecins.

Le tartre coagulé dans les reins
peut aussi se putrefier & causer
inflammations, absces, ulceres,
fistule, &c. ainsi qu'il fait en
plusieurs autres parties du corps.
Comme la pierre & grauelle se
fait aux reins par la separation
de l'urine : De mesme elle se
faict en la vessie & en plusieurs
autres parties du corps où le tar-
tre de l'urine se coagule, dont
il ne faut treuver estrange si on
voit des pierres ailleurs qu'aux
reins & vessie.

La cure de la cause antecede-
dente, est de faire en sorte que les
digestions & separations soient

Cure de la
cause ante-
cedente de
la pierre &
gravelle.

comme il est requis, pour la cure
de la cause conioincte il faut de-
fopiller dissoluant & chassant le
tartre coagulé.

De Diabetica passione.

CHAP. XIV.

LE Diabetes procede d'un
sel fixe & sec, lequel est coa-
gulé au milieu des reins. Il se
faut représenter qu'il y a dans l'u-
rine autant de sortes de sels, qu'il
y a en l'homme de sortes de mine-
raux, ainsi que fait voir clairemēt
la vraye anatomie de l'homme, &
aussi comme i'ay démonstré au
liure precedent que ie ne repete-
ray de peur de prolixité. Le Dia-
betes estant vne passion dans les
reins causée par vn sel terrestre &

fixe, *facit renes siticulosos*, parce que la soif vient à cause du sel. Ceux ^{La soif vient à cause du sel.} qui mangent des viandes trop sales, ou qui contiennent en elles beaucoup de sel sec, comme les espiceries, &c. peuvent rendre tesmoignage que la soif leur en survient. La soif donc des reins prouient d'un sel sec & fixe, au milieu & au centre de ce membre, lequel appetite toujours l'humide ^{Le sel fixe contenu aux reins est la cause du Diabete.} & l'attire. De là vient que ceux qui sont affligés de ce mal pissent en quantité, & souvent leur estomach n'appete point à boire, car il n'y a que les reins qui ayent soif; c'est pourquoy ils attirent des veines & des chairs l'humide, priuans par ce moyen le sel & soufre du corps de l'homme, de l'esprit humide qui les doit vnir, moderer & humecter.

Cause de la
fièvre lente
aux Diabe-
tiques.

De là vient que tels malades ont toujours vne petite fièvre lente, par le defect de cet humide. Que si les reins ne se purgent de l'urine qu'ils ont attirée, à raison de leur imbecilité, cette urine regorge dans les vaisseaux, dont puis apres les malades enflent premièrement, & principalement par les pieds.

La fin de cette maladie est de conduire ceux qui sont affligés iusques au tombeau, si on n'y remédie en corrompant la force de ce sel par son contraire en le corrigeant par anodins, & n'y a point d'autre cure, car saigner à raison de la fièvre c'est augmenter de beaucoup le mal, en privant davantage le corps de son humide radical dont il a besoin. En fin tous autres

La Cure.

des maladies d'Obstruction. 223
efforts sont vains & inutiles.

*De l'urine blanche, & de la
Janie.*

CHAP. XV.

L'Aliment que nous prenons (tant pour l'augmentation de nostre corps, que pour le maintenir en estat, & reparer le baume qui deperit continuellement) est premierement digéré dans l'estomac, là aussi se fait la separation du *stercus*. La liqueur essentielle de cet aliment passe dans le foye, là où elle change de couleur, & est fait sang, qui est la seconde digestion: là aussi se fait la separation du pur de cet aliment, & aussi de la portion laquelle

ne peut estre sanguifiée, à cause de la trop grande abondance d'aliments, ou à cause de la debilité du foye. Ce que le foye a laissé est attiré par les reins, lesquels ont aussi leur degré de coction. Tout ainsi que le *stercus* qui se separe dans l'estomach n'est pas en sa perfection, ains l'acquiert dans les intestins, & est parfait *in monoculo*: De mesme aussi l'vrine n'est pas en sa perfection lors qu'elle se separe dans le foye, mais elle se cuit dans les reins par degrez, & est parfaite dans la vessie. En sa premiere digestion dans les reins elle est blanche; que si cette vrine ne reçoit la coction, & qu'elle soit purgée des reins, elle sort comme du lait. Ce qui se voit souvent arriver, principalement aux enfans, & à plu-

plusieurs gourmands, & qui ont les reins debiles, ne paracheuant pas assez la seconde coction. Cette vrine blanche comme lait se peut separer & coaguler comme lait. De là il arriue que par le moyen de quelque acide porté dans les reins, cette vrine y est coagulée, comme le lait est coagulé par le vinaigre; puis par la vertu expulsive est ietté hors en forme de filandres & grumeaux blancs. Que si ce qui est coagulé demeure dans les reins, il s'y putrefie, & est fait comme sanie que l'on pisse. Ce qui estonne plusieurs Medecins qui ne se prennent pas garde de ces choses, car ils voyent tantost des filandres & grumeaux blancs & tantost de la sanie: il est bien

Comment
se fait les
filandres &
grumeaux
blancs en
l'urine.

par quelque fel il vlcere aussi les reins.

Cette maladie arriue sans esgard de quelle humeur ou temperature est la predominante : car elles y sont toutes mixtes, & arriuera aussi tost cette maladie d'un aliment chaud que d'un froid, à un phlegmatique qu'à un melancholique ; cela est de la disposition de l'archée des reins.

De la fièvre des reins.

CHAP. XVI.

IL arriue des fieures aux reins par la putrefaction du tartre ; de mesme qu'il en arriue en l'estomach & au foye , ainsi que j'ay demonstté cy-deuant. Les

fièvres des reins sont plus aiguës & plus violentes que les fièvres de l'estomach ny du foye. Car le tartre des reins est bien plus elabouré & plus subtil que celuy du foye ny de l'estomach. La digestion qui se fait dans l'estomach est grossiere, la seconde qui se fait dans le foye est plus subtile, & la troisiésme qui se fait dans les reins est tres-subtile : C'est aussi pourquoy l'esprit qui s'esleue de la putrefaction de ce tartre est grandement subtil & piquant. Le tartre se coagule au foye, comme j'ay dit par l'esprit du sel, & *vi. narcotica*. Tout ainsi qu'en la putrefaction du tartre dans l'estomach & dans le foye, il s'esleue vne vapeur & esprit, lequel s'il n'a issuë libre, il

fait effort avec douleur & tremblement pour sortir.

De mesme aux reins il fait effort aux lombes, en la hanche, au *scrotum*, au dos, à la teste, à la ratte, aux ioinctures, &c. En fin vn grand tremblement & vn grand effort accompagne ces douleurs. Il ne faut point s'estonner pourquoy ces fievres font plus de violence que les autres, si on considere la nature de la matiere ou tartre, & de la partie affligée, laquelle a communication aux intestins, aux vaisseaux spermatiques, au foye, à l'espine du dos, à l'estomach, au cerueau, &c. & sur tout les malades se plaignent grandement & continuellement du dos vers la region des reins. Telles fievres font continuës ou

des maladies d'Obstruction. 229
intermittentes , mais le plus
souuent intermittentes.

Pour la cure , il faut dissoudre & euacuer les tartres , ou pour la paliatiue emousser leur aigreur ou poincte acre , mais la plus seure est de chasser & vuider tout à faict les tartres, autrement ils peuuent se putresier derechef & causer des recidiues, ainsi que dit Hippocr. aphor. 71. l. 7.

En ce Liure ie n'ay pas recité toutes les maladies qui pro-
uiennent du tartre lors qu'il est encore crud , que i'appelle *peregrinum* : car si tu es philosophe & alchymiste tu pourras aisément les connoistre par les exemples des maladies que ie t'ay descrites en ce Liure. Tu te dois contenter que i'ay expliqué

clairement, reiettant toute sophi-
stérie, tous termes obscurs &
equiuoques. Adieu.



LIVRE

TROISIÈME.

DES MALADIES d'Obstruction.

PROLOGVE.

IE ne me peux représen-
ter la methode & ma-
niere de traiter les ma-
lades dont la pluspart
se seruent à present, que quant-
quant ie ne tire vne consequence que
Dieu est lassé des deportemens mau-
P iij

uais de son peuple, & qu'il se sert de ce fleau comme d'une autre peste pour le punir & chastier. Ce qui me confirme davantage en cette croyance, est, que les malades ou gens pour eux, sont aveuglez & comme estourdis au choix qu'ils font des Medecins. Tels malades sont semblables aux pauvres idiots, lesquels donnent leur denier & chandelle d'offrande, plutost à une image neuve, ou qui sera repeinte & rabillée de neuf, qu'à une autre, laquelle sera plus crasseuse, poudreuse ou plus mal habillée, quoy qu'elle soit plus ancienne, voire la patronne. De mesme aussi la pluspart des malades, c'est à dire ceux que Dieu abandonne, requerront plutost un Medecin exterieur, c'est à dire qui en a seulement l'apparence, par son audace, ostentation, presumption, & telle autre vanité, que non pas le vray Me-

decin qui sera exempt de telles forfanteries trompeuses dont la pluspart des autres s'habillent pour se faire estimer.

L'aveuglement paroist manifestement en ce qu'un pauvre malade tourmenté de la goutte, aura recours à un tel Medecin gisant au lit travaillé bien plus rigoureusement de la goutte que le malade qui luy demande secours, & dont le requerrant a bonne connoissance, & si ne manquera d'excuter l'ordonnance du Medecin gouteux, & ainsi des autres maladies.

Les uns font de grands volumes sur les quatre humeurs, & passent toute leur vie à tascher d'y treuver leur compte, dont par leurs conclusions & consequences, on voit qu'ils ne scauent eux-mesmes ce qu'ils disent, s'implicans en mille contradictions, ils accusent les humeurs comme complices

Liure troisieme,
de toutes maladies, ils font leurs as-
sociez & complices, les qualitez &
temperaments, sans auoir esgard à
autre chose, semblables aux chiens
qui mordent la pierre dont on les a
frappez.

Ceux qui font profession d'une
science si sainte, telle qu'est la Me-
decine, deuroient bien considerer com-
bien elle est honorable & agreable
à Dieu, quand elle est bien exercee,
luy-mesme tesmoigne par son Sainct
Esprit qu'il l'a créee. Si on fait autre-
ment, c'est la medecine de Sathan. Il
rapporte cecy afin à obliger à s'estu-
dier aux vrais termes, & non à une
infinite d'imaginacions & opinions
sophistiques, par lesquelles on renuer-
se les vrais fondemens de la medecine.

Il se faut estudier à la vraye ana-
tomie des tartres, causes & origine
des maladies par obstruction, & com-

mencer par le sang, puis par l'urine, sueurs, pierre, gravier, nodosités, &c. c'est à quoy ie t'exhorte.

Au liure precedent i'ay fait voir quelles maladies en general proviennent du tartre crud, au suiuant ie décriray quelques maladies particulieres, causees tant par le tartre crud que ex tartaro cruoris, qui serviront d'exemple & de lumiere pour te conduire à la connoissance de toutes les autres maladies d'obstruction des tartres.

Que si ie ne décris icy qu'une partie des maladies qui se font par obstruction; il ne faut pas que tu estimes qu'il n'y aye que celles-là qui soient causees par obstruction des tartres. Si tu es philosophe & alchymiste, c'est à dire que tu ayes une bonne connoissance de la lumiere de nature, & aidé par les exemples que ie te donne, tu connoistras & discerneras

facilement celles qui prouiennent par obstruction.

Considere premierement que quelque excellent que puisse estre l'aliment, que toutefois il n'est pas tout conuertý & fait animal, ains que la plus grande partie est excrement que nature reiet-
te non seulement comme inutile à la conseruation de l'homme, mais aussi comme nuisible. Considere & anatomise cet excrement, observe les differences que les coctions & digestions augmentent ou diminuent les puissances des tartres, & font paroistre plus ou moins leurs effectz, la Philosophie & Alchymie te rendra facile cette connoissance, tu y seras aussi guidé par la lumiere de nature, dont les arguments sont sans sophisterie & sont soustenables, les conclusions vrayes & la verité manifestee par demonstration. Autrement que te ser-

nira-il de sçavoir que les nœuds de la goutte sont faits d'une pituite gypsee ou plastree, si tu ne sçais au vray quelle est cette pituite, & comment elle est engendrée? Que te servira-il de voir qu'on vomit de la bile au cholera-morbus, si tu ne sçais pourquoy elle est acre en cette maladie, & ne l'est point en l'ictérie ny aux deiections naturelles, ny dans la bourse du fiel ny dans le foye? &c. Que te servira-il de connoistre que le phlegmon vient du sang, si tu ne sçais pourquoy & par quel moyen il fait plutost ce mal qu'un autre? pourquoy en vne partie du corps & non en l'autre, veu qu'il y a aussi du sang par tout le corps? ainsi il faut inger des autres.

Reiete la doctrine de ceux lesquels accusent les humeurs pour estre la cause premiere de leur propre destruction, cela est aussi absurde comme qui

diroit le fer se rouiller luy-mesme, fondé sur ce qu'on ne voit pas vn sel armoniac mixte avec l'air ou l'eau qui le touche, lequel des-vnit & rouille le fer. Semblablement au cholera-morbus où l'on voit quantité de bile, tant aux deiections par haut que par bas, ce seroit erreur d'accuser cette bile pour cause premiere de son affluence dans le ventricule & intestins, car c'est la putrefaction du tartre dans l'estomach lequel irrite le fiel & en fait sortir la bile, ou comme qui accuseroit le chesne estre cause de sa putrefaction, ce qui paroist tout au contraire, car si le chesne est bien conservé d'aucune chose qui puisse destruire son baume, il se conservera plusieurs siecles sain & entier. Que si au contraire on le laisse à la pluye, & en l'air humide, il se pourrira facilement par la privation ou destru-

des maladies d'Obstruction. 239
tion de son baume.

De mesme quand le sang se corrompt, ce n'est pas de luy-mesme qu'il se corrompt; non plus que le fer ne se roüille de luy-mesme : mais ce sang est corrompu par l'apposition de quelque chose heterogene, & qui est hors de luy-mesme, soit par vn viure desreglé, ou d'un viure de mauuaises viandes, ou que l'estomach; intestins, foye, reins, &c. ne separent pas & ne reiettent les tartres, & excrements, ains passent mixtement avec l'aliment, & se meslent avec le sang.

De la goutte.

CHAP. I.

Pour faire vn discours entier de la goutte, il seroit

requis de traiter de l'anatomie de toutes choses qui entrent au corps humain pour la nourriture & entretien d'iceluy, car c'est de l'excrement de l'aliment qu'est tirée la matiere de la goutte: mais parce que i'en ay assez parlé au Liure precedent ie ne le repeteray.

Premierement la goutte en quelque partie que ce soit est vne congestion du tartre ou sel excrementeux de l'aliment, lequel se coagule dans les iointures, puis s'y putresce par l'aide de la chaleur, dont se separe vn esprit acré & mordicant, lequel calciné la synouie, & poind & pique les parties nerueuses. La matiere de ce sel ou tartre est toute chose coagulable qui se separe de l'aliment dans nostre corps, & qui y est retenuë par l'imbécillité

lité de la vertu expultrice.

Cela est très-certain que nous prenons nourriture & augmentation des aliments qui entrent en nostre corps, où tout ce qui entre dans nostre estomach ne tourne pas tout en nostre substance, c'est à dire, n'est pas assimilé ny fait animal, donc le reste est excrément & heterogene, que si cet excrément n'est chassé hors, soit par la vertu expulsive naturelle, ou par l'artificielle, ains qu'il passe mixtement avec l'aliment dans le foye, s'il ne se separe & qu'il ne soit attiré des reins, ou chassé par les voyes ordinaires, il demeure tousiours resout dās le sang, à cause de la chaleur (car le chaud & l'humide le tiennent tousiours en resolution, comme il paroist exterieurement dans les vrinals & pots de cham-

Ce qui entre dās nostre corps & qui n'est point assimilé en nostre corps est excrément.

Comme
se fait la
coagestion
du tartre
sur les
joinctures.

bre où il ne se coagule que le froid.) Si donc ce tartre se separe des veines, qu'il s'ymbibe dans les chairs puis qu'il decoule, & soit recueilly dans les iointures, là il se coagule à raison qu'elles sont plus froides que les lieux où il estoit resou. Là il demeure iusques à ce qu'il soit fortifié pour se putrefier, d'où puis apres il exerce sa tyrannie, ainsi que nous voyons qu'il se putrefie dans les chairs & y fait des absces, frôcles, pustules, &c. Ce tartre resout où l'esprit de ce sel de tartre, coagule la synômie, qui est ceste viscosité, laquelle lubrifie & fait mouvoir plus librement les iointures. Il ne faut pas estimer que ces gros nœuds qu'on voit aux iointures des goutteux, soit tout autant de tartre ainsi coagulé, c'est seulement la synômie cal-

cinée ou plustost endurcie & des-
chée par l'esprit ardent de ce sel de
tartre. Car si c'estoit tout tartre il
y feroit en grande quantité, & se-
roit vn corps estranger subiect à
putrefaction, que nature ne pour-
roit souffrir qu'avec violence, c'est
pourquoy elle luy fabriquerait
tous les iours vn passage & ouuer-
ture afin de le faire sortir, ainsi
qu'il se voit aux absces, où le tar-
tre crud & subiect à putrefaction
est reietté hors par la puissance de
nature, or les nodositez de la
goutte ne se conuertissent point
en pus, ains se conseruent long-
temps sans putrefaction. Je dis
par consequent, que ce n'est que
l'esprit du sel de tartre, non subiect
à putrefaction, lequel calcine la
sinouie & la preserve de putre-
faction.

Les nodes
sont des
iointures
sont la si-
nouie cal-
cinée par
l'esprit de
tartre.

Semblable chose fe void en la colique, où vn peu de tatre refout en esprit acide, picquant & mordicant, cause de fi grandes douleurs, non seulement contraction de boyaux : mais aussi de nerfs, lors que par sa subtilité il est porté iusques là, & si toutesfois il ne s'y engendre point de pus ny d'abſces. Aussi pour causer de grandes douleurs en la goutte, il n'est pas requis qu'il y aye grande quantité de matiere, il suffit qu'elle est puissante & qu'elle contient vne grãde acrimonie. Tu peux demander pourquoy la douleur continuë plus long-temps en la goutte qu'en la colique, veu que c'est vne même matiere qui la cause: à cela ie dis, que c'est à cause que la chaleur est pl^z léte aux iointures que dans les intestins, & partant la

coction & euaporation du tartre
resout se faiet plus lentement:
ioint aussi que les emonctoires
sont plus faciles & plus ouuerts
dans le ventre que non pas aux
iointures. Ce qui confirme dauan-
tage mon dire, est qu'on voit tou-
siours que les personnes maigres,
billicux, qui sont goutteux, sont
plustost quittes de leurs douleurs
& paroxismes que les plus gras &
humides: mais en recompense les
maigres billicux sont en leur plus
bref temps, plus furieusement tour-
mentez que les autres. Quand à la
chaleur laquelle se manifeste exte-
rieurement, elle tesmoigne que cét
esprit acide & mordicant s'est fait
vn emonctoire & a penetré ius-
ques au cuir. Quand a ce que l'on
appelle les vnes froides, les autres
chaudes, & que les narcotiques

profitét aux vns & nuisent aux autres, c'est à cause des tartres dót les effectz sont differents: le tartre nitreux fera des nodositez voire en quantité plus que les autres & si toutefois les douleurs seront plus moderees qu'aux gouttes causees d'un autre tartre qui n'aura pas les mesmes propriettez; ioinct aussi que ces tartres causent les douleurs lors qu'ils sont resours, dont les vns se resoluent par le chaud les autres s'y coagulent. Que les fels causent la douleur lors, qu'ils sont resours, cela paroist manifestement aux cauterres, lesquels ne peuuent faire paroistre leur puissance de cauteriser s'ils ne se resoluent, c'est aussi pourquoy les habilles Chirurgiens mouillent la place où ils les veulent appliquer lors qu'ils voyent que la peau de ceste per-

sonnelà est trop seche , mesme si on met du sel sur vne playe ou vlcere il ne cause point de douleur, que iusques à ce qu'il commence à se resoudre , voila quand au sel fixe: le volatil faiet la mesme chose, car quand bien on mettroit du sel volatil sur vne playe ou vlcere il ny causera point de douleur , s'il n'est resout. Or ces 2. sels fixe & volatil sont contraires en leur resolution , car le premier se resout par le froid & humide, & se coagule par le chaud & sec, & au contraire le volatil se resout au chaud & humide & se coagule au sec & froid , c'est aussi la raison pourquoy les remedes chauds appaisent la douleur aux vns en ce qu'ils coagulent les sels , & les remedes froids appaisent la douleur à d'autres gouttes, par ce que par

Tresbel-
le obserua-
tion.

leur froid ils coagulent les sels.

Les saisons aussi prouoquent ou diminuent les douleurs aux goutteux, car les temps humides resoluent le sel en humide, tellement que cette humidité demeurant dās les chairs s'escoule sur les ioinctures & y demeure, ne treuuant pas la partie assez puissante pour les chasser ou reietter : les gelées esmeuent aussi les douleurs de goutte, à raison qu'ils reserrent les pores, tellement que l'excrement lequel auoit accoustumé de se purger par les sueurs ou insensible transpiration est retenu dans les chairs, où avec le temps aidé de la chaleur y acquiert vne plus grande acrimonie, puis apres se retirant sur les ioinctures y exerce sa tyrannie. Il ne faut pas estimer que les saisons ou le boire & man-

ger soient la cause antecedante de la goutte; ains c'est l'archée ou mechanique interne qui fabrique la goutte, voire de l'aliment le plus pur que nous puissiós prédre, non seulement la goutte, mais toute autre sorte de maladie selon la vertu & office particulier de ce mechanique, ainsi que le ferronnier, l'orfevre ou le charpentier peuuent avec le fer, l'argent, & le bois faire differents ouurages chacun selon sa volonté, de mesme l'archee peut fabriquer diuerses maladies d'une mesme matiere.

¶ Cét ouurier apprend son art de la lumiere de nature, comme les animaux irraisonnables paissent les herbes propres à leur nourriture, & refuyant & reiettent les autres qui leur peuuent

nuire. Le chat ayme passionnement le Nepeta, tellement que c'est comme vn estonnement de voir les carresses que cét animal fait à cette herbe : & toutefois il n'a iamais leu ny Galien, ny Matheole, ny Discoride, il tient ceste cognoissance de la lumiere de nature.

Les plantes mesmes ont vne cognoissance naturelle ainsi qu'on voit iournellement, comme la vigne laquelle deuiet sterile & hetique parmy les choux, & vne infinité d'autres choses pareilles: ainsi le mechanicque interne de l'homme a vne cognoissance de fabriquer diuerses maladies d'une mesme matiere.

Belles observations touchât la goutte ou maladie de jointures.

Tout ainsi qu'un artisan se sert d'instrumens pour faire son ouvrage, ou comme un metalliste

se sert d'artisans pour chercher en terre les cancrs ou veines de metal , dont puis apres le metalliste se sert du metal pour faire & fabriquer tel ouvrage qu'il luy plaist. De mesme l'artiste ou mechanique interne à ses artisans, lesquels cherchent & mōstrent la matiere pour faire la goutte. Par exemple , si quelqu'un abonde en bile, ou tartre, ainsi appellé, dās l'estomach, & qu'il prenne de l'esprit de vitriol , de soufre, vinaigre &c. alors la bile s'eschauffera & se fermentera : cēt acide est le seruiteur de l'artiste , lequel a treuvé la bile; dont puis apres cēt artiste fabrique vne maladie. Ce n'est donc pas ny les saisons, ny le vin ny , la lectuë &c. qui fabriquent la goutte , car il failliroit que tous ceux qui boi-

uent & mangent des mefmes viandes que les goutteux euſſent auſſi la goutte, ces choſes ſont bien les inquiteurs & ſeruiteurs, leſquels font paroître la goutte auant le temps qu'elle ne feroit, veu que ces inquiteurs exaltent & fortifient la puiſſance interne, laquelle machine la goutte, voire de leur corps & ſubſtance le mechanic interne fabrique la goutte.

Je nie que la bile ſeule ſoit la matiere de la goutte, ce n'eſt pas que dans la bile, auſſi bien que dans le phlegme & melancholic ne ſoit ou ne puiſſe eſtre contenue cette matiere, mais tels qu'on les figure ie nie qu'ils puiſſent produire d'eux-meſme la goutte, car ſi cela eſtoit tous les bilieux & meſmes tous les phlegmatiques & me-

lancholiques (car ils sont mixtes des 4.) seroient de necessité gouteux: la bile, atrabile &c. cōtiennēt la nature de la goutte; mais ne la causeront iamais, sans l'artiste interne: tout ainsi que le Succinum contient vne huyle grandement humide, subtile & de forte odeur, & si toutesfois il ne fera iamais paroistre cette huyle sans l'artiste, qui est le feu, ains sera plusieurs siecles sec, sans odeur tel qu'il est, ou tout ainsi que le soulfre sera bien plusieurs siecles sans faire paroistre son acidité, s'il n'est resout par le feu: ainsi la bile, atrabile, &c. ne feront iamais paroistre la goutte s'ils ne sont separees, par consequent ceux là tesmoignent bien ne sçauoir ce qu'ils disent, quand ils attestent que les douleurs de la goutte prouiennent de bile, l'es-

Belle cō-
paraison

Reductiō

prit du sel qui n'est point bile, est bien plus acré, violent mordicant & piquant, c'est pourquoy il deuroit bien plus - tost estre accusé de ceste tyrannie, veu mesmes qu'il se prouue par mille exemples, les violences que cét esprit fait au corps humain: de la bile on ne scauroit prouuer la mesme chose, car les ictériques qui en sont si couuerts & si plains ne se plaignent d'aucune douleur: telle accusation est vn pur & manifeste tesmoignage d'ignorance. Hypocrate n'a pas entendu par ce nom de bile ceste liqueur iaune ainsi appelée par ses sectateurs, ains a entendu le feu contenu dans les sels. C'est faute de l'entendre qu'on l'accuse & qu'on le faict auteur de telles opinions erronnées.

Cela despend de l'ouurier inter-
ne de machiner la goutte tantost
d'une matiere tantost de l'autre.
Tout ainsi qu'un archyteccte peut
bastir une maison, soit de bois,
ou de pierre, ou de terre, ou de
plastre, ces maisons sont differen-
tes & de matiere & de structure,
& toutefois elles sont toutes des
maisons, ainsi en est-il de la stru-
cture de la goutte que l'archyteccte
la peut faire tantost de l'excremēt
du pain, tantost du vin, tantost
des chairs, legumes. &c.

Par ce que dessus ie conclus
que la matiere de la goutte est cō-
tenuë dans l'excrement qui se se-
pare de l'aliment dans nostre corps
dont les moyens sont plusieurs,
mais il y a un seul ouurier, à sça-
voir l'archee, artiste mechani-
que ou puissance naturelle,

ainsi predestinée à *principio creationis*.

Pour la cure est *in fieri* , mais *hoc opus hic labor est* , ie me reserve ce que Dieu m'en a donné de cognoissance , pour en faire gouter le fruit à ceux qui veulent s'assujettir à la patience & à l'observatio qui y est requise , ioug toutesfois fort facile à supporter & qui n'incommode point, cecy n'est point vne supposition , puis que plusieurs tesmoins dignes de foy , & irreprochables rendront le mesme tesmoignage s'ils en sont requis. Je dis ces choses sans vanité , mais affin qu'on n'estime pas la vraye medecine si sterile , comme veulent faire croire ces superbes Medecins qui disent ,

*Soluere nodos am. nescit medecina
podagram.*

à cela

à cela ie responds, que

Nodosam nescit rhoades curare podagram.

De la peste.

CHAP. II.

LA peste est vne maladie arsenicale, causée d'un esprit arsenical separé de son corps, lequel se joint *cum illeido*, c'est à dire avec cet esprit qui occupe tout le chaos de nostre corps. Ceste maladie est appellée arsenicalle bien à propos, car l'esprit veneneux qui la cause faict au corps de l'homme les mesmes effects que fait l'arsenic mineral, & puis si on dit communément bile poracee, crugrieuse, &c. à cause de la couleur & de l'odeur, pour-

Rhoades
sôt fruiets
cueillis
auant
leur matu-
rité, par-
ce qu'il s'é-
blémours:
ainsi s'ap-
pellent les
Medecins
de belle ap-
patence &
sâs le fruit
meur de
medecine,
autrement
dits *prama-
turi medi-
ci.*

Analogie
de l'arsenic
vulgaire
avec celui
qui cause la
peste.

R

quoy ne dira-on aussi esprit arsenical à cause de ses effects semblables à ceux que fait l'arsenic mineral? & puis, comme i'ay demóstré, cydeuant : l'hóme a en sa composition des mineraux aussi bien que des vegetaux. Plusieurs noms sont donnés aux choses, soit à cause de leurs formes ou à cause de leurs vertus & proprietéz.

Iesus-Christ est appellé la vraye voye parceque ceux qui cheminent en luy ne s'esgarent poinct : Il n'est pas toutesfois semblable à vn chemin qu'on foule des pieds. Herode est appellé Renard par le Sauueur du Monde, toutefois il n'auoit pas la mesme forme qu'un Renard, mais ses effects estoient semblables, & ainsi de plusieurs autres choses que ie pourrois alleguer pour exemple, dont la lectu-

re seroit peut estre ennuyeuse.

Pareillement la peste est appelée maladie arsenicale à cause que c'est en effect vn arsenic tel qu'il est au corps de l'homme, & qui cause les mesmes effects que l'arsenic vulgaire. Cestuy cy par sa puissance corrode la chair s'il est appliqué dessus, la brusle & la noircit, y cause inflammation, inflation avec vessie noire, enfin destruiet l'humide ou baume radical. Les mesmes choses produiét l'arsenic de l'homme; ainsi qu'il se voit en la peste, car il cauterise & brusle la chair voire faiet grande escarre comme au charbon ou anthrax, voire surmonte & destruiet l'esprit de vie & le baume radical en la partye où il s'adhere. C'est pourquoy ie maintiens que ceste maladie est bien à propos ap-

pellée arsenicale.

Double
cause de la
peste.

Ceste maladie est naturelle & supernaturelle, c'est à dire de double cause : pour la naturelle, c'est quand l'esprit arsenical se separe de son corps, car s'il ne se separoit point il demeureroit en repos dans l'homme, tel qu'il est sans nuisance, comme si le sang demeuroit tousiours dans les veines sans se separer il ne causeroit aucune maladie, si le fiel estoit & demeuroit tousiours dans la bourse ne causeroit point de maladies ailleurs, ou encor mieux si l'esprit du sel ou du vitriol demeuroient tousiours dans leurs corps ils ne pourroient dissoudre les coraux & ce sel n'auroit aucune acidité ni corrosion telle qu'à son esprit. De mesme si l'arsenic de l'homme demeuroit tousiours dās son centre

il ne caueroit aucune maladie arsenicale. Il faut remarquer qu'il y a plusieurs especes d'arsenic, aussi il y a plusieurs maladies arsenicales, comme peste, gangrene, cancer, &c.

L'arsenic se separe dans nous par aide interieure ou exterieure: par l'interieure, quand moyennant la chaleur, l'arsenic se putresce, durant ceste putrefaction vne partye se conuertit en air, ou esprit lequel se mesle avec l'illeide (qui est cet air diffus dans nous par tous les membres) dont puis apres le medecin ou puissance interne cherche vn emonctoire ou lieu pour l'illeide infecté, affin qu'il puisse se purifier de cet esprit arsenical, & au lieu ou cet esprit veneneux passe, là est faict le charbon ou bubon s'il se coagule en

ceſte partye là, c'eſt ce qu'improprement on appelle peſte : car ce n'eſt qu'un ſymptome de la peſte ou un des effets de l'eſprit arſenical, veu qu'on peut auoir la peſte ſans charbon & ſans bubon; voila quand à la ſeparation par l'aide interieure. Pour l'aide exterieure elle ſe faiet par contagion: voicy comment, il eſt certain que nous ne pouuons viure ſans air exterieur, cét air ſert à humecter & rafraifchir continuellement le noſtre interieur, lequel autrement ſeroit incontinent infecté par les cōtinuelles vapeurs mauuaiſes qui s'eſleuent des putrefactions & coctions interieures, tellement que tel qu'eſt l'air exterieur que nous humons, tel il entre dans noſtre corps: ſ'il eſt bon & pur il profite; ſi autrement, il eſt vitié & cor-

rompū il nous destruiēt au lieu de
conferuer.

L'air extérieur vitié n'est quel-
quefois pas assez capable de soy :
(c'est à dire quand a sa substance)
de causer des maladies , mais il ré-
veille & irrite les venins internes
qui autrement demeureroient en
leur repos , de mesme qu'en la
suffocation de matrice ; où les
bonnes odeurs tuent les femmes
non pas que de soy elles soyent
assez puissantes pour tuer , ni
qu'elles soyent venins : mais par
accident. Car la matrice par sa
vertu magnetique faict attraction
de ceste odeur & desire s'en ap-
procher , par vne cognoissance
& affection naturelle qu'elle a à
cette odeur. Tellement que s'esse-
uant violément pour approcher
de cette odeur elle presse la poi-

étrine & la remplit de vapeurs
espaisses & veneueuses qui par ce
moyen se separent de menstres
& ainsi suffoquent & estranglent
les filles ou femmes: ou comme
vn petit morceau de leuain, mis
pres vn grand monceau de paste
douce, l'aigrit & la putrefié, de
mesme l'air extérieur arsenical
entrant dans nous, par vne gran-
de simpatie qu'il a avec nostre ar-
senic, le cherche & s'vnissent en-
semble, le faiet separer & conuer-
tir en air, lequel puis apres infecte
tout l'leide, s'il y a obstruction
qui le retienne trop long temps
dans nostre corps.

• On pourroit demander com-
ment se peut faire que l'air arseni-
cal extérieur cause vne si prompte
& si soudaine putrefaction & se-
paration en nostre arsenic interi-

cur. A cela ie responds que les esprits agissent plus promptement que les corps , ainsi qu'on voit que l'eau de vie bien retifiée appelée esprit de vin , ou l'esprit de therebentine agissent & penetrât plus promptement , ni que le vin , ni que la therebentine , de mesme l'air exterieur arsenical est vn esprit qui penetrant promptement tout au trauers du corps & s'vnissant par vne grande sympathie, avec nostre arsenic, desia incliné ou disposé à putrefaction , faict vne prompte, & soudaine separation , toutefois plus ou moins léte selon qu'est disposé l'arsenic interieur , sans qu'il soit requis quantité de matiere ou de leuain exterieur , c'est à dire d'arsenic pestilentiel , il suffit qu'il aye ceste puissance. De mesme qu'il se voit

que le vin est gaste par l'esprit qui se separe des menstres des femmes, cét esprit menstrual est en fort petite quantité & si impercetible qu'il ne se peut voir, tellement qu'il faut plustost croire que c'est vn air infecté de l'esprit veneneux des mestres que non pas aucun corps des menstres, cét air ou esprit veneneux estant attiré de l'esprit du vin, gaste, corrompt & vitie tout le vin qu'il approche, ou comme les Astres communiquent leurs vertus sur les corps inferieurs sans diminution de leurs corps, ou comme le fer chaud communique sa chaleur sans diminution de son corps. La mesme chose est de l'air exterieur arsenical & qui s'approche ou se mesle avec nostre arsenic interieur. voyla pour les causes naturelles, dont il y auroit en-

cor beaucoup de choses à dire: mais parce que tu n'entreprédras la medecine que tu ne sois philosophe, voila pourquoy ie laisse le reste a decider: seulement ie te donne ceste briefue entrée affin que tu chemines & te conduise selon les vrais sentiers qui te sont enseignez, *In libro luminis natura.*

Pour la cause supernaturelle; Il faut sçauoir (comme nous le témoignent les sainctes lettres) que Dieu irrité cōtre nous à cause de nos pechez, se sert de verges pour nous chastier: Nous en auons vne preuue en Dauid le Prophete auquel Dieu enuoya ce chastiment de peste, nous sommes non seulement menacez de peste, si nous ne nous conuertissons à Dieu, mais aussi de famine, de guerre de tem-

pestes & d'autres infinies chastiments. L'Astronome ne voit pas tousiours cela dans la vertu des Astres, car il est dict si nous nous repentons que Dieu destournera de nous tels chastiments, mais quand nous demeurons rebelles & que nous persistons en nos pechez, alors Dieu qui le sçait & cognoit dès la fondation du monde donne puissance à nostre grand pere, le grand monde de nous chastier. C'est aussi pourquoy il est pourueu de verges & de diuers fleaux pour chastier ses enfans lors qu'ils offensoient le souuerain Createur semblable à vn pere qui auroit des enfans, lesquels il aymeroit estans obeïssans & toutefois il n'auroit pas moins des verges chez luy toutes prestes pour les chastier s'ils delinquoyent &

estoyent desobeïssans & aussi pour les retenir en crainte, tant que ces enfans sont obeïssans les verges ne leur font poinct de mal, mais s'ils irritent leur pere il se sert de ces verges pour chastier ses enfans.

Dieu, pere du grand monde, (qu'il a premierement crée, puis apres de sa semence a formé l'homme appelé le petit monde) a donné à ce grand monde nostre pere, des verges & diuers instruments pour nous chastier, car il sçauoit, (par ce qu'il est Dieu) que nous serions rebelles & que nous l'irriterions : le Soleil est l'œil de nostre pere le grand monde, auquel Dieu a donné vne essence Euestralle, qui est vne certaine cognoissance prophetique & à nous occulte, laquelle essence ou esprit Euestral, par

vne cognoissance & science, sçait cognoist & retient les maux que nous commettons & les escrit comme en sa memoire affin qu'il nous decele au grand monde nostre pere, lequel irrité (comme seroit vn pere de ces enfans) nous chastie avec ses verges: les Estoilles & Astres sont les mains, les pestes, tēpestes foudres tonneres, gresles, pluyes immoderées, & autrestelles choses sont les verges & instruments dont nous sōmes chastiez.

Il y a tant d'exemples en la nature qui donnent preuues que le Soleil est non seulement crée de Dieu pour nous esclairer & eschauffer de ses rayons, mais aussi pour descouurir les actions bonnes & mauuaises, en sorte qu'il n'en faut poinct douter. Les Diabls doctes & sçauants images, co-

gnoissent tresbien cela ; c'est aussi pourquoy ils apprehendent la lumiere qui est la presence du Soleil. Adam & Eve lesquels auoyent la cognoissance du bien & du mal, apres la transgression monstrent assez qu'ils apprehendoyent la presence du Soleil, se couvrans durant le iour: mesme quantité d'animaux nuisibles se retirent dans leurs tanieres incontinent que le Soleil comence à se monstrier sur nostre hemisphere; Voire mesme les plus petits animaux ont cette naturelle cognoissance, comme les punaises &c. Lesquels se cachent aussi tost que le Soleil esclaire sur la face de la terre, ie pourrois alleguer vne infinité d'exemples qui preuent la mesme chose, mais ce seroit plustost reciter vne histoire que continuer le fil de

mon discours. Tous ces exemples sont pour faire voir & demonstrier que nous sommes frappez , supernaturellement de peste , quoy que les moyens soyent naturels à sçavoir, que le Soleil cognoissant nos deportemens mauuais (par son esprit vuestral ou prophetie à nous occulte.) il les escrit en sa memoire & les decele au grand monde nostre pere , de la semence duquel Dieu nous à formez , lequel nous chastie par les influences malignes des Estoilles, & des Astres, lesquels esmeuent tantost la peste & tantost autres chastiments. Ce qui nous est predict souuent par diuers signes au Ciel comme comettes & meteores estranges & extraordinaires. Les Astrologues n'ont aucune cognoissance de ces choses sinon apres qu'elles sont es-

tes

res au Ciel par diuers signes ; Car les signes & predictions des fleaux dont Dieu nous veut chastier ne sont pas escrits au Ciel & dans les Astres dès le commencement du monde. Le fils Eternel nostre Sauueur nous enseigne que , *Erunt (au futur) signa in sole & luna & virtutes cæli mouebuntur.* Il y aura des signes dans le Soleil & dans la Lune & les Vertus des Cieux serót agitees. Il faut donc conclurre que quoy qu'il semble que la peste soit tousiours vne maladie naturelle, toute fois il faut aussi croire que c'est vne maladie supnaturelle, dont Dieu se sert, ainsi que des autres chastiments. Il est bien vray que les moyens sont naturels à sçauoir oppilation & obstruction des pores par lesquels l'homme est priué de se mondifier, &

partant ainſi retenu ſe corrompt, dont puis apres eſt faiète tantost pleureſie, tantost peſte, pourpre, &c. Selon la nature de la corruption. Ce qui oblige encor dauantage à croire que c'eſt vne maladie touſiours naturelle, eſt que les vns en reſchappent les autres non, ſelon qu'ils feront bien ou mal aſſiſtez.

Je reſpondray à ces obiections, diſans que le Ciel infecte premierement l'air ; lequel il nous faut humer neceſſairement puis eſtant renfermé dans nous, par l'obſtruction que le Ciel cauſe auſſi en nous, ſoit par vne grande crainte, ſoit par vne imagination que le Ciel imprime en nous, laquelle faiète retirer en dedans la chaleur naturelle puis le dehors demeurant froid les pores ſe reſerrent, &

renferment l'air infecté dont l'Idle ne se peut plus mondifier & renouueller, ains demeure infecté par l'esprit arsenical exterieur qui est entré dans le corps & qui est comme vn leuain qui corrompt & esmeut le nostre, lequel sans cela demeureroit en repos sans faire mal, quand à ces moyens ils sont bien naturels, mais l'imagination, la crainte, l'air infecté par les astres &c. sont souuent supernaturels. Quand à ce que les vns sont frappez de peste, les autres en sont exempts, cela est aussi supernaturel. Cela arriue tout ainsi que si vn Capitaine commandoit à ses soldats d'aller à la charge, ceux qui serroyent munis de bons corselets & cuirasses serroyent exempts des coups de picques & despees, mais au contraire

ceux qui n'en auroyent poinct seroyent subiects au hazard de la mort. Celuy qui donneroit à ces soldats des corselets & cuirasses feroit celuy qui les preserueroit des coups. Ou comme quand Dieu commanda à Noë de bastir sur terre vne nauire affin de le preseruer du deluge, ce nauire ou arche estoit bien vne chose naturelle, mais l'aduertissement estoit supernaturel: Car si Dieu en auoit autant commandé à quantité d'hommes, ils eussent esté aussi preserués du deluge aussi bien que Noë.

Aussi quand Dieu en preserue quelques vns, c'est qui leur donne conseil de prendre des preseruatifs, & leur ostela crainte & l'imagination, tellement que par ce moyent leurs pores ne sont

poinct referrés ni bouschcs, par consequent leur Ileide se purge & purifie continuellement : Il est veritable que cela arriue tant aux bons qu'aux meschants, mais Dieu seul sçait pourquoy il le veut ainsi. Quand à ce que les vns qui sont frappés de ce fleau, en meurent les autres aussi en rechappent, cela est supernaturel. C'est comme si quelqu'un ayant vne fleche ou espee dans la playe que ces instruments auroient faiçte, en vain ceste playe seroit pensce avec de bon baume & de bons vulneraires si le Chirurgien n'ostoit le corps estrange, espee ou fleche qui resteroit dans la playe : mais si vn plus expert voit qu'il y a dás la playe vn corps estrange qu'il l'oste, & puis qu'il pense le navré avec les mesmes remedes dont au-

parauant il n'auoit peu estre gari,
asseurement il garira. De mesme
aussi quand quelqu'un est frappé
de peste, si Dieu luy donne con-
seil d'enuoyer querir vn bon me-
decin, ce medecin sera celuy qui
portera la misericorde de Dieu à
ce malade, & fera comme s'il
oſtoit le fer que les astres auroyent
dardé dans la playe de ce malade;
& au contraire quand Dieu ne
donne poinct conseil à ce malade
de s'adresser à vn bon medecin,
ains qu'il laisse les astres faire le
reste du chastiment, est quand il
veut que le fer demeure en la
playe, alors le malade enuoye
querir quelque medecin humora-
liste, lequel apres auoir bien con-
templé les 4 humeurs, que la bile,
tantost le sang causent la fièvre,
que l'assoupissement est vne pituite

des maladies d'Obstruction. 279
froide du cerueau, que l'antrax est
vne bile aduste, &c. *Ergo*, il faut
saigner aux bras & aux pieds, il
faut boire de l'eau car il y a fièvre:
c'est ce Chirurgien qui pense la
playe sans oster le corps estrange
qui la faicte ains le laisse dedans.
A talibus medicis indoctis & super-
bis, Libra nos Domine.

Pour conclusion la peste est
vn esprit arsenical, lequel corrompt
& destruiet l'esprit de vie, pour
l'assoupissement, c'est vn soulfre
narcotic qui s'esleue de la pu-
trefaction.

Finallement la peste n'est au-
tre chose qu'un effect de la cho-
lere de Dieu, lequel frappe de
ceste fleche, ceux qui l'ont irrité.
La medecine n'est autre chose
que la main de Dieu, laquelle tire
la fleche de la playe de ceux qu'il

ne veut pas qu'ils en meurent d'oc
le medecin est porteur de la mi-
sericorde de Dieu.

Le moyen de diuertir vne telle
maladie supernaturelle est d'auoir
recours à celuy que nous auons
offencé à ſçauoir noſtre Dieu, im-
plorans ſa miſericorde, laquelle il
ne denie à aucun qui la luy demã-
de avec foy. Alors il nous enuoy-
ra des Samaritains vrais medecins
& nous preſeruera des ſuperbes,
Phariſiens & faux medecins.

De la Fièvre en general.

CHAP. III.

LA Fièvre eſt vne chaleur cau-
ſee par obſtruction, & en-
gendrée des vapeurs qui ſe font en
la putrefaction des tartres, la

chaleur faiët esleuer & enfler les vapeurs qui s'esleuent & se separent du tartre, ou plustost la chaleur conuertit en air le tartre putrescé, lequel infecte l'esprit de vie, que nature tasche tousiours de conseruer pur & net, & pour cét effect elle se purge & chasse hors le tartre conuertit en air, mais s'il y a obstruction & que les meats & pores soyent bouchez, elle faiët effort pour luy machiner & faire issue: alors, *concutit corpus*, & faiët trembler. Il faut considerer que l'homme, *habet spiritum vitæ per totum corpus diffusum*, a vn esprit vital espars par tout le corps, & ce est pour conseruer le corps de putrefaction. Quand il aduient que quelque chose heterogene, (& qui n'est poinët de la compositio de l'homme) est retenue en quel-

que partye de ce corps, soit au foye, reins, ratte, cœur, estomach, mesentere, ou en quelque autre partie, puis apres si ceste chose heterogene vient à se corrompre & à se putrefier, elle contamine aussi & corrompt la partye où se faiët la putrefaction; si l'esprit de vie qui eët en ceste partie là n'est assés puissant pour resister à ceste putrefaction, il appelle à son secours l'esprit de vie des autres parties (car toutes les parties du corps ont vne naturelle amityé l'une pour l'autre) c'est pourquoy les autres parties du corps demeurent froides au commencement du paroxisme.

D'où vient
que les ex-
tremités
du corps
deuiennēt
froides au
cōmence-
ment du
paroxisme.

Tous ces esprits ainsi assemblez augmentent la chaleur en la partie où se faiët la putrefaction, dont il s'eleue des vapeurs & vents les-

quels ne treuuant pas vne libre
issuë *concutiunt corpus & faciunt re-*
morem, ils agitent le corps & cau-
sent le tremblement, lequel trem-
blement continuë iusques à ce que
ces vapeurs & vents ayent treuuvé
vn libre passage. L'esprit de vie ne
pouuant pas quitter trop long-
temps les parties qu'il doit conser-
uer, sans les priuer de vie, y retour-
ne, mais contaminé des vapeurs
putrefaiçtes du tartre, qui l'allu-
ment & enflamét. C'est aussi pour-
quoy le tremblement estant finy,
le corps deuient comme tout en
feu & en vne grande chaleur : car
cét esprit de vie ainsi contaminé
& qui est diffus par tout le corps
est tout troublé & eschauffé tas-
chant à se mondifier & purifier, ce
qui n'aduiant, & ceste purification
n'est faiçte que lors que la coction

Comme se
faict le tré-
blement en
la fièvre.

est paracheuée, qu'il ne s'esleue plus des vapeurs du tartre, alors l'esprit de vie demeure en repos & n'est plus occupé à continuellement se mondifier des vapeurs qui l'infectoyent ce signe apparroist par la crise qui est le temps de la parfaicte coction & separation, tantost par sueur, tantost par les vrines, tantost par hemorthagie, par flux de ventre, absces ou &c. que si au contraire cét esprit est du tout infecté & corrompu sans se pouuoir purifier, il est de necessité de perir, qui se faiét quelquefois par tumeur mercurielle, ou Erysipele, ou gâgrene, soit au foye poulmon, ou autre pattye où se faiét la principale putrefaction du tartre.

Les fièvres continüent plus ou moins selon la quantité de la ma-

tiere, selon la force & puissance des esprits digerans de la chaleur naturelle, lesquels auancent ou retardent la putrefaction & coction, ou selon aussi la nature de la matiere. Quelques vns tiennent que la fièvre se fait souuent sans matiere, comme par vn mouuement violent ou chaleur du Soleil, mais tels Medecins n'ont pas le iugement de considerer que le mouuement où le Soleil putrefient ce qu'autrement ne se putreficroit pas; la crise demonstre assez qu'il y a vne matiere qui foment & enttetiét la fièvre, car les coctions sot requises parfaites pour la cure: il est aisé de iuger que les esprits ne se cuisent point, celuy-là seroit tres ignorant qui le voudroit maintenir, donc c'est vne matiere tartareuse (laquelle est euacuée

tantost par les vrines, sueurs, hemorrhagye, flux de ventre, absces, &c.) que le Soleil ou le grand mouuement ont separee de la partye où elle seroit encore demeuree en repos, sans leur moyen.

Pour ce qui est de l'intermission des fiéures, cela procede de la nature de la matiere, l'vne sera digérée & cuite en 12. heures, vne autre en 36. heures, vne autre en 48. heures. Les feces, excrements, ou tartre qui procedent du mercure ou phlegme se putrescent tous les iours, c'est aussi pourquoy la quotidienne causée du tartre du phlegme dit mercure a son paroxisme tous les iours : car le phlegme, lequel a moins d'esprit de vie qui le puisse conseruer ny que le soulfre, ny que le sel, en mesme temps qu'il est separé, il se putresc

La tierce laquelle procede de l'excrement du soulfhre, a vn iour d'intermiffion, par ce que durant ce temps là il fe fepare du fel & du mercure, l'vn moderoit son ardeur & l'autre l'empeschoit de putrefaction.

Pour la quarte laquelle procede de l'excrement du fel, elle a 2. iours d'interualle, à raifon qu'il faut ce temps-là à cét excrement terrestre pour fe feparer des 2. autres fubftances & à fe putrefier pour les intermittentes mellees, comme tierce quotidienne, quarte quotidienne & erratiques, c'est quand il y a mixtion des tartres.

Tu pourras demander pourquoy les paroxifmes retournent fi reglement. Il faut pour l'intelligence de cez y que tu tienne pour véritable ce que dit Hypocratte à

*ſçauoir, quanto plus impura corpora
nutris comagis ladis*, la raison ſur-
quoy Hypocrates eſt fondé, eſt,
que ce corps impur, comme vn le-
uain, corromp & rend auſſi impur
le bon aliment qu'il reçoit. De
meſme quand en quelque partye
il y a vn excrement, ou tarte im-
pur, l'humeur qui le touchera ſera
renduë impure & ſera auſſi faiçte
excrement, quoy qu'auparauant
ceſte humeur, fuſt bonne & de la
composition de l'homme. Si c'eſt
l'humeur mercure qui touche ce
tarte corrompu, tous les iours ce
mercure ſe corrompera & à meſu-
re qu'une diſteſtion ſera finie, l'au-
tre recommencera, & ainſi cet or-
dre continuëra iuſques à ce que la
maſſe de ce tarte corrompu ſoit
challée ou ſa violence reprimée.
Si c'eſt l'humeur ſoulphre ou ſul-
phuree

phuree qui approche ou soit familier à ceste putrefaction de tartre de la mesme nature, la putrefaction arriuera à ce soulfre humeur, tousiours le troisieme iour, à raison que ce temps est requis pour la separation de telle humeur, & ainsi du sel. Il te faut remarquer que toutes les intermittentes sont entretenues & fométées tousiours de ces trois substances, sel, soulfre, ou mercure: & aussi on ne peut remarquer aucune autre qui ne soit ou ne tienne ou de la tierce ou de la quotidienne, ou de la quarte.

Il faut considerer, que l'huyle & l'eau ne se ioignent poinct ensemble & n'ont aucune conuenance (sans *medium*) c'est aussi pourquoy quand le tartre qui cause la fièvre corrompt ou putrefie quelque humeur, il faut qu'il soit ne-

ceffairement de la mefme nature. Si tu defire en fçauoir dauantage philofophe fur ces principes, car fur ce fubicêt il y a beaucoup de chofe à dire que ie differe pour eui-ter prolixité, & auffi pour t'exercer.

Par ce que deffus tu peux facilement cognoiftre que les fièvres procedent de la putrefaction du tartre : par confequent que la cure d'icelles, eft, de defopiller & chaffer les feces du tartre. Nature, où le medecin interne nous le monftrét comme au doigt: car quād elle fur-monte vne fièvre, n'eft ce pas en defbouchant ou desopillant & en chaffant les tartres? à fçauoir ou par fueurs, ou par les vrines, par flux de ventre, hemorhagies, abfces, &c.

Ceux-là errent grandement, lesquelz fe couurant mal à propos

de l'autorité d'Hypocrate, & de Galien saignent inconsiderément & copieusement pour tascher de guarir les fièvres, sans sçauoir si la putrefaction qui cause la fièvre est dans le sang; car elle n'y est pas tousiours, & puis nature n'est pas tousiours disposée de chercher sa guerison par la saignée, le plus souvent c'est par les vrines, sueurs, flux de ventre &c. là où telle saignée est du tout contraire; c'est bien se moquer de celuy duquel on emprunte & le nom & l'autorité. C'est estre semblable aux Pharisiens, lesquels tenoyent la charie de Moise & citoient la loy que Moise leur auoit apportée: mais ils ne faisoient pas les œuures de la loy, ny ce que Moyse ordonnoit. Hypocrates, & Galien disent que là où Nature tend (c'est à dire le medecin interne)

qu'il la faut imiter: & au cōtraire le medecin Pharisien diët, que si nature mōstre qu'elle veut decharger & garir le malade par vomissemēt, qu'il faut saigner & arrester par violence le vomissemēt par suc de coings, accatia, roses seches &c. Hypocrate l. 7. aphorisme 71. diët. *Excretiones in febris continuis tales quales sint si per vesicam aut ventrem*

Nota, per
vesicam
aut ven-
trem, &
non par la
saignée.

ex cernuntur, bonum: Si vero aliquid secedens steterit non purgatum, malum.

Le Pharisien de la medecine diët au cōtraire, que s'il reste quelque chose à purger, par *vesicam* aut per *ventrem*, qu'il faut saigner, ce qui est directement contre l'intention d'Hypocrate: car la saignée reserre les pores, & refroidit en diminuāt la chaleur naturelle, mais au cōtraire elle augmente la chaleur contre nature qui est la fièvre, car

par l'imbecillité qu'apporte la saignée la nature ne peut separer, & digerer l'excrement, qui faiet la fièvre. Il y a vne infinité d'exemples que ie pourrois alleguer, pour prouuer que ceux qui tiennent la clef de la sçience & doctrine d'Hypocratte & de Galien (ainsi qu'ils se vantent) n'ont toutefois que la couuerture du liure. Dieu sçait que ce n'est poinct par vne haine particuliere que ie leur porte, qui m'oblige de t'auctir de leur methode, mais seulement par vne cômiseration des pauures malades, lesquels sont si auenglés qu'ils ont esgard à l'apparence exteriere plustost qu'aux bons effects, & par ie ne sçay quel malheur, se glissent eux-mesmes dans le peril, quoy qu'ils ayent veu perir leur voisin par la mesme voye semblables aux

brebis, lesquelles suyuent tousiours celle qui va deuant, que si elle se iette dans vn precipice les autres ne la suyuent pas moins, c'est aussi afin que tu ne suyue pas vne telle secte, vraye heresie de la medecine.

Si quelque medecin Samaritain entreprend de traitter le navré que les Pharisiens ont delaisié, incontinét ceux cy remuent toute pierre, pour empescher que le Samaritain ne retourne voir le malade, se seruent d'emissaires pour blasmer malicieusement ce Samaritain. Semblables à vn chien, lequel estât couché sur vn monceau de foin, dont il ne mange poinct n'estant pas sa pasture, toutefois par vne meschante enuie empesche que le bœuf n'en taste.

A talibus medicis Libera nos Domine.

CHAP. IV.

De l'Epilepsie.

EPilepsie, est vne passion des fonctions animales, née des vapeurs Mercurielles de l'excrement, lesquelles se meslent avec l'esprit de vie. Aucune chose ne vit sans esprit de vie, dans lequel esprit, *Vis viuifica omnium rerum condita est.* Cét esprit, neantmoins, perit s'il n'est soustenu, par aliment. Lors donc qu'il passe avec l'aliment, quelque chose hethero-gene, & qu'elle se melle avec l'esprit de vie, incontinent cet esprit tasche à s'en purger.

Epilepsi
appelée
par les
Grecs *ab*
ἐπιλαμ-
βαιναι,
à cause de
l'action.

Cela paroist manifestement en ceux lesquels mangent beaucoup

& qui ont le ventricule debile:
Car pour cuire les viandes qui
sont dans le ventricule, le foye y
contribuë de son pouuoir, comme
y ayant interest, & pour cét effect,
r'appelle à soy le sang des vais-
seaux esloignez, lequel contient
beaucoup d'esprit de vie & de
chaleur dissoluant, afin d'eschauf-
fer dauantage le ventricule pour
auancer & paracheuer là, la co-
ction de l'aliment telle qu'elle a
accoustumé d'y estre preparee: ce
sont les esprits dissoluan qui font
les coctions, & non la chaleur sim-
plement: mais c'est vn discours
à part. Que si cét esprit de vie,
ainsi approché de l'aliment encor
impur, en est contaminé & infe-
cté, il tasche en mesme temps à
s'en purger & à se purifier, & pour

cest effect *concutit corpus*, afin d'ouvrir les pores (referrés par l'absence du sang & de l'esprit de vie, qui sont courrus au secours de l'estomach) pour se recreer & mondifier, en chassant hors l'air impur de l'aliment qui s'est meslé avec luy. Et voylà d'où vient le tremblement incontinent apres le repas.

D'où vient le frisson apres le repas, & que les extremitez du corps s'ôt froides.

De mesme aussi quand l'esprit de vie est infecté par vne vapeur mercurielle & vitriolee, laquelle s'esleue au cerueau, incontinent cét esprit se meut & fait comme vne ebullition, pareille à celle de l'esprit de vitriol & du sel de tartre meslez & ioincts ensemble, & cette ebullition continuë iusques à ce que l'esprit aye dissipé ou surmonté cette vapeur.

La cause de la cōcussio du corps en l'Epilepsie.

La mati-
ere dont
est cause
l'Epilep-
sie.

Proprement la matiere qui faict & cause l'Epilepsie, est vne vapeur mercurielle & sulphuree, qui se separe du tartre de l'vrine (quand ie parle icy de l'vrine i'entens toute cette serosité qui se separe tant de l'aliment, que du corps; laquelle se treuve aussi bien dans le sang & dans les chairs que dans les reins & la vessie, & dont vne partie s'euacue par les sueurs) ceste matiere se peut aussi separer de plusieurs autres choses qui contiennent de telles vapeurs, comme des vlceres en la ratte, mesentere, pancreas, en la matrice fort frequemment &c. Ce mal peut aussi estre cause par les vapeurs mercurielles vitriolees & narcotiques qui se separent & s'eleuent en la putrefaction *tartari cruoris*, & telle sorte est aussi fort frequente. I'ay fait voir, la preuue

de ce que ie propose, à plusieurs de mes disciples, lors que i'ay demonstté l'anatomie extérieure de cette maladie, dont plusieurs d'eux ayât respiré de telle vapeur extérieure pareille à l'intérieure qui cause ce mal sont tombez presque en mesme temps. Les autres qui en estoient plus éloignés ont eu seulement vne forte migraine (car c'est d'une mesme matiere qu'est causée la migraine (le plus souvent) comme aussi des vapeurs stercorées, la difference est que la vapeur causant la migraine n'est pas si violente & aussi qu'elle ne touche pas les nerfs ains est enserree dans quelque membrane, & lors la douleur est fixe & contient fort peu d'espace, telle est idiopathique au cerveau; mais quand elle est sympathique elle procede de mesme cau-

Histoire
remarquable.

se que l'epilepsie, alors elle occupe presque toute la teste.) Pour reuenir à l'epilepsie i'ay obserué en plusieurs, qui auoient ce mal par sympathie, que souuent c'est vne fort petite vessicule, pleine de ceste liqueur vrinale proche d'un nerf, tédon ou autre lieu, d'où l'esprit mercuriel & narcotic se peut esleuer iusques au cerueau. Entres autres observations, il y a 14 ans que ie

Histoire. traitté vne ieune Damoiselle de qualité, laquelle estoit fort tourmentee de ce mal il y auoit viron 2 ans, ie iugé que la cause de son mal estoit en l'un de ses doigts, veu qu'il l'auertissoit auparauant qu'elle tombast, & ce par vne forte convulsion en ce doigt, ie fis apposer vn cautere au bout du doigt, & laissé tomber doucement l'escarre, dont demeura encor ceste ve-

sicule, qui fut cause qu'elle eut encor vn acciez epileptic, mais apres auoir recogneu cette petite vessicule, & l'ayant ostée, elle n'a plus esté malade du tout, & à present a de beaux enfans.

Ceste vessicule n'estoit pas plus grosse qu'un grain de froment & pleine de ceste liqueur vrinale, quasi semblable à l'huylle qu'on separe, par l'alchymie, du tartre de l'vrine, i'aurois bien pû la guarir sans ouurir le doigt, mais avec vn plus long-temps, & puis l'ouerture estoit encor plus seure, par la maxime que *cessante causa tollitur & effectus*. Il ne faut pas s'estonner de ce que si peu de matiere cause, si grand mal, puis que tant soit peu d'air infecté de peste cause la peste, que tant soit peu d'odeur de musc suffoque la femme à qui il re-

pugne, que tant soit peu d'esprit veneneux des menstrees infecte quâtité de vin, que le toucher de la dent de vipere sans diminution de son corps tue la personne, que la dent de chien enragé, faiet aussi enrager ceux qui en sont touchez, &c. Par consequent tant soit peu de matiere peut causer ce mal appellé par les antiens, *sacer*, execrable.

La cause
du retour
des paro-
xismes de
l'Epilep-
sie.

Ce qui fait que ce mal retourne, & à ses periodes, est, que nature ou l'architecte interne ayant prins habitude, de remplir ceste petite bourse de telle liqueur, en mesme temps qu'elle est vuide il la remplit. Il est bien vray que telle liqueur ne causeroit iainais l'epilepsie, demeurans sans estre conuertie en esprit, & si l'alchymiste interne n'en tiroit l'esprit mercuriel

& le soulfhre narcotique qu'elle contient; non plus que l'odeur du *Succinum* ne paroistroit jamais & ne penetreroit le drap si l'Alchimiste n'en faisoit la separation selon l'art. Il en arrive aussi de mesme qu'en faisant la separation du tartre de l'vrine, car il s'en esleue vne vapeur; laquelle si elle entre dans le cerueau elle cause vn mal presque semblable à l'epilepsie, par l'acrimoine specifique de son mercure vitriolic elle irrite le cerueau & les nerfs, & cause les conuulsions, & par sa vertu narcotique elle infecte l'Illeide & offusque l'esprit animal, d'où vient la priuation des fonctions animales & dure ce paroxisme iusques à ce que telle vapeur soit dissipée ou qu'elle soit amortie par la douceur du phlegme, ou par aide exterieure.

Sans la separation des principes du tartre de l'vrine, il ne se feroit point d'Epilepsie.

Verité
contraire
à l'opiniõ
erronee
de plu-
sieurs Me-
decins.

Ceste verité est bien contrai-
re à l'opinion de ceux qui disent,
que c'est vne abondance de fleg-
me dans le cerueau : tant s'en faut,
mais bien au contraire, car ceux
lesquels ont abondance de fleg-
me dans le cerueau, & qui sont su-
iects à ce mal, n'en sont pas si fort
tourmentez que ceux qui ont le
cerueau moins humide : Ce qui
se voit aux enfans qui ont l'incli-
nation à ce mal de naissance par la
semence du pere ou de la mere vi-
tice; car ce mal demeure caché en
eux, & ne paroist que lors que leur
cerueau commence à deuenir plus
sec, alors cette vapeur acre n'e-
stant plus refrence par la douceur
du flegme, elle exerce sa tyran-
nie sans aucun obstacle. Quand à
l'escume & viscosité que les mala-
des rendent par le nez & par la
bouche

bouche ; c'est que le cerueau se pressant & se retirant comme vn limaçon dans sa coque, le flegme y contenu est contraint de sortir.

La cause antecedente de ce mal vient, ou de la semence vitiee du pere ou de la mere, ou du vice de conformation accidentel ou naturel, ou par l'industrie de l'architecte interieur, gouverné par les astres, tant du grand que du petit monde.

Quand à ceux lesquels sont espris de ce mal ; apres quelque grande peur ou grande tristesse, ces choses nonobstant ne sont pas la cause antecedente de cette maladie : car la cause & racine de ce mal estoit cachée dans le corps, laquelle ces passions ont agitee : cette matiere estoit desia encline à cela, cest pourquoy il a esté faci-

le par vne telle emotion de la met-
tre en acte. Le viure immodéré,
les viandes mauuaifes, & les faifons
déréglees , ne font non plus la
caufe primitiue de ce mal. Il eft
vray que la bõne difpofition de la
perfonne, la diette & bon regime
les remedes, & la force de l'archee
à chaffer l'impur, font la caufe
pourquoy ce mal ne s'eft fi toft
manifesté. Ces chofes, à fçauoir,
pœur, ioye, viures immodérés, &c.
font comme les inquisiteurs, les-
quels defcouurent & font paroi-
ftre la difpofition ou inclination
à telle maladie. S'il eftoit ainfi que
ces chofes fuflent la matière &
caufe primitiue de telle maladie,
il faudroit de neceffité que tous
fuflent fubiectz à ce mal, ce qui
n'eft pas vray : par confequent
auffi les chofes fufdites ne font

pas la cause primitive de l'Epilepsie.

La semence vitice dont la per-
sonne a esté engendré, le vice de
conformation, soit naturel ou
accidentel, la predestination &
predomination des Astres, &c.
sont les causes primitives de l'E-
pilepsie, l'excrement de l'aliment,
à sçauoir la liqueur mercurielle vi-
triolee' spécifique, est la matiere
qui est renduë de puissance en acte,
& l'esprit de vie, principalement
celuy qui conserue les nerfs, &
qui habite au cerueau, est celuy
qui patist. Quelques-vns disent
que c'est vne pituite, * laquelle
cause ce mal par sa stupeur : mais
s'il estoit ainsi, il ne se feroit aucu-
ne concussion, non plus qu'en
l'Appoplexie, Catalepie, &c. cau-
sez de pituite.

Causes
primitives
de l'Epi-
lepsie.

La matiere
de l'E-
pilepsie.

* Fausse
opinion.

On pourra dire que fi ce mal vient ou de la femence vitiee, du vice de conformation, ou de la puissance des Aftres, laquelle gouuerne & fait mourir l'archee ou mechanique interne, lequel de l'excrement tartareux, machine telle maladie, il s'ensuiuroit que ce mal feroit incurable : car, qui peut empescher l'effect de ceste semence vitiee, le vice de conformation, & reprimer la vertu & puissance des Aftres?

Obiectiō.

Reſponſe.

A cela ie reſponds que le produit des ſemences vitiees, peut eſtre transplanté, que ce vice, en la ſemence peut eſtre changé & alteré, voire trāſmué : car ce vice n'eſt pas de l'eſſence de la ſemence ny indiuiſible, il n'y eſt qu'accidentel, par conſequent l'intemperie cauſee par vne ſemence vitiee ſe peut

changer. Je pourrois alleguer vn milion d'exemples, qui feroient voir ces choses veritables : mais cela est si clair que ie ne crois pas qu'on en doute: Car combié voit-on d'enfans engendrez de peres & meres fort maigres & valetudinaires, lesquels enfans neantmoins deuiennent fort gras & de bonne disposition & sains: & au contraire; ne voit-on pas aussi iournellement les semences prouenuës d'arbres ladres, hēctiques, & gangrenés, produire neantmoins des reiettons fort beaux & bien sains? Quand à la predomination des Astres à faire encliner à telle maladie, elle n'est pas si ferme qu'elle ne se puisse vaincre : Car il est dict, *Vir sapiens dominabitur astris.* Le Medecin donc, qui est dict, *vir sapiens*, peut resister à leurs influen-

ces, ce qui est manifeste par les exemples journalieres. Combien voit-on de personnes subiectes à de grandes defluctions ou autres telles maladies, (causees par l'influence des Astres) lesquelles maladies sont enfin preuenues, tantost par purgations, par diettes, ou autrement, & mesme chacun ne sçait il pas bien resister à l'iniure des Astres, quand ils causent la gelee & le froid; à sçauoir, en se chauffant ou se couurant bié? Plusieurs recognoissans, qu'aux Equinoxes ou Solstices, ils sont subiects à de certaines maladies, preuiennent l'influence des Astres par le conseil du sage Medecin. Mais à quoy quantité d'exemples puisque personne n'en doute.

Pour le vice de conformation fixe, cela ne reçoit point de cure

parfaicte, on peut seulement diminuer la matiere qui est renduë en aëte : mais la disposition à ce mal demeure tousiours , à cause du subiect qui est fixe. Il y a des vices de cōformation accidentels, lesquels peuvent estre corrigés, voire ostés , comme le cranc enfoncé : car on peut trepaner , & par ce moyen leuer l'incommodité que cette difformité apportoit.

On peut encor obiecter, disans que souuent ce mal commencé au bout du doigt, en l'espine du dos, rattedou en quelque autre membre, mesme en vne personne dont le pere & la mere n'ont iamais eu tel mal ; que par conséquent ce mal ne vient en telles personnes, ny par le vice de la semence, ny du vice de cōformation, ny de l'influen-

ce des Astres : Car qu'elle apparence que ce soit du vice de conformation, veu que ce sera tant soit peu de tartre retenu en quelqu'un de ces lieux sus-nommés ; duquel, par la chaleur, s'esleue ce Mercure vitriolic. Ce ne sera nō plus de l'influence des Astres, puis qu'un tel tartre a de luy mesme ceste puissance de vitier l'esprit de vie, & de causer les conuulsions, lors que l'esprit de vie des nerfs en est infecté.

Je responds, que nonobstant que ce soit vn tartre retenu & coagulé en quelque partie du corps, toutesfois il ne se coagule ny ne se mouue point de luy mesme, mais l'archee est l'artiste qui faict ces choses. Or l'archee est subiet aux Astres (comme j'ay montré cy-deuant) & est regy par eux ; donc

les Astres sont les premiers motifs du tarte ainsi disposé.

Par exemple, les Astres esmouueront vne grande chaleur, laquelle ouurira tellement vn corps, que l'esprit de vie, ou chaleur naturelle se dissipera grandement ; par ce moyen le mecanique interne, ainsi debilité, ne pourra pas faire vne bonne coction ny separation de l'aliment d'auec l'excrement; ne pourra, dis-ie, pousser ou chasser hors l'excremēt ; tellement que restāt & coagulé en quelque membre, sera puis apres resout en liqueur mercurielle selon la vertu des Astres & operation de l'archee.

Il est certain que les Astres du grand monde conuiuent & simbolisent auec les Astres du petit monde, & par ensemble forment

l'inclination ou disposition à ce mal, laquelle demeure comme fixe & permanente, iusques à ce que le sage, c'est à dire, le Medecin y aye remedié par la science. Que les Astres forment l'inclination, cela se voit si manifestement qu'il n'en faut point douter, toutesfois pour plus facile intelligence, j'apporteray quelque exemple : Les Astres ne donnent-ils pas l'inclination à l'aymant, de se tourner & tendre à son astre, à sçauoir au Nord, si l'aymant est du Nord, ou au Sud s'il est du Sud ? ne luy donnent-ils pas aussi l'inclination d'attirer le fer ? laquelle luy demeure tousiours, si le sage ne l'en tire & ne l'en priue, à sçauoir en le touchant de tant soit peu d'huile doux de Mercure : car alors & incontinent il perd son inclination,

cette huile doux de mercure estant plus forte que l'influence de son Astre. Et ainsi, *vir sapiens dominabitur Astris*. Les Astres ne donnent-ils pas l'inclination aux Calendules & Bellis, &c. de se tourner vers le Soleil, de s'ouvrir par sa venue, & de se refermer par son absence.

Ceux lesquels croyent que la guerison de ce mal gist en la seule purgation vulgaire, comme saigner, faire vomir, lascher le ventre : ceux-là se trompent, on diminuera bien le Mercure vitriolic qui s'eleue, ou le tartre d'où il procede. Mais par telles purgations on n'ostera pas tousiours la cause efficiente (à sçauoir la disposition ou inclination) laquelle fait mouuoir & dispose le Mercure vitriolic à se mesler avec l'esprit de

vie, lequel est contenu au cœrueau ou dans les parties qui ont prompte & facile communication avec iceluy.

Il faut conclurre par ce que dessus l'Epilepsie ne se guarit pas par les medecines qui purgent seulement le Stercus, quoy que violemment soit par haut ou par bas: mais seulement par les arcanes & spécifiques. Que si ce mal prouenoit de phlegme ou de pituite froide (ainsi que veulēt plusieurs) & qu'on eust seulement esgard à sa qualité froide; par remedes contraires, il faudroit, de necessité; que le remede contre cette maladie fust chaud. Or nous voyons que les remedes froids au quatriesme degré souuent guarissent ce mal, ce que ne font pas les remedes chauds, par conséquent il ne faut pas seulement

auoir esgard à ces qualitez manifestes, dont la preuue est si ambiguë & douteuse, & encor moins aux temperaments; veu qu'il y a autant de temperaments en la nature qu'il y a d'especes différentes; qui est-ce donc qui pourra descrire le poids & mesure des temperaments, si tant soit peu plus ou moins en la mixtion des elements, faiët des especes tout à faiët différentes: Mais plustost il faut arracher & destruire l'inclination ou puissance de l'archée ou artiste interne de maladies à ne plus machiner d'Epilepsie. Que si ce mal procedoit du phlegme, ce qui est faux neantmoins faux (sauf la reuerence du bonnet & de la tiare des Docteurs qui le maintiennët) lors qu'on aura aujourd'huy purgé ou euacué le phlegme contenu

au cerueau, demain ou tous les iours ne s'en produira-il pas de pareil ? Puis que la disposition & inclination demeure avec la mesme puissance, trauaillât tousiours à preparer de nouuelle matiere, pour de là en machiner l'Epilepsie ; tellement que si cela estoit vray, il faudroit tousiours du turbith, de l'agarie du polipode., &c. pour vuidier continuellement ce phlegme, ainsi que font les carriers ou ceux qui trauaillent aux mines, lesquels sans cesse vident les eaux de source qui s'escoulent dans leur trauail, & puis telle methode de traiter les malades, ne les guariroit pas, ains diminueroit la matiere de la maladie, & pour l'heure seulement. I'ay assez dict cy-deuant que i'en'accorde pas que le phlegme cause ce mal, veu que le phleg-

me cause plustost stupeur que convulsion; & puis, comment du bout du doigt sera-il porté si promptement au cerueau ? d'autre part, il faudroit aussi que tous ceux qui ont du phlegme au cerueau, fussent subiects à ce mal, ce qui n'est pas par consequent, &c.

Pour la parfaicte guarison, il faut vaincre & surmonter les influences des Astres du petit & du grand monde, qui causent ce mal (ainsi que j'ay demonstté de l'aymant) ce qui se fera par les specifics. Sans s'arrester à purger le phlegme : car s'il estoit ainsi que ce mal vint d'une cause froide & qu'il le fallust guarir par son contraire, il faudroit quelque chose de chaud. Je demande donc, pourquoy & comment la pierre *Hæmatites*, l'Elan &c. guarissent ce

320 *Liure troisieme,*
mal tant qu'ils sont portés seule-
ment sur les habits, quelle quali-
té chaude se communique-elle si

Ceux qui
soustien-
nent que
c'est vne
pituite ou
phlegme
froid, se
fondent
en ce qu'ils
voyent de
l'esume
en la bou-
che des
malades,
qui pro-
cede de
l'ebullitiō
qu'ils est
faite au
cerueau:
mais tel
qu'est
l'ouvrier;
aussi l'ou-
rage.
Aussi tel
le Medec-
in de
mesme il
en faut
attendre
la cure.

fort & inuisiblement au trauers des
habits, pour dompter la frigidité
de cette maladie? Il faut que ce
soit vn chaud extreme, lequel puis-
se communiquer sa chaleur à cet-
te humeur froide la pituite: & si
cela est vray, pourquoy ne donne
on le mesme remede, quand il
faut purger tous les pituiteux,
comme les leucophlegmatiques,
&c. Si on ne m'accorde le dernier
il faut donc conclurre que c'est par
les specifics que l'Epilepsie est
purgee & non par le contraire du
froid & humide simplement.

Graces à l'Eternel, ie parle de
ces choses & par science & par ex-
perience: car il m'a donné la gra-
ce d'en pouuoir guarir ceux qui
sont

sont guarissables, quand i'ay voulu agir par les qualités manifestes, i'ay esté trompé, mais iamaïs par les Ipecifiques, lesquels ie sçay bien auoir la puissance de destruire ce mal, mais que ce soit en tant que froid contre chaud, & de sec contre humide, & contra, c'est ce qui ne paroist point; & aussi n'est-il pas vray. Ainsi que le fiel de terre ou centaure mineur, laquelle est chaude au tiers degré, guarit neantmoins la fièvre pareillement chaude, & pour cela ceste herbe est appellée *febrifuga*, elle est toutesfois contraire à la fièvre, puis qu'elle la destruit, non pas en tant que l'un froid & l'autre chaud: mais par ce qu'elle a vne vertu & puissance non seulement de desopiller & chasser le tatre qui cause la fié-

tre: mais aussi d'emousser & amor-
tir la malignité.

L'eau de vie, la Theriaque, le
mitridat, & plusieurs aromates,
&c. lesquels sont chauds, guaris-
sent neantmoins la peste, laquel-
le est aussi chaude. Cela n'est pas
agir, froid contre le chaud: mais
en desopillant & machinant vne
issuë à l'illeide infecté par l'esprit
arsenical de la peste & en mortifi-
ant son esprit veneneux: ce n'est
non plus par vne propriété occul-
te, sinon à ceux qui n'ont point
d'entendement.

Tout ainsi comme si quelqu'un
estant enfermé dans vne estuue
chaude, & qu'il fust prest à estouf-
fer, celuy qui luy ouuriroit la por-
te & l'en tireroit, le guariroit de
cette chaleur, cela ne seroit point
à cause de la qualité froide de ces

homme là : car il n'est requis que d'ouurer la porte, ny à cause d'une qualité occulte ; car il est manifeste qu'il ne falloit qu'ouurer la porte. Et ainsi en est-il des qualités que plusieurs appellent insciemment occultes : Il est bien vray qu'elles le sont, mais à eux seulement, & non aux Medecins qui ont puisé leur science *In libro luminis naturæ.*

Comp^{ar}
raison
vraye

S'il falloit refuter toutes les fausses opinions de ceux qui en ont parlé avecuglement, un volume entier ne suffiroit : & puis j'estime que cela seroit inutile. Je me contente de te donner à cognoistre que l'Epilepsie est causée par une vapeur mercurielle vitriolée & soulfre narcotique, spécifique (car toute autre acrimonie ne cause pas ce mal) qui se tire du tartre séparé de l'excrement de l'aliment

& referrée dans le corps par ob-
struction, laquelle vapeur infe-
ctant l'esprit de vie, faict les
cônuulsions Epileptiques, sans
auoir esgard aux quatres quali-
tez manifestes dont la pluspart
des Medecins hallucinantur.

*A Medicis scarabeis indoctis, &
superbis, Libera nos Domine.*

CHAP. V.

*De la generation des vers, & des
autres animaux, dans le corps
de l'homme.*

Cela est tres-certain qu'aucu-
ne chose corporelle ne vegete
& n'est engendrée sans semence,
depuis que Dieu a posé vn ordre
en la nature. Il faut aussi croire
qu'il n'y a point ny d'animaux ny

de vegetaux, qui ne contiennent vne double semence. L'une genuine, ou réelle, laquelle contient & conserue l'espece dont elle porte le nom. L'autre est monstrueuse, se manifestant par la putrefaction, le Ciel y cooperant, & rapporte toute autre chose que la genuine. Les vers s'engendrent par deux moyens, premierement par le sperme de la mesme espece. Secondement par la putrefaction du subiect dont se manifeste le sperme monstrueux, ainsi que ie te feray entendre clairement par exemples. La poire contient la semence du poirier, & de la mesme poire, par putrefaction, s'engendrent des vers, l'homme contient en soy la semence de l'homme, ou semence qui rapporte & produit la mesme espece, le cada-

uer, voire le corps de l'homme encor viuant contient en soy aussi vne semence monstrieuse de laquelle par putrefaction s'engendrent des vers.

Que chaque chose contient vne double semence, il paroist encor manifestement aux vegetaux, comme au froment, lequel apres qu'il est ietté en terre, il germe & produit la mesme espee: le reste de ce grain qui n'est point semence, ains seulement le corps ou vase qui la contenoit, souffre vne autre putrefaction, d'où naissent d'autres choses qui ne sont point de l'espee du froment comme zizanie, nielle, yuraye, gramen, &c.

Après que la féve a ietté le germe qui rapporte la mesme espee, le vase ou corps qui contenoit

le semence de la fève se pourrit derechef, dont sont produits des vers, de l'anagallis, &c. Il faut remarquer que le grain, pepin, gland, &c. ne sont pas tout semence, en quelqu'vnes de ces choses la semēce n'est pas la 200^e. partie : le reste qui se pourrit derechef, produit vne autre semence, & est ce que j'appelle *semen monstruosum*. Des animaux c'est la mesme chose : car vn canard engendre vn canard, & si le mesme canard est putrescé (comme plusieurs sçauent) il sera conuertty en crapaux ou grenouilles, la Cicogne en couleures & serpens. Les excremens des animaux mesme contiennent la semence des vers, comme le stercus de cheual produit des eschabots, la merde de mouche en moins de

douze heures eft conuertie en d'autres mouches. Pour moy ie treuve que l'air & l'eau contiennent auffi des femences, tant des animaux infectes que des vegetaux. Il y a peu de perfonnes qui n'ayent veu tomber avec la pluye des grenoüilles & crapaux. l'en ay veu tomber par trois fois, dont i'ay bonne memoire. La premiere fois l'annee de cette grande Eclypfe dont il paroiffoit trois Soleils, la feconde, l'annee 1608. la troiefme en 1619. Si on melle avec du miel (qui eft vn air condensé) tant soit peu de pain, il fera en peu de temps conuertty en fourmis. Si dans la fleur de la pomme, poire, prune, noix, &c. eft enclos l'air impur par vn temps bruineux, cest air ne pouuant fe purifier, fe corrompt & eft conuer-

ty en vers. La fleur du coudrier estant imbibee de cét air impur, le ver s'engendrera dans la coquille de la noisette. Ne voit on pas iournellement que la bruynne, qui est vn air impur, là où elle s'attache & tombe, qu'en peu de iours, voire souuent presque en mesme temps elle est conuertie en chenilles, araignees & autres vermineux.

Quand à moy, poussé du desir d'apprendre & cognoistre la puissance de l'air & de l'eau, & ce qu'ils contiennent : i'ay mis vn vaisseau de verre bien net sur vn lieu haut esleué, dans lequel il ne tomboit que de la rosee & de la pluye, que le Soleil desechoit souuent, enfin apres deux ans & demy il s'est trouué dedans vn peu de terre verdastre, en la superficie de laquelle

estoyent des petits vers, quasi semblables à des coſſos, au deſſous & parmy cette terre il y en auoit d'autres petits plus blancs, en outre il y auoit auſſi de l'anagallis qui commençoit à venir, & d'autres herbes difficiles à cognoiſtre à cauſe de leur petiteſſe. Or ny la terre ny graines n'ont eſté portez là, par conſequent c'eſtoit l'air & l'eau qui contenoient ces différentes ſemences. Pour preuue manifeſte que l'air ſe condense & ſe conuertit en diuerſes eſpeces de corps, ſelon la ſemence qu'il rencontre diſpoſee à generation. Prenez de l'aoës ſans racine, ſuſpendez-le en l'air avec vn filet ſans l'approcher de terre, il ne delaiſſera de viure, croître, & multiplier pluſieurs années, & auſſi gayement que s'il eſtoit dans vne terre

L'aloës
ou iou-
barbe, le
relephiū
ſe nour-
riſſent
d'air &
ſans ra-
cines,
ains ſuſ-
pen dues
au plan-
cher.

fertile. La ioubarbe, le telephium, &c. se nourrissent & vegetent de la même façon. Par cette exemple il est facile de voir que c'est l'air qui prend corps, selon l'espece de semence qu'il coagule. C'est air conuerty en aloës, &c. se putrefiant, est puis apres conuerty en d'autres especes, comme en vegetaux d'autres especes & en vers. Le sable prins au fond de la mer, voire à plus de deux cens lieues loing de terre, mis à la pluye & au Soleil, ou seulement en l'air, le contregardant de la pluye, en moins de trois mois sera tout couuert de diuerses especes d'herbes, sans toutefois qu'on en ayt approché aucune semence, mesme dedans, s'engendreront des lombrès & autres vers. Si donc les fruiets sont nourris de cest air &

de cette eau il ne faut s'estonner
s'ils contiennent ausli vne semen-
ce monstrueuse avec la genuine.
L'homme se nourrit ausli & prend
augmentation de ces choses, par
consequent ausli il contient en
luy des semences monstrueuses,
qui prouiennent de l'air & de
l'eau: les coctions & digestions
ne corrompent pas tousiours ce
sperme monstrueux, car s'il estoit
ainsi, comment s'engendreroient
les vers qui font le panarix, les
vers aux dents, aux playes & vl-
ceres, les ascarides, les poux, les
lombris, &c. en la digestion des
viandes, cette semence monstu-
se periroit? Or les vers s'engen-
drent apres les digestions & co-
ctions, par consequent telle se-
mence n'est pas deltruite par les
digestions.

Quand à la generation des vers & insectes, elle n'est pas semblable à la generation des autres animaux : car la semence de ceux là se conserue dans leurs cendres, voire mesme dans leurs excremets. Quand les mouches & tant d'autres tels animaux, par l'iniure de l'hyuer sont priués de vie, incontinent que le Soleil rayonne au printemps sur icelles mortes, il en renaît d'autres de leurs cendres & poussiere. N'estoit que ie hay la prolixité, i'apporterois cent exemples. Quand à leur vegetation, elle approche fort des simples vegetaux. Comme on voit que l'espece de la pluspart des vegetaux est conseruee dans leurs sels, voire plusieurs siecles, aussi voit-on la mesme chose en la pluspart des insectes & vermis.

seaux, comme les hanetons & chenilles, qui de leurs cendres renaissent dans trois ans. Cela posé, il ne faut s'estonner si l'homme contient en soy la semence de quantité de vers & d'insectes, comme ascarides, tignes, lombris, grenouilles, crapaux, couleuvres, serpents, &c. Les vers aussi & autres insectes, s'engendrent par leur propre semence, c'est à dire de la genuine; à sçauoir par la copulation du masle & de la femelle, laquelle semence ne s'esuente pas (comme on dit) & ne se corrompt à l'instar des autres animaux pour n'estre pas tout aussi tost enfermée dans vne matrice; C'est pourquoy, quand l'homme boit de l'eau, où il y a du sperme de quelque vn de ces animaux ou qu'il en passe avec son manger, cette

semence trouuant en l'homme vne matiere ou chaleur conuenable, elle sera rendue de puissance en acte, & de là naistront dans l'homme des animaux.

La raison pourquoy tous hommes ne produisent pas des vers, est que leur archée separe & iette hors les excrements, où sont contenus telles semences, ou que l'archée n'est pas disposé d'en machiner aucune chose.

Quand à la cure, la coloclyste tue bien quelques vers : mais elle n'empesche pas la generation future d'autres. Le vinaigre tue & faict mourir les lombris, & au contraire en engendre quantité d'une autre, quelquefois en vne cuëlleree de bon vinaigre, & bien fort, il se voit plusieurs milles petits vers qui sont acres & pi-

quans comme l'esprit mesme du vinaigre, tels sont ou semblables les vers qui font le pararix, tignes, ascarides, syrons, &c. La vraye cure des vers qui sont au corps de l'homme, & pour empescher qu'il ne s'y en engendre à l'aduenir, c'est de fortifier le baume conseruatif de l'homme, purger ce qui est heterogene & corruptible, & augmenter le baume radical par apposition d'un substitut qui soit bien purifié. Il faut remarquer que iamais il ne se fait corruption que par l'absence ou perdition du sel ou baume radical, ou quand il perd sa force. C'est pourquoy fondé sur cette maxime, il faut fortifier le baume radical, resister à la putrefaction, afin d'empescher la generation des vers. Quand à ceux lesquels sont des-
12
formees

formés, chacun à son remede particulier, dont ie ne feray mention en ce present traitté. Si Dieu me donne la commodité, ie t'en dresferay vn traitté à part, là où ie specifieray les remedes propres à chaque maladie, avec les cautions & obseruations.

CHAP. VI.

De l'Icterie ou Jaunisse.

C'Est vne chose tres-belle & tres-honorable à vn Medecin de parler de son art avec cognoissance & assurance. Car autre chose est de dire, & de mettre en auant vne chose fondée seulement sur opinion; & autre la prouuer & demonstrier.

Je me suis estonné plusieurs

Y

fois comment tant de siècles se sont passez, sans qu'on aye considéré de prés & examiné si les termes de Medecine, & les expositions receuës par tradition de pere en fils, & tenuës pour Canoniques: si, dis-je, ces termes & expositions sont soustenables & veritables.

En ce chap. ie veux seulement parler del'Isteric ou Jaunisse, que tous, ou à tout le moins la plus grande partie des Medecins, tiennent & assurent que c'est vne abondance de bile; l'erreur est si visible & si palpable qu'il ne se peut rien dauantage.

Premierement la bile (soit ce qu'ils appellent fiel, ou ceste substance sulphuree l'vne des trois essences qui cōposent l'homme) ne dōne point cete couleur iaune telle

qu'elle est en l'ictérie, voire couleur si viue, qu'elle esgalle en viuacité la couleur del'or. Que l'on trépe, soit de la chair, soit du drap dans la bile ou fiel, ou qu'on la melle avec le sang, alors on verra facilement que ceste bile ou fiel ne contient & ne donne point telle couleur,

Secondement, le corps ne contient point tant de bile, ou fiel, telle personne sera affligée de ceste maladie, & luy continuera 8. 9. ou 10. mois, voire dauantage: durant ce temps, toutes ses vrines, fueurs, le stercus: voire le sang & les absces seront tous iaunés. Voudroit-on soustenir que tout cela fust bile? Et puis par quel argument le prouuer? Car si on dit que le vaisseau qui porte la bile du foye dans la bourse du fiel est bouché, & que delà il se faict vn regorge-

ment: Je respondray qu'il est plus ouuert qu'il ne peut iamais estre, s'il estoit vray que ceste couleur fust du fiel; car tous les excrements stercorez sont teints de ceste couleur, le ventre & les intestins sont souuent lasches, voire inondés par le moyen de telle bile, & si toutefois le corps n'est pas moins doré de ceste couleur iaune. Et puis en vn autre temps, que le meisme malade n'en purge pas tant par le bas, & qu'il n'a point la iaunisse que deuient ceste bile? est-ce que tantost ce malade fait de la bile & tantost non? Et de plus, on dit que la bile fait les erysipeles & inflammations: par consequent tout le corps seroit erysipeateux, & tout enflamé. Mais à quoy m'arrester à refuter telles opinions: car la demonstration que ie feray de ce-

ste maladie, les obscurcira & an-
antira.

Sçache que le corps de l'hom-
me est vn petit monde, lequel
contient diuerses sortes de couleurs
& de matieres, qui tirent les cou-
leurs, & les font paroistre, là où
autrement & sans ce moyen elles
ne paroistroient iamais. Pour
exemple, la noix de galle seroit bié
seulle vn siecle en vn lieu sans
qu'elle parust noire, ny qu'elle de-
monstrast sa couleur interieure:
mais tout incontinent qu'on la
touche de vitriol, tout au mesme
temps, la couleur noire de cette
galle paroist.

De mesme, en est-il de l'homme:
car il y a des fels dans son corps,
lesquels ont ceste puissance d'ex-
traire les couleurs des choses qui
les contiennent & les faire paroi-

stre, ce qu'autremét & sans ces sels
elles ne paroistroiét iamais. L'esprit
de vitriol tire de la rose vn pourpre
& vn rouge le plus vif en couleur
& le plus beau qu'il se puisse voir:
si toutefois dans ceste couleur si
agreable on iette quelque peu de
sel de tartre resout, elle demande-
ra tout incontinent, & sera chan-
gee en vn beau vert. Si ce mesme
sel de tartre resout touche de la
rhubarbe, laquelle est iaune, il la
changera en vn beau rouge. La
vapeur seule du soulfre blanchit
la rose rouge. Tant soit peu d'es-
prit de vitriol ou de vinaigre mis
dans vne quantité de teinture par-
faitement rouge, tiree du bresil
ou du sental, la conuertit tout à
l'instant en beau iaune.

Si de l'esprit de sel est messé avec
le sang, il le noircira, le soulfre ex-
creméteux de l'antimoine teint la

chair de l'homme viuât en aussi beau
iaune que l'ictérie. Si l'esprit du sel
armoniac de l'vrine ou de la sueur
est meslé avec le sang à proportion
requisse, ce sang deuiendra iaune.

Demefme il y a dans le corps
de l'homme des sels minéraux, les-
quels tirent les couleurs du sang,
des chairs, des membres princi-
paux, des aliments, & des excre-
ments. Le Mercure bien préparé
tire vne verdeur des excrements
contenus aux membres princi-
paux, ce qui ne paroistroit pas
par les autres remèdes. Apres auoit
vsé quelque temps de l'*acidum sul-*
phuris in crocum martis, pour les ob-
structions du foye, & de la râtte,
lors que ces membres s'ouurent
& se desopillent, les excrements
en seront fort noirs, ce qu'ils ne
paroistroient pas par les autres re-

medes. Je pourrois alleguer mille exemples : mais ie hays prolixité.

Par confequent il faut conclurre que l'icteric ou iauniffe est caufee par vn fel mineral ou par fon efprit, lequel teint en ceste couleur le fang, les chairs, les os, les aliments & les excremens : & qu'il extraict non feulement telle couleur, mais auffi les autres de quelques matieres où elles font contenuës, & qui toutefois ne paroiftoient iamais fans ces fels, ou leur efprit, ainfi que i'ay dit de la noix de galle, de la rofe, &c. D'affeurer au vray quelle est ceste matiere particuliere dont est extraicte la couleur iaune d'vn ictérique, ie ne le dy point : mais ie dis qu'il y a dans l'homme plufieurs fuiets qui contiennent ces diuerfes couleurs, iaunes, vertes, bays, &c.

On peut obiecter, disant, si ce n'est vn regorgement & vne inondation du fiel ou bile, ains que ce soit vn sel lequel fait extraction de ces couleurs, pourquoy donc tous hommes ne sont-ils iaunes tousiours? Veu qu'ils contiennent tousiours ces sels qui font extraction des couleurs : à cela ie respondray que le mechanique ou alchymiste interne ne separe pas tousiours ny en tous ces sels de leurs matrices, & partant ne sont pas tousiours au pouuoir d'extraire ces couleurs. Comme le sel de tartre tant qu'il demeure dans sa matrice, qui est la lie du vin il ne peut colorer la rose en beau vert, si le vitriol n'est separé de sa matrice il ne tirera pas la couleur rouge de la rose, ains il la noircira plustost: si l'esprit n'est separé du soulfhre, sa

matrice, il ne blanchira pas la rose rouge. De mesme il faut iuger de l'homme, car si le sel de l'vrine resout ou conuertit en esprit ou sel armoniac; il ne destruira pas les chairs, & ne corrompra pas le sang; il causera bien solution de continuité, ou incommodera, à cause de sa masse ou forme: mais l'esprit qu'il contient, n'incommodera point, estant comme en-ferré & emprisonné dás sa matrice, qui est le tartre de l'vrine: les sels & esprit de sels, lesquels font extraction des couleurs, & les font paroistre, peuuent bien aussi exalter en couleur le fiel, & le rendre plus iaune qu'il ne paroist d'ordinaire, dont puis apres sont teints les chairs, le sang, excrements, &c. Mais ie dis que sás ce sel, ou sô esprit, la couleur du fiel ne se mul-

tipliroit point tant, voire mesme ne paroistroit point autre que ce qu'elle est d'ordinaire. Si on donnoit à ceste couleur le nom de Bile, comme on donne à la couleur de la noix de galle, le nom d'Ancre, ie concederois volôtiers qu'on appellast telle couleur Bile; car il n'importe pas tant du nom, pourueu qu'on estime toujours la chose, ce qu'en effect elle est (quoy que le nom de *tinctura morbus*, conuiène & exprime mieux:) Mais ceux qui l'appellent bile, estiment aussi que c'est cela mesme, qui fait l'erysipele, les douleurs en la goutte, qui reside dans le fiel qui sert à faire l'euacuatiō naturelle du Stercus le *cholera morbus*, &c. Toutefois ils sont fort confus en leurs opinions: car elles se contredisent & impliquent contradiction en tous

poincts, ils ne considerent pas que le fiel ou bile est vne partie du corps necessaire, comme la ratte poumon, tendons, nerfs, &c. & est vn purgatif dont le mecanique interne ou nature se sert comme de sa uon naturel ou medecine purgatiue, pour deterger & mondifier le corps, de tant d'immondices qui le destruyroient: Sans ceste partie le corps seroit imparfait. Mais tout au contraire, ceste matiere qui fait l'icterie, l'erisipelle, la goutte, bref la bile de messieurs nos Docteurs, gaste, vitie corrompt & souille le corps de l'homme, au lieu que la vraye bile ou fiel le mondifie: Par consequent ie dis que l'icterie n'est point causee par le fiel ou bile simplement, & que ceux qui s'arrestent seulement sur ceste opinion, & s'y fondent, ne peu-

uent paruenir à la vraye cure, n'ayant pas la cognoissance de la matiere de l'icteric ou iaunisse, ny comment cela se faict.

Pour la cure, il faut premiere-ment desopiller, puis mortifier & purger les sels qui font extraction de telles couleurs, dont le corps de l'homme est vitié & gasté, voire alteré de sa naturelle couleur.

EN ce traitté ie n'ay point parlé des maladies particulieres aux femmes, attendu que le subiect merite bien vn discours à part, veu qu'elles sont en grand nombre, & pour la plus-part tres-facheuses: c'est pourquoy ie les mets dans vne autre cathégorie. Plusieurs en ont escrit selon leurs opinions, & peu ont approché de la verité, & parlé avec certitude de ces maladies:

Mais puis que Dieu m'en a donné
vne cognoiffance plus certaine
qu'à plusieurs autres, par mes pe-
regrinations, foins, veilles & des-
pences, à la recherche de cette ve-
rité : le n'enfoüiray ce talent, ains
ie le declareray, ce qui est fecret à
plusieurs, & te feray aualer deli-
cieufement le fruiét qui ma don-
né beaucoup de peine & fort cou-
fté à recueillir, fi Dieu m'en donne
le loifir. Auquel foit gloire &
honneur eternellement.

A Paris ce premier Decemb. 1634.

F I N.

Extrait du Priuilege du Roy.

PAr grace & priuilege du Roy,
donné à Paris le 26. Iuillet 1635.
signé GALLAND, Il est permis au Sieur
de Coqueray Medecin, faire imprimer
vn liure intitulé *La parfaicte cognoissan-*
ce de toutes les maladies qui arriuent au
corps humain, causée par Obstruction,
pour le temps & espace de cinq ans:
avec deffences à toutes personnes de
l'imprimer durant ledit temps, que ce-
luy auquel ledit sieur en fera transport,
& ce à peine de confiscation, & de cinq
cens liures d'amende, comme plus à
plein est porté par ledit priuilege.

Le 10. Octobre 1635. ledit sieur de
Coqueray a fait transport du Priuilege
cy-dessus à Pierre Billaine, Marchand
Libraire à Paris, pour en iouyr le temps
porté par iceluy.

Fautes suruenues en l'Impression.

P Ag. 3. ligne 8. lisez ampoules. pag. 10. l. derniere lis. là où il voit. p. 23. l. penult. il y a obmission, apres proprietiez, lisez, de mesme l'Astrologie. p. 26. l. dern. ostez que. p. 27. l. 15. & 16. *caelestium & te restrium* est superflu. p. 33 l. 3. ostez, qui. p. 39. l. 13. lis. ce, en la mesme p. l. 16. ostez & p. 43. l. 5. lis. le chien lequel. p. 53. lis. d'emissaires. p. 56. l. 16 ostez, par le feu. p. 60. l. 8. lis. si le sel. p. 64. l. 12. lis. sel. p. 64. l. 20. ostez : p. 68. l. 15. ostez avec p. 82. l. 13. lis. vieux salés. mesme p. l. dern. ostez donc. p. 87. l. 8. lis. matiere. p. 95. l. 13. lis. alumineuse. p. 106. l. dern. lis. *causarum*. p. 123. lis. l'Archee en. p. 167. l. der. lis. hepaticque. p. 202. l. 12. lis. sort. p. 206. l. 8. lis. mondel'homme. p. 241. l. 1. lis. or. en la mesme p. lis. donc. p. 242. l. 1. lis. par le froid. p. 257. l. penult. lis. erugmense. p. 267 l. 7. l. chemines. p. 268. l. 17. posés : p. 271. l. 5. ostez la, qui est apres mal, & le mettres apres transgression. p. 255. l. 12. ostez la. p. 279. l. 9. lis. *libera*. p. 288. l. 2. lis. *eo magis*. p. 307. l. penult. lis. catalepsie. p. 308. lig. 5. lis. mouuoir. p. 317. l. 18. ostez le premier faux. p. 335. lig. 2 lis. matrice.